

শ্রেয়-ভক্তিৰ হনুমানবিগ্রহ, নৰ্বকুলসমস্তায় হীপকত

# অথথু অমিয় শ্ৰী গৌৰাঙ্গ



আঢ়িভাকুমাৰ মেনশ্ৰু

শ্ৰীমন্ত, কলিকাতা-৬

প্রথম সংস্করণ

জুলাই, ১৯৬৩ ( শ্রাবণ, ১৩৭০ )

প্রকাশক

শ্রীপ্রকাশচন্দ্র সাহা

গ্রন্থম্

২২।১, কর্নওয়ালিস স্ট্রিট,

কলিকাতা-৬

শিল্পী

পূর্ণেন্দু পত্রী

মুদ্রক

শ্রীসুধনারায়ণ ভট্টাচার্য

তাপসী প্রেস

৩০, কর্নওয়ালিস স্ট্রিট,

কলিকাতা-৬

মূল্য : আট টাকা



অনর্পিতচরীং চিন্নাং করুণান্নাবতীর্ণঃ কলৌ  
সমর্পিত্বকুব্জতোম্বলসং স্বভক্তিপ্রিয়ম্ ।  
হরিঃ পুরটস্থশ্বরদ্যতিকদমসন্দীপিতঃ  
সদা স্বদম্বকন্দরে পুরতু বঃ শচীনন্দনঃ ।

নমো মহাবলান্নান্ন কৃষ্ণপ্রেমপ্রদায় ভে ।  
কৃষ্ণান্ন কৃষ্ণচৈতন্তনাম্নে গৌরদ্বিবে নমঃ ॥

হরেন্দ্রায় হরেন্দ্রায় হরেন্দ্রায়ৈব কেবলম্ ।  
কলৌ নাস্ত্যেব নাস্ত্যেব নাস্ত্যেব গতিরক্ৰমা ॥



‘তৃণ হইতে নীচ হৈয়া সদা লবে নাম ।  
আপনি নিরভিমानी, অশ্লেষ দিবে নাম ॥  
তরুসম সহিকুতা বৈষ্ণব করিবে ।  
ভৎসনে-তাড়নে কারে কিছু না বলিবে  
কাটিলেহ তরু যেন কিছু না বোলয় ।  
শুকাইয়া মৈলে তবু জল না মাগয় ॥  
এইমত বৈষ্ণব কারে কিছু না মাগিব ।  
অবাচিতবৃষ্টি কিম্বা শাক-কল খাইব ॥  
সদা নাম লইব যথা লাভেতে সম্ভাষ ।  
এই ত আচার করে ভক্তিধর্ম-পোষ ॥’

## ভূমিকা

'কলিকালে নামরূপে কৃষ্ণ অবতার।' আর কিছুই করবার নেই কলিকালে, শুধু নাম শোনবার জন্তে একটু কান পেতে থাক। সেটুকু ঐংহক্যাও যখন নেই তখন ভগবান নিজেই কাঙাল লেজে জীবের দ্বারে-দ্বারে নাম বিলোতে বেড়িয়েছেন। আমরা তাঁকে চাই না, কিন্তু তাঁর ভীষণ দায়, তিনি আমাদের চান। নিজে গুনবেন বলে আমাদের নাম শোনাচ্ছেন, নাম শেখাচ্ছেন। যদি আভাসেও আমাদের নাম আসে। তাই গৌরান্ধীবনী লিখব এমন স্পর্ধা নেই—শুধু আভাসে নাম করবার জন্তে কিঞ্চিৎ লিখন-পঠন। শুধু সঙ্করণে সিদ্ধগমনের চেষ্টা। 'পড়িলাম গুনিলাম এতদিন ধরি। কৃষ্ণের কীর্তন করি পরিপূর্ণ করি ॥'

অচিন্ত্যকুমার



সন্ধ্যাস গ্রহণের পর কাটোরাতেই স্নান যাপন করলেন গৌরহরি।  
মুকুন্দকে বললেন, কীর্তন লাগাও।

প্রভুও নৃত্য করতে শুরু করলেন। খাস হাস খেদ কম্প পুলক  
ছড়ার—প্রেমের সমস্ত বিকার আবির্ভূত হল। দণ্ড-কমণ্ডলু কোন  
দিকে গেল খেয়াল করলেন না। নাচতে নাচতে গুরুকে, কেশব  
ভারতীকে, আলিঙ্গন করলেন। স্নকৃতি ভারতীও হরি-হরি বলে  
নাচতে লাগল। তারও দণ্ড-কমণ্ডলু কোথায় গেল কে জানে।

ভারতীকে বললেন, 'আমাকে এবার বিদায় দিন। যেখানে  
গেলে আমার প্রাণনাথ কৃষ্ণকে পাব আমি চললাম তার সন্ধানে।'

ভারতী বললেন, 'আমিও তোমার সঙ্গী হব।'

তখন চন্দ্রশেখরকে ধরে কাঁদতে লাগলেন গৌরহরি। বললেন,  
'আপনি নবদ্বীপে ফিরে যান। সকলকে গিয়ে বলুন, আমি চলেছি  
বৃন্দাবন।'

যে বটগাছের তলায় বসে বিশ্রাম করলেন প্রভু, তার নাম হল  
বিশ্রামতলা।

প্রভু গোপীভাব ধরেছেন। আবিষ্ট হয়েছেন রাধাভাবে। কৃষ্ণকেই  
কাস্ত বলে মেনেছেন। 'গোপীভাব যাতে প্রভু ধরিয়েছে একাস্ত।  
ব্রজেন্দ্রনন্দনে মানে আপনার কাস্ত।' সে কৃষ্ণ কী রকম? সে কৃষ্ণ  
শ্রামসুন্দর। সে কৃষ্ণের চুড়ায় শিখিপাখা, বুকে গুল্লামালা। সে কৃষ্ণ  
গোপবেশ, ত্রিভঙ্গিম, সে কৃষ্ণ মুরলীবদন। কৃষ্ণ যদি অন্ত রূপ ধরে,  
এমন কি চতুর্ভুজ হরেরও দাঁড়ায়, গোপীভাব স্মৃতি পায় না, গোপীর  
রাগোল্লাস সঙ্কচিত হয়।

বসন্তকালে গোবর্ধনে রাসলীলা করছে কৃষ্ণ। হঠাৎ রাধাকে সঙ্কেত করল, চলো ছুজনে পালিয়ে যাই নিকুঞ্জে, নিভৃত হই। রাসস্থলী থেকে কৃষ্ণ অস্বস্তিত হল, নিকুঞ্জে গিয়ে রাধার অপেক্ষা করতে লাগল। কোথায় কৃষ্ণ! গোপালনারা চারদিকে খুঁজতে লাগল কৃষ্ণকে। দূর থেকে দেখল কৃষ্ণ নিকুঞ্জে গিয়ে বসেছে। কৃষ্ণও দেখল গোপীদের। কী হবে, ধরা পড়ে যাব। যদি, হায়, আমার এখন চার হাত হত! মনে ইচ্ছা করা মাত্র কৃষ্ণ চতুর্ভুজ হয়ে উঠল। গোপীরা এসে দেখল, এ কে? এ তো নারায়ণ। এ তো আমাদের প্রাণকান্ত কৃষ্ণ নয়। তাদের কান্ডাভাব সঙ্কুচিত হল। নারায়ণকে নতিস্তুতি করে তারা কৃষ্ণের খোঁজে অস্থ দিকে চলে গেল।

এমন সময় দেখা গেল রাধাকে। কৃষ্ণের ইচ্ছা হল চার হাতই মেলা থাক, রাধার সঙ্গে একটু কোঁতুক হোক। কিন্তু সাধ্য কি, কৃষ্ণ সেই ঐশ্বর্যকে ধরে রাখতে পারে। রাধা যতই এগিয়ে আসতে লাগল ততই অতিরিক্ত দুই হাত সঙ্কুচিত হতে লাগল। শত চেষ্টা করে রাধার সামনে চতুর্ভুজ থাকতে পারল না। যে দ্বিভুজ সেই দ্বিভুজই হয়ে গেল। ‘রাধার বিশুদ্ধ ভাবের অচিন্ত্য প্রভাব। যে কৃষ্ণেরে করাইল দ্বিভুজ-স্বভাব ॥’

রাধিকাতেই প্রেমের পূর্ণতম স্মৃতি। ঐশ্বর্যলেশশূন্য মাধুর্যতরঙ্গিনী। তাই তাকে চমৎকৃত বা অপ্রতিভ করার জন্মে ঐশ্বৰ্যের বিকাশ সম্ভব নয়। শুদ্ধ মাধুর্যের প্রতিমূর্তি রাধার কাছে ঐশ্বর্য বিড়ম্বিত। সুতরাং স্বরূপসিদ্ধ দ্বিভুজ রূপ ধরো। ‘কৃষ্ণের যতেক খেলা, সর্বোত্তম নরলীলা, নরবপু কৃষ্ণের স্বরূপ।’

‘গোপী, গোপী,’ বলতে লাগলেন গৌরহরি।

সেই কৃষ্ণানন্দ আগমবাণীশ আপত্তি করেছিল, গোপীনাম জপা অশাস্ত্রীয়, বরং কৃষ্ণনাম জপলে ফল পেতে পারো, আর এই তান্ত্রিক আচার্যকে লাঠি হাতে মারতে গিয়েছিলেন গৌরচন্দ্র।

গোপীরা কী রকম ? ‘অচ্ছ ধোত বস্ত্রে যেন নাহি কোনো দাগ ।’  
 মূর্তিমতী নির্মলতা । তাদের স্বস্থবাসনা নেই, তারা কৃষ্ণের সঙ্গে  
 সঙ্ক করে শুধু কৃষ্ণ স্ত্রী হবে বলে । ‘অজ্ঞেব গোপীগণে নাহি  
 কামগন্ধ । কৃষ্ণস্থ লাগি মাত্র কৃষ্ণে সে সঙ্ক ॥’ তাদের আশ্র-স্থ-  
 দুঃখের বিচার নেই, তাদের সমস্ত কষ্ট, সমস্ত মননচিন্তন কৃষ্ণস্থের  
 উদ্দেশে । ‘আশ্র-স্থ-দুঃখ গোপীর নাহিক বিচার । কৃষ্ণ-স্থহেতু  
 চেষ্টা, মনোব্যবহার ॥’ কৃষ্ণের জন্মে তারা বেদধর্ম লোকধর্ম আর্ষপথ  
 সব ছেড়েছে, শুধু সেবায়-ভালোবাসায় কৃষ্ণকে স্ত্রী করার জন্মে ।  
 কৃষ্ণের বাইরে আর তাদের তৃষ্ণা নেই ।

গোপীদের কাছেই কৃষ্ণের প্রতিজ্ঞাভঙ্গ হল । কী প্রতিজ্ঞা  
 কৃষ্ণের ? কৃষ্ণের প্রতিজ্ঞা ছিল যে যে ভাবে কৃষ্ণকে ভজন করবে, কৃষ্ণ  
 তাকে সেই ভাবে কৃতার্থ করবে । অর্থাৎ ভজনকারী যা প্রার্থনা করবে  
 কৃষ্ণের কাছে, কৃষ্ণ তাই তাকে দিয়ে দেবে । বাসনার অনুরূপ ফল  
 দেবে কৃষ্ণ । কিন্তু, গোপীদের যে কণামাত্র বাসনা নেই । তাদের  
 কৃষ্ণভজনের উত্তরে কৃষ্ণ তাদের আর কী ফল দিতে পারে ? কিছুই  
 দিতে পারে না । তাই কৃষ্ণের প্রতিজ্ঞা মিথ্যে হয়ে যায় ।

গোপীদের তাই বলছে কৃষ্ণ, দুর্জন গৃহশৃঙ্খল নিঃশেষে ছিন্ন করে  
 তোমরা আমার ভজনা করেছ । নির্মলভজনপরায়ণা, তোমাদের  
 সাধুকৃত্যের প্রত্যাশকার আমি কী করে করি ? অনন্ত আয়ুঙ্কালেও তা  
 আমি পারব না শোধ করতে । সুতরাং তোমাদের স্বীয় সাধুকৃত্যই  
 তোমাদের কৃত সাধুকৃত্যের প্রত্যাশকার হোক ।

সেই গোপীভাব, রাধাভাব শ্রীচৈতন্যের । ‘অজ্ঞেব আপনে প্রভু  
 গোপীভাব ধরি । ব্রজেন্দ্রনন্দনে কহে প্রাণনাথ করি ॥’ আবার সেই  
 শ্রাম বংশীযুগ-গোপবিলাসীই গৌর, যিনি কখনো দ্বিজ, কখনো সন্ন্যাসী ।

এখন পশ্চিম দিকে চলেছেন মহাপ্রভু । আগে আগে কেশব  
 ভারতী, পিছনে গোবিন্দ, দুই পাশে নিত্যানন্দ মুকুন্দ আর গদাধর ।  
 ‘ভিক্ষুগীতা’ আবৃত্তি করতে-করতে চলেছেন ।



মালবদেশে ধনাঢ্য এক ব্রাহ্মণ ছিল। বাণিজ্য করে বিপুল ধন সঞ্চয় করেছিল, কিন্তু কৃপণ ছিল বলে অর্থ তার সুখের কারণ হইল না। আপন পরিজনকে ভো বটেই, নিজেকেও পর্যন্ত অর্থ সঞ্চয়ের লালসায় ভোগবঞ্চিত করে রাখত। তার পুত্র ছঃশীল, স্ত্রী-কন্যা বিষয়। কর্তব্যকর্মের অনাদরে সে পুণ্যভ্রষ্ট। দেবতারা তার প্রতি রুষ্ট হলেন। ফলে তার সমস্ত অর্থ ক্ষয় হয়ে গেল। তখন সন্তপ্ত ব্রাহ্মণ অনুতাপ করতে বসল। সেই অনুশোচনাই ভাগবতে 'ভিক্ষুগীতা' নামে আখ্যাত।

আমি বৃথাই আত্মাকে ক্লিষ্ট করেছি। আমার আত্মা না-ধর্মের নিমিত্ত না-কর্মের নিমিত্ত হল। বৃথা অর্থের নিমিত্তই এত কষ্ট স্বীকার করলাম। কুষ্ঠ যেমন বাহ্যিক রূপ নষ্ট করে, লোভ তেমনি সর্ব-যশোগুণনাশী হয়ে ওঠে। অর্থের উপার্জনে-উৎকর্ষে সক্ষয়ে-রক্ষণে ব্যয়ে-নাশে মানুষের আয়াস ও ত্রাস, চিন্তা ও ভ্রম জন্মায়। আর এই অর্থ থেকেই চৌর্ষ হিংসা মিথ্যা শঠতা কাম ক্রোধ গর্ব মোহ ভেদ বৈর অবিশ্বাস ও স্পর্ধা—যাবতীয় অনর্থের আবির্ভাব। সুতরাং যে মঙ্গলকে চায় সে অর্থ নামক অনর্থকে পরিত্যাগ করে।

কি জন, কি দেবতা, কি আত্মা, কি গ্রহ, কি কর্ম, কি কাল, কিছুই আমার ছঃখের কারণ নয়, মনই একমাত্র ছঃখের কারণ। মন দ্বারাই সংসারচক্র পরিবর্তিত হচ্ছে। মনের দমনই পরম যোগ। মনঃসংঘমই চিরসুখ ও চিরশান্তির মূল। যে মনকে বশে আনতে পারে সেই দেবদেব। মনঃপ্রসূত কর্ম আর সেই কর্মের ফলই আমরক ভোগ করছি।

নিজের দাত দিয়ে নিজের জিভ কামড়ালে কার প্রতি তুমি ক্রুদ্ধ হবে? কাকে তুমি দোষী করবে? তেমনি তুমি তোমার নিজের মনোযজ্ঞায় জর্জর হচ্ছে। সুতরাং কাকে তুমি দায়ী করবে? তোমার সুখ-ছঃখ-প্রদাতা আর কেউ নয়, তুমি নিজে।

ব্রাহ্মণের নির্বেদ উপস্থিত হল। স্থির করল, প্রাচীনতম মহর্ষি-

সপ্নের সেবিত পরমাশ্রমিতা আশ্রয় করে মুকুন্দের চরণ-সেবা স্বারাই  
হস্তর সংসারমাগর উত্তীর্ণ হব !

বিজসন্তম হৃদয়গ্রাহি ছিন্ন করল, মনঃসংযম করে ভিক্ষুত্রত নিয়ে  
পৃথিবী পর্যটন করতে লাগল। নষ্টখন গভঃম বৈরাগ্যাশ্রিত মুনি আর  
বিচলিত হল না।

কৃষ্ণ ভাই বললে উদ্ধবকে, তুমি সর্বপ্রথমে একাগ্রচিন্ত হয়ে  
আমার প্রতি বুদ্ধি সংগৃহ্য করে মনঃসংযম করো। আর যে এই  
ভিক্ষুগীতা শুনবে বা শোনাবে বা অনুধাবন করবে, সুখ-দুঃখের স্বন্দে  
সে আর অস্তিত্ব হবে না।

স্বধা ভৃক্ষা ক্লাস্তি অনিত্রা কিছুই মানছেন না গৌরান্স, বৃন্দাবনের  
ভাবে বিভোর হয়ে পথ চলেছেন। কোথায় পথ, কত দূরে বৃন্দাবন  
তা কে জানে। যে দিকেই যান না কেন নিত্যানন্দ সঙ্গ ছাড়ছে না।  
গোবিন্দ মুকুন্দ গদাধরও চলেছে পিছে পিছে।

গ্রামের লোকও এসে দলে জুটছে। প্রভু তাদের ঘরে ফিরে  
যেতে বলছেন। বলছেন, ঘরে গিয়ে সকলে হরিনাম করো।  
কৃষ্ণচন্দ্র সকলের ধন-প্রাণ হোক। যে রস শিব-সুকেরা আকাঙ্ক্ষা  
করে তোমাদের শরীরে সে রসের উদ্ভব হোক।

রাতে প্রবেশ করলেন গৌরহরি। কিন্তু কী আশ্চর্য, তিন দিন  
রাটেই ঘুরে বেড়ালেন, বৃন্দাবনের দিকে এক পা-ও এগোতে পারলেন  
না। ছক্ৰোশ যদি সামনে হাঁটেন, ছক্ৰোশ আবার পিছু হটেন।  
বললেন, বক্রেশ্বর য়াব। অথচ পৌঁছুতে পারলেন না বক্রেশ্বর।  
তিন দিন তিন রাত হাঁটছেন অবিজ্ঞাম অথচ এগোতে পারছেন না,  
নবদ্বীপের কাছাকাছিই আছেন। নবদ্বীপের লোকেরাই বুঝি তাঁকে  
টানছে, যেতে দিচ্ছে না।

ঐতিহ্যে আবদ্ধ করে রাখছে ভগবানকে।

দিক-বিদিকের জ্ঞান নেই, দিবা-রাত্রির জ্ঞান নেই, জ্ঞান নেই  
পথ-বিপথের। শুধু একমাত্র জ্ঞান হরিনাম। পশ্চিম মুখে গিয়ে

আবার পূর্বমুখ হচ্ছেন, পূর্বমুখ থেকে আবার পশ্চিমমুখ, কিন্তু, কই, কার মুখে তো কৃষ্ণ নাম শুনছি না। রাতে কোথায় ভক্তি, কোথায় কীর্তন, কোথায় প্রেমাবেশ !

‘প্রভু বোলে, হেন দেশে আইলাও কেনে।

‘কৃষ্ণ’ হেন নাম কারো না শুনি বদনে ॥

কেনে হেন দেশে মুঞি করিলুঁ প্রয়াণ।

না রাখিমু দেহ মুঞি ছাড়িঁ এই প্রাণ ॥’

মাঠে কতগুলি রাখাল ছেলে গরু চরাচ্ছিল, তারা হঠাৎ হরি-হরি বলে উঠল।

আচম্বিতে শিশুকণ্ঠে হরিনাম শুনে উৎফুল্ল হলেন গৌরহরি। ভাবলেন, তবে এরাই বুঝি সেই ব্রজের রাখাল। বৃন্দাবন তবে আর দূরে নয়।

গৌরহরি বালকগুলির মাথায় হাত রাখলেন। বললেন, ‘হরিনাম শুনিয়ে আমার বড় উপকার করলে। তোমরা খুব ভালো, দয়া করে আমার আরেকটা উপকার করবে?’

‘বলুন, কী উপকার?’

‘বৃন্দাবনের পথ আমাকে দেখিয়ে দেবে?’

অদূরে দাঁড়িয়ে নিত্যানন্দ বালকদের ইসারা করল যেন গঙ্গার দিকের পথ দেখিয়ে দেয়।

সরলস্বভাব বালকেরা তাই করলে। শাস্তিপুরের পথ দেখিয়ে দিল।

নামের আবেশে প্রভু চললেন শাস্তিপুরের দিকে।

ওরে আমার ব্রজের রাখাল বন্ধুরা, তোরা কোথায় পেলি এ হরিনাম? এ নাম তোদের কে শেখাল? আমি বৃন্দাবনে যাচ্ছিলাম, ছুটে এলাম তোদের নাম শুনে। আমি মরে ছিলাম, নাম শুনে প্রাণ পেলাম। আমার কান উপবাসী ছিল, রসায়নে জীবন পেল এতক্ষণে।

চন্দ্রশেখর এখনো সঙ্গ ছাড়েন নি বুঝি। নিত্যানন্দ তাকে বললে, 'তুমি শিগগির শান্তিপু্রে চলে যাও, অদ্বৈত আচার্যকে খবর দাও। অদ্বৈত যেন এ পারে নৌকো নিয়ে প্রস্তুত থাকে।'

চন্দ্রশেখর চলে যাচ্ছিল, তাকে আবার ডাকল নিত্যানন্দ। বললে, 'শোনো, তারপর তুমি নবদ্বীপে যাবে। খবর দেবে শচীমাতাকে।'

চন্দ্রশেখর চলে গেলে নিত্যানন্দ পিছন থেকে এসে প্রভুর সামনে দাঁড়াল। বললে, 'প্রভু, আমি নিত্যানন্দ।'

প্রেমাবেশে বাহ্যস্বৃতি নেই, গৌরহরি বুঝতেও পারেন নি নিত্যানন্দ তাঁর পিছনে-পিছনে আসছে।

চমক ভাঙল গৌরহরির। বললেন, 'শ্রীপাদ, তুমি কোথেকে আসছ ?'

নিত্যানন্দ বললে, 'আমিও যে তোমার সঙ্গে বৃন্দাবন চলেছি।'

'কোথায়, কোথায় আমার বৃন্দাবন ? আর কতদূর ?'

বৃন্দাবনের ভূমি চিন্তামণি দিয়ে তৈরি। চিন্তামণি কী ? চিন্তামণি একরকম বহুমূল্য পাথর, তার কাছে যা চাওয়া যায় তাই মেলে। 'ভূমিচিন্তামণিগণময়ী।' আর বৃন্দাবনের সমস্ত গাছই কল্পতরু। যদি চর্মচক্ষে দেখ, তোমার কাছে তা প্রাকৃত রূপেই প্রতিভাত হবে। তাকে সাধারণ মাটি সাধারণ গাছ বলেই চিনবে। কিন্তু যদি প্রেমনেত্রে তাকাও দেখবে এখানেই কৃষ্ণ গোপ-গোপীর সঙ্গে বিলাস করছেন, গো-পালন করছেন। বিরাজ করছেন গোবিন্দ রূপে।

বলো, আর কতদূর বৃন্দাবন ? আমাকে কি দর্শন দেবেন কৃষ্ণ ? আমি বৃন্দাবনে গিয়ে মাধুকরী করে খাব। জয় রাখে বলে রাধাকৃষ্ণের ধুলোয় গড়াগড়ি দেব। আমায় পথ দেখিয়ে নিয়ে চলো।

'এই তো এসে গেলাম বৃন্দাবন।'

'শ্রীপাদ, এই নদী কী ?'

'এই নদীই তো যমুনা।'

আবার পূর্বমুখ হচ্ছেন, পূর্বমুখ থেকে আবার পশ্চিমমুখ, কিন্তু, কই, কার মুখে তো কৃষ্ণ নাম শুনছি না। রাতে কোথায় স্তম্ভি, কোথায় কীর্তন, কোথায় প্রেমাবেশ !

‘প্রভু বোলে, হেন দেশে আইলাঙ কেনে।

‘কৃষ্ণ’ হেন নাম কারো না শুনি বদনে ॥

কেনে হেন দেশে মুঞি করিলুঁ প্রয়াণ।

না রাখিমু দেহ মুঞি ছাড়োঁ এই প্রাণ ॥’

মাঠে কতগুলি রাখাল ছেলে গরু চরাচ্ছিল, তারা হঠাৎ হরি-হরি বলে উঠল।

আচম্বিতে শিশুকণ্ঠে হরিনাম শুনে উৎফুল্ল হলেন গৌরহরি। ভাবলেন, তবে এরাই বৃষ্টি সেই ব্রজের রাখাল। বৃন্দাবন তবে আর দূরে নয়।

গৌরহরি বালকগুলির মাথায় হাত রাখলেন। বললেন, ‘হরিনাম শুনিয়া আমার বড় উপকার করলে। তোমরা খুব ভালো, দয়া করে আমার আরেকটা উপকার করবে?’

‘বলুন, কী উপকার?’

‘বৃন্দাবনের পথ আমাকে দেখিয়ে দেবে?’

অদূরে দাঁড়িয়ে নিত্যানন্দ বালকদের ইসারা করল যেন গঙ্গার দিকের পথ দেখিয়ে দেয়।

সরলস্বভাব বালকেরা তাই করলে। শাস্তিপুত্রের পথ দেখিয়ে দিল।

নামের আবেশে প্রভু চললেন শাস্তিপুত্রের দিকে।

ওরে আমার ব্রজের রাখাল বজুরা, তোরা কোথায় পেলি এ হরিনাম? এ নাম তোদের কে শেখাল? আমি বৃন্দাবনে যাচ্ছিলাম, ছুটে এলাম তোদের নাম শুনে। আমি মরে ছিলাম, নাম শুনে প্রাণ পেলাম। আমার কান উপবাসী ছিল, রসায়নে জীবন পেল এতক্ষণে।

চন্দ্রশেখর এখনো সজ্জা ছাড়েন নি বুঝি। নিত্যানন্দ তাকে বললে, 'তুমি শিগগির শান্তিপু্রে চলে যাও, অষ্টৈত আচার্যকে খবর দাও। অষ্টৈত যেন এ পারে নৌকো নিয়ে প্রস্তুত থাকে।'

চন্দ্রশেখর চলে যাচ্ছিল, তাকে আবার ডাকল নিত্যানন্দ। বললে, 'শোনো, তারপর তুমি নবদ্বীপে যাবে। খবর দেবে শচীমাতাকে।'

চন্দ্রশেখর চলে গেলে নিত্যানন্দ পিছন থেকে এসে প্রভুর সামনে দাঁড়াল। বললে, 'প্রভু, আমি নিত্যানন্দ।'

প্রেমাবেশে বাহুস্বৃতি নেই, গৌরহরি বুঝতেও পারেন নি নিত্যানন্দ তাঁর পিছনে-পিছনে আসছে।

চমক ভাঙল গৌরহরির। বললেন, 'শ্রীপাদ, তুমি কোথেকে আসছ ?'

নিত্যানন্দ বললে, 'আমিও যে তোমার সঙ্গে বৃন্দাবন চলেছি।'

'কোথায়, কোথায় আমার বৃন্দাবন ? আর কতদূর ?'

বৃন্দাবনের ভূমি চিন্তামণি দিয়ে তৈরি। চিন্তামণি কী ? চিন্তামণি একরকম বল্মুল্য পাথর, তার কাছে যা চাওয়া যায় তাই মেলে। 'ভূমিশ্চিন্তামণিগণময়ী।' আর বৃন্দাবনের সমস্ত গাছই কল্পতরু। যদি চর্মচক্ষে দেখ, তোমার কাছে তা প্রাকৃত রূপেই প্রতিভাত হবে। তাকে সাধারণ মাটি সাধারণ গাছ বলেই চিনবে। কিন্তু যদি প্রেমনেত্রে তাকাও দেখবে এখানেই কৃষ্ণ গোপ-গোপীর সঙ্গে বিলাস করছেন, গো-পালন করছেন। বিরাজ করছেন গোবিন্দ রূপে।

বলো, আর কতদূর বৃন্দাবন ? আমাকে কি দর্শন দেবেন কৃষ্ণ ? আমি বৃন্দাবনে গিয়ে মাধুকরী করে খাব। জয় রাধে বলে রাধাকুণ্ডের ধুলোয় গড়াগড়ি দেব। আমায় পথ দেখিয়ে নিয়ে চলো।

'এই তো এসে গেলাম বৃন্দাবন।'

'শ্রীপাদ, এই নদী কী ?'

'এই নদীই তো যমুনা।'

গঙ্গায় যমুনা-স্জ্ঞান হল গৌরহরির। যমুনার স্তব করতে লাগলেন।

নির্বিশেষ ব্রহ্ম তোমার অঙ্গকাস্তি, তুমি নন্দ-মন্দন কৃষ্ণের পর-  
প্রেমপাত্রী, তুমি ব্রব্রহ্মগাত্রী, সর্বপাপবিনাশিনী, জগৎকল্যাণ-  
কারিণী, তুমি সূর্যকন্যা, তুমি আমাদের দেহ পবিত্র করে। তোমাকে  
নমস্কার করি।

‘অহো ভাগ্য, যমুনার দর্শন পেলাম।’ বলে যমুনায় ঝাঁপ দিলেন  
মহাপ্রভু।

একখানি কোঁপীন মাত্র পরিধানে, প্রভু স্নানান্তে তীরে উঠে সিন্ধু  
গাত্রে দাঁড়িয়ে রইলেন। পরিধানের দ্বিতীয় বস্ত্র নেই। তবে এখন  
উপায় কী!

নৌকায় করে অদ্বৈত ততক্ষণ পৌঁছে গেছে এপারে। সে নতুন  
কোঁপীন ও বহির্বাস নিয়ে এসেছে।

অদ্বৈতকে দেখে প্রভুর বাহুস্বয়ং ফুটে উঠতে চাইল। ‘এ কী,  
অদ্বৈত আচার্যকে দেখছি না?’ প্রভু এগোলেন ছ’-পা। ‘হ্যাঁ, অদ্বৈতই  
তো। তুমি বৃন্দাবনে কী করে এলে? আমি বৃন্দাবনে আছি এ  
তুমি কী করে জানলে?’

অদ্বৈত বললে, ‘যেখানে তুমি সেখানেই বৃন্দাবন।’

যেখানে কৃষ্ণ সেখানেই তাঁর নিজ-ধাম।

‘এ’ আমি তবে কোথায় এলাম?’ প্রভু তাকাতে লাগলেন চার  
দিক।

‘আমার পরম ভাগ্য।’ বললে অদ্বৈত, ‘তুমি গঙ্গাতীরে  
এসেছ।’

এই সেই সকলকলুষভঙ্গা জাহ্নবী। শঙ্করমৌলিবিহারিণী নরক-  
নিবারিণী অলকানন্দা।

‘এ কী, নিত্যানন্দ আমাকে ঠকিয়ে গঙ্গাতীরে নিয়ে এসেছে।’  
প্রভুর বাহু সন্ধিং ফিরে এল।

‘প্রভু কহে—নিত্যানন্দ আমারে বঞ্চিলা ।

গঙ্গায় আনিয়া মোরে যমুনা কহিলা ॥’

আচার্য বললে, ‘নিত্যানন্দের কথা মিথ্যা নয় । তুমি এখন যমুনাতেই স্নান করলে ।’

প্রয়াগে গঙ্গার সঙ্গে যমুনার মিলন হয়েছে, পশ্চিমে যমুনা, পূবে গঙ্গা । যমুনাধারার সঙ্গে মিশে গিয়েছে গঙ্গাধারা । আর তুমিও গঙ্গার পশ্চিমেই স্নান করলে । সুতরাং এই গঙ্গাস্নানই তোমার যমুনাস্নান ।

নিত্যানন্দের প্রতি অভিমান প্রকাশ করলেন গৌরহরি । ‘তুমি আমাকে ভুলিয়ে নিয়ে এলে । তুমি জাহ্নবীকে দেখিয়ে বললে ঐ যমুনা । মধুবনচারিণী কলিন্দনন্দিনী । তুমি ভাই হয়ে এ কী করলে ? আমাকে ব্রজে যেতে দিলে না । আমার খেলার সাথিরা সব সেখানে চলে গিয়েছে, শুধু আমারই যাওয়া হল না । আমি কার জন্তে তবে সন্ন্যাসী হলাম । যার জন্তে সন্ন্যাসী হলাম তাকে আর তবে পেলাম কই ?’

অধৈত বললে, ‘নিতাই তোমাকে ভোলায় তার সাধ্য কী ! তুমি কত বড় ভক্তবৎসল তাই সে প্রমাণ করল ।’

‘সে প্রমাণ করল আমি তার হাতের পুতুল । সে নাচালেই আমি নাচি ।’

‘যারা তোমার নিজ জন তাদের তুমি করুণা করবে না ?’ প্রকাশ্যে এগিয়ে এল নিতাই । ‘জীবে করুণা করতে উদয় হলে অথচ তোমার নিজ জন তা পাবে না আশ্বাদ করতে ?’

‘প্রভু, আমাদের প্রতি সদয় হও ।’ মিনতিভরা স্বরে বললে অধৈত, ‘শুক বাস পরিধান করে । আমার নৌকোয় ওঠো । তিন দিন তুমি উপবাসে আছ । আমার ঘরে গিয়ে ভিক্ষে নাও । প্রাণটুকু রাখো শরীরে ।’

গৌরহরি তখন শুক বাস পরিধান করে নৌকোয় গিয়ে উঠলেন ।



শাস্তিপুত্রের ঘাটে নৌকো এসে লাগল।

নিতাই বললে, 'তাড়াতাড়ি এগিয়ে চলো। ভগবানের আকর্ষণে এত লোক এসে জুটেবে ভিড় সামলাতে পারবে না।' ঘরে এসে পৌঁছলে আবার বললে, 'দরজায় দ্বারী বসাও, নইলে ভক্তের চাপে তোমার বাড়ি-ঘর চূর্ণ হয়ে যাবে।'

অদ্বৈত-গৃহিণী সীতা দেবী ভোগ সাজালেন। ভোগ তিন জনের জগ্গে, তিন পাত্রে। কৃষ্ণের জগ্গে ধাতু-পাত্রে আর নিমাই ও নিতাইয়ের জগ্গে দুই কলা-পাতায়।

অনেক রকম ব্যঞ্জন রেঁধেছেন সীতা দেবী। পিঠে পায়ের দধি ক্ষীর—কী নয়! অন্ন-ব্যঞ্জনের উপর তুলসী-মঞ্জরী রাখল। সুবাসিত জল ভরল তিন পাত্রে। তিন শুভ্রপীঠ স্থাপন করল। প্রথমে কৃষ্ণকে ভোগ দিল। আরতি করল। আরতির সময় দাঁড়াল এসে নিমাই-নিতাই। নির্নিমেষে দেখল আরতি। আরতি-অস্তে শয়ন দিল কৃষ্ণকে।

প্রভু বললেন, 'মুকুন্দ কই? হরিদাস কই? ওদের ডাকো।'

মুকুন্দ কাছে এল। বললে, 'আমার নিত্যকৃত্য এখনো কিছু করা হয়নি। আমি পরে প্রসাদ নেব।'

হরিদাসও সামনে এসে দাঁড়াল। বললে, 'আমি অধম পাপিষ্ঠ, আমি বাইরে বসে এক মুঠ খেয়ে নেব।'

নিমাই-নিতাই অস্তঃপুরে গেল। কৃষ্ণভোগের পরিমাণ ও বৈচিত্র্য দেখে আনন্দিত গৌরহরি, নিজে খাবেন বলে নয়। বললেন, 'এমন করে যে কৃষ্ণকে খাওয়ায় আমি তার পদবন্দনা করি।' 'এঁছে অন্ন যে কৃষ্ণেরে করায় ভোজন। জগ্গে জগ্গে শিরে ধরোঁ তাহার চরণ ॥' অদ্বৈতকে বললেন, 'তুমিও বসে পড়ো, তিন জনে খাই।'

অদ্বৈত বললে, 'না, আমি পরিবেশন করব।'

হাতে ধরে নিমাই-নিতাইকে দুই শুভ্র পীঠে—শাদা কাপড় দিয়ে মোড়া কাঠের পিঁড়িতে বসিয়ে দিল।

প্রভু বললেন, 'অন্ন-অন্ন দাও । এত সব উৎকৃষ্ট উপকরণ সন্ন্যাসীর  
উপকার্য নয় । এত সব সুস্বাদু দ্রব্য খেলে ইন্দ্রিয়দমন হবে কী করে ?'

'প্রভু কহে—সন্ন্যাসীর উপকার্য নহে উপকরণ ।

ইহা খাইলে কৈছে হয় ইন্দ্রিয়বারণ ॥'

আচার্য বললে, 'তোমার চাতুরী রাখো । তোমার আসল কথা  
আমি সব টের পেয়েছি ।' 'আচার্য কহেন—ছাড় তুমি আপনার  
চুরি । আমি সব জানি তোমার সন্ন্যাসের ভারিভুরি ॥'

ভগবানের আবার সন্ন্যাসের প্রয়োজন কী ? যিনি মায়াদীশ  
ভাঁর কি আবার সংসারবন্ধন আছে ? ভাঁর আবার কিসের ইন্দ্রিয়-  
সংযম ? নিন্দুক ও তর্কিকদের উদ্ধারের জন্তেই তিনি সন্ন্যাসবেশ  
ধরেছেন । হয়তো বা আত্মগোপনের চেষ্টায় । নইলে যিনি নিজের  
সাধন-উদ্দেশ্যের লক্ষ্য তিনিই কিনা সাধারণ সাধক সন্ন্যাসী সেকেছেন ।  
এ মীলার তাৎপর্য বুঝতে অদ্বৈতের আর বাকি নেই !

অদ্বৈত বললে, 'ও সব বচনচাতুরী ছাড়ো । সামান্য জিনিস,  
খেলে কিছু দোষ হবে না ।'

'এত খাব কী করে ?' তবু আপত্তি করলেন প্রভু ।

'যা পারবে না পাতে থাকবে !'

'উচ্ছিষ্ট রাখা সন্ন্যাসীর ধর্ম নয় ।'

'রাখো । নীলাচলে যে চুয়াল বার ভোগ খাও । সেখানে  
তোমার এক গ্রাম এখানকার তিনজনের আহাৰ্য । রাখো, চাতুরী  
ছাড়ো, হাত লাগাও ।' অদ্বৈত দুই অতিথির হাতে জল ঢেলে  
দিল ।

নিত্যানন্দ অল্প সুর ধরল । বললে, 'তিন দিন উপবাসের পর  
ভেবেছিলাম পেট পুরে খেতে পাব । এখন যা আয়োজন দেখছি  
ভাতে মনে হচ্ছে পেটের আক্কেলও ভরবে না ।'

অদ্বৈত বললে, 'তুমি তো তীর্থবাসী সন্ন্যাসী, সকল সময়ে  
আহারও জ্বাটে না । তোমার আবার পেট ভরবে কী ! তুমি তো

ফলমূল খেয়ে থাকে। দরিদ্র ব্রাহ্মণের ঘরে যা এক মুঠো ভাত পেয়েছ তাই খাও তৃপ্তি করে। লোভ করা ভালো নয়।’

‘বা, বেশ বলেছ।’ পরিহাস করল নিমাই। ‘নিমন্ত্রণ করে এনে বলছ, এক মুঠো খাও। মোটেই তা চলবে না। যত চাই তত দিতে হবে। পেট ভরতে হবে।’

‘তুমি তো এক ভ্রষ্ট অবধূত।’ ক্রুদ্ধ হল অদ্বৈত, ‘তুমি বৃষ্টি সন্ন্যাস করেছ গৃহস্থকে দণ্ড দিতে। তুমি যেমন ঔদরিক, তুমি একাই দশ-বিশ মণ ভাত সাবাড় করতে পারো, আমি গরিব ব্রাহ্মণ, আমি অত পাব কোথায়? যা পেয়েছ তাই খেয়ে তৃপ্ত হও। আর দয়া করো, উচ্ছিষ্ট ছড়িয়ে না।’

নানা যত্ন-দৈন্যে খাওয়ারতে লাগল অদ্বৈত। বললে, ‘যা দিয়েছি কিছু ফেলতে পারবে না।’

আচার্যের ইচ্ছা পূর্ণ করলেন প্রভু। কিন্তু নিতাই বললে, ‘আমার পেট ভরল না। যা সামান্য দিয়েছ তা নিয়ে যাও ফিরিয়ে।’ বলে এক গ্রাস ভাত নিয়ে অদ্বৈতের গায়ে ছুঁড়ে মারল।

আশ্চর্য, অদ্বৈত আচার্য নাচতে লাগল। বললে, ‘অবধূতের উচ্ছিষ্ট আমার গায়ে লাগল, আমি পবিত্র হলাম।’

নিত্যানন্দ বললে, ‘তুমি একে উচ্ছিষ্ট বলে কোন্ হিসেবে? এ তো কৃষ্ণের প্রসাদ। কৃষ্ণের প্রসাদকে উচ্ছিষ্ট বলে তুমি অপরাধী হলে। আমার মত এক-শো সন্ন্যাসীকে পেট পুরে খাওয়ালেই তবে এ অপরাধের খণ্ডন হবে।’

‘আবার সন্ন্যাসীকে খাওয়াব? রক্ষ করো। সন্ন্যাসীর সঙ্গ করে আমার ধর্ম-কর্ম সব গেল। আর নয়।’

হাসতে লাগল নিতাই। হাসতে লাগল নিমাই।

তারপর ছুঁজনে আচমন করল। তুলসীমঞ্জরীসহ লবঙ্গ এলাচি কবাবচিনি মুখশুদ্ধি দিল অদ্বৈত। এবার তবে শয়ন করো।

প্রভুকে শয্যায় আনা হল। অদ্বৈত প্রভুর গায়ে চন্দন মেখে

দিল। বুকের উপর হুলিয়ে দিল কুলমালা। ভারতের পলকলে বঁকে  
চাইল পা টিপে দিতে।

সঙ্কটিত হলেন প্রভু। বললেন, 'না, এবার ছাড়ো। অনেক  
বাড়িরেছ আমাকে, আর নাচে কাজ নেই। এখন মুকুন্দ হরিদাসকে  
নিরে খেতে বোস।'

কতক্ষণ পরেই দলে-দলে লোক আসতে লাগল। এ কী দেখছি-  
চোখ বেলে। এখন চমৎকার সৌন্দর্য তো আর দেখিনি।

'গৌর মেহকান্তি—সূর্য জিনিয়া উজ্জল।

অরুণ বস্ত্রকান্তি তাতে করে ঝলমল ॥'

লোক-সমাগমে অষ্টভূতপুরী তাঁরোরও অধিক হয়ে উঠল। সন্ধ্যায়  
কীর্তন ধরল আচার্য।

'কি কহব রে সখি! আনন্দ ওর।

চিরদিন মাধব মন্দিরে মোর।

আর হাম প্রিয় দূরদেশে না পাঠাও।

আঁচল ভরিয়া যদি ধন পাও ॥'

আঁচল ভরে যখন টাকা পেয়েছি তখন কী কারণে কিসের  
উপার্জনে প্রিয়কে পাঠাব দূর দেশে! আমার প্রিয়তমের চেয়ে কি  
টাকা প্রিয়তর?



মান গাইছে আর নাচছে অষ্টভূত। ভাবাবেশে প্রভু বাহুশুভিহীন।  
সেই সাহসে অষ্টভূত বারে বারে তাঁর পা স্পর্শ করছে। আর বলছে,  
'এত দিন এই দীর্ঘ চকিবশ বছর সবাইকে ঝাঁকি দিয়ে আত্মগোপন

করে ছিলে, এবার তোমাকে আমার ঘরের মধ্যে পেরেছি, এবার  
বেঁধে রাখব আট্টেপিটে ।’

যত গান শুনছেন তত কৃষ্ণসঙ্গের জন্মে ব্যাকুল হচ্ছেন প্রভু, ততই  
বাড়ছে বিরহকষ্ট। শেষ পর্যন্ত পড়লেন ভূতলে। তখন অহৈতু তার  
নাচ বন্ধ করল। কিন্তু মুকুন্দ জানে প্রভুর অন্তরের ভাব কী। সেই  
অনুসারে সে গান ধরল :

‘হাহা প্রাণ প্রিয়সখি কি না হৈল মোরে ।

কানুপ্রেমবিষে মোর তনু-মন জরে ॥

রাত্রি-দিনে পোড়ে মন, সোয়াস্তি না পাও ।

যাঁহা গেলে কানু পাও তাঁহাঁ উড়ি যাও ॥’

কিন্তু ফল কী হল ? প্রভুর চিন্ত বিদীর্ণ হল। দেখা দিল বহু  
বিচিত্র ভাব। নির্বেদ আর বিষাদ, অমর্ষ আর চাপল্য, গর্ব আর  
দীনতা। ভাবের প্রহারে জর্জর প্রভু আবার লুটিয়ে পড়লেন মাটিতে।  
শরীরে খাস নেই।

নির্বেদ কী ? হুঃখে, বিরহে ও ঈর্ষায় নিজের প্রতি যে অবমাননা-  
জ্ঞান, তাই নির্বেদ। বিষাদ কী ? ইষ্টবস্তুর অপ্ৰাপ্তি, প্রারম্ভ কার্যের  
অসিদ্ধি, বিপত্তি বা অপরাধ থেকে যে অনুতাপ, তাই বিষাদ। অমর্ষ  
কী ? তিরস্কার বা অপমানের ফলে যে অসহিষ্ণুতা, তার নাম  
অমর্ষ। আর চাপল্য ? রাগহেষের ফলে চিন্তের লঘুতা বা গাঙ্গীর্ষ-  
হীনতার নাম চাপল্য। গর্ব কী ? সৌভাগ্য, রূপ, যৌবন, গুণ বা  
ইষ্টলাভহেতু অগ্নের প্রতি যে অবজ্ঞা, তাই গর্ব। আর দৈন্ত্য কাকে  
বলে ? হুঃখে ও ত্রাসে বা অপরাধীবোধে নিজেকে নিকৃষ্ট মনে  
করাই দৈন্ত্য।

প্রভুর এ অবস্থা দেখে সবাই চিন্তিত হয়ে পড়ল।

আচম্বিতে প্রভু হঠাৎ গর্জন করে উঠলেন : বলো, বলো, আরো  
বলো। যেখানে গেলে কৃষ্ণকে পাওয়া যায়, সেখানে উড়ে যাব  
পাখা মেলে। কোথায় কৃষ্ণ !

‘সুমন ঘোর প্রার্থের ব্যঙ্গব ।

মাহি কৃষ্ণপ্রেমধন দরিদ্র ঘোর জীবন,

দেহেশ্রিয় বৃথা মোর সম ॥’

দরিদ্র যেমন ধনের অভাবে তার পরিবারের লোকদের ক্ষুধা-  
শোষণ করতে পারে না, আমারও তেমনি প্রেমের অভাবে আমার  
দেহ, আমার ইন্দ্রিয় রইল নিষ্ফল অনশনে । যদি তাদের দিয়ে  
কৃষ্ণসেবাই করতে না পারি তাহলে তারা তো নিরর্থক । আর প্রেম  
বিনা শুধু দেহে শুধু ইন্দ্রিয়ে কৃষ্ণসেবা হয় কী করে ?

আবার প্রবল ভাবভঙ্গ উপস্থিত হল । কখনো হর্ষে কখনো  
বিষাদে উদ্ভণ্ড নাচতে লাগলেন প্রভু । তিন দিন উপোসের পর আজ  
প্রথম আহার করেছেন, তারপর এই দীর্ঘ নৃত্য, প্রভু ক্লাস্ত হয়ে  
পড়লেন । কিন্তু প্রেমাবেশে ক্লাস্তির অমৃতভব কোথায় ? নিত্যানন্দ  
ধর্ম রইল নিমাইকে আর অর্ধেক তাকে শয্যায় নিয়ে গিয়ে শুইয়ে  
দিল ।

কতক্ষণ পরে নিতাই জিগগেস করল নিমাইকে : ‘একবার  
নবদ্বীপ যাব ?’

‘কেন ?’ চোখ তুলে তাকালেন গৌরহরি ।

‘মা এখনো বেঁচে আছেন কিনা একবার খোঁজ নিয়ে আসি ।’  
নিতাই বললে, ‘আমরা তো আজ মুখে অন্নজল দিলাম, কিন্তু মা  
বোধ হয় এখনো কিছু খাননি । তোমার শ্রীবাস মুরারিও হয়তো  
উপবাসে আছে ।’

‘যাও, দেখে এস ।’

‘যদি তারা কেউ আসতে চায়, নিয়ে আসব সঙ্গে করে ?’

‘যে-যে আসতে চায় নিয়ে এস ।’

‘হ্যাঁ, জানি, শুধু মা আসবেন । বিষ্ণুপ্রিয়া আসবে না । সে  
চাইবেই না আসতে ।’

সে শুধু আমার পাছকা নিয়ে জীবনযাপন করবে । তার সর্বাঙ্গ

সে প্রভুকে অর্পণ করেছে, এই অল প্রভুর বস্তু, সুকরাং একে পালন-  
পোষণ করতে হবে। বিষ্ণুপ্রিয়াই তো আমার অনশায়িনী স্ত্রী,  
মহুগ্ননাট্যে ভক্তিশ্বরূপা। ও কেন বিচলিত হবে? ওর তো নিজের  
সুখের জন্মে আকিঞ্চন নেই। ও বিগুহ প্রেমোন্মাদ। পৌরশূত্র  
গৌরগৃহের মহা-গম্ভীরা-মন্দিরে ও মূর্তিমতী নীরবতা।

পরদিন সকালে দোলায় চড়ে এলেন শচীমাতা। সঙ্গে চন্দ্রশেখর  
স্বাচার্য।

না, বিষ্ণুপ্রিয়া আসেনি। সে আসবে কেন? সে যে সর্বভ্যাগিনী  
পরভক্তি। তার হৃৎখেই সে যে আমার শিক্ষাকে মহনীর করতে  
এসেছে।

বিষ্ণুপ্রিয়ার প্রাণ গৌরাক। গৌরাকের প্রাণ বিষ্ণুপ্রিয়া। স্থানে-  
কালে ব্যবধান নেই। সর্বাঙ্গ অবিচ্ছেদ।

বিষ্ণুপ্রিয়া পূর্ণশক্তি। সেই সর্বশক্তি-গরীয়সীর প্রাণবল্লভ বলেই  
গৌরহরি পূর্ণশক্তিমান।

আঙিনায় দোলা থেকে নামলেন শচীমাতা। আর তক্ষুনি প্রভু  
ছুটে এসে মার চরণে দণ্ডবৎ হলেন।

এ কি, সন্ন্যাসী হয়ে মাকে প্রণাম করল? সন্ন্যাসীর তো সন্ন্যাসী  
ছাড়া আর কাউকে প্রণাম করা বারণ। তবে নিমাই ও করল কী?

মার সামনে কোনো নিয়মকানুন নেই। পুত্র সন্ন্যাসী হলেও  
মা—মা।

শচীদেবী নিমাইকে কোলে তুলে নিলেন। কাঁদতে লাগলেন  
অথোরে। মাথার চুল নেই দেখে বিহ্বল হয়ে পড়লেন। বাৎসল্যভরে  
নিমাইয়ের গা মুছে দিলেন, মুখে চুমু খেলেন, একদৃষ্টে চেয়ে থাকতে  
থাকতে কিছুই আর দেখতে পেলেন না, হৃৎচোখ যে অক্ষতে ভরে  
উঠেছে।

‘শচী আগে পড়িলা প্রভু দণ্ডবৎ হৈয়া।

কান্ডিতে লাগিলা শচী কোলে উঠাইয়া ॥

দৌহার দর্শনে দৌছে হইলা বিহ্বল ।  
 কেশ না দেখিয়া শচী হইলা বিকল ॥  
 অঙ্গ মোছে, মুখ চুপে, করে নিরীক্ষণ ।  
 দেখিতে না পায়—অশ্রু ভরিল নয়ন ॥’

শচী দেবী বললেন, ‘নিমাই, বাবা, বিশ্বরূপের মত নিষ্ঠুর হয়ে  
 না। স্নেহসী হয়ে আর সে আমায় দর্শন দিল না। তুমিও যদি  
 ভেমনি করো, আমাকে আর দেখা না দাও, তা হলে আমি বাঁচব না  
 কিছুতেই।’

‘মা গো, শোনো,’ গৌরহরি বললেন, ‘এই শরীর দেখছ, এ তো  
 তোমারই। তোমার থেকেই এর জন্ম, তোমার হাতেই এর লালন-  
 পালন। কোটি জন্মেও ঋণ শোধ করতে পারব না। সন্ন্যাস নিলে  
 কী হবে, তোমার প্রতি উদাসীন থাকব না। যেখানে থাকতে বলো  
 সেখানেই বসবাস করব, তোমার কথার অগ্রথা করব না।’

‘জানি বা না কৈল যতপি সন্ন্যাস ।  
 তথাপি তোমারে কভু নহিব উদাস ॥  
 তুমি বাঁহা কহ আমি তাঁহাই রহিব ।  
 তুমি যেই আজ্ঞা দেহ, সেই তো করিব ॥’

দলে দলে লোক এসেছে নবদ্বীপ থেকে, তাদের প্রাণধন নিমাইকে  
 দেখতে। এসেছে শ্রীবাস, এসেছে রামাই, এসেছে বিত্তানিধি। কে  
 নয়? এসেছে গঙ্গাদাস, বক্রেশ্বর, গুক্রাস্বর, ঘুরারি। নন্দন আচার্য,  
 বুদ্ধিমন্ত খান, দামোদর, বাসুদেব। শ্রীধর, বিজয়, সঞ্জয়, মুকুন্দ।  
 কত আর নাম করব? সে এক বিপুল সমাবেশ।

আহা, নিমাইয়ের মাথায় চুল নেই, কিন্তু দেখ দেখ কী অপার  
 সুন্দর! এত রূপ কি মানুষের হয়, না, আর কারো? ‘কেশ না  
 দেখিয়া ভক্ত যতপি পায় দুখ। সৌন্দর্য দেখিতে তবু পায় মহাসুখ ॥’  
 সত্যি, এ কী আনন্দসাগর! এ সাগরের তল নেই, পার নেই, অস্ত  
 নেই কোনোখানে।



কিন্তু এ কী বলল শচীমাতাকে ? বলল, মা এখানে থাকতে বলবেন সেখানেই সে বাস করবে। তা হলে সীমার্জা থাকে নবদ্বীপেই থাকতে বলুন না কেন ? নিমাই সর্বক্ষণ থাকবে আমাদের চোখের উপর।

কিন্তু শচীমাতা কি তাই বলবেন ? যদি নবদ্বীপে থাকলে সন্ন্যাসী নিমাইয়ের নিন্দে হয় ? মা হয়ে ছেলের নিন্দে সইব কী করে ?

শুনি না নিমাই কী বলে ?

ভক্তদের একত্র করে শ্রদ্ধা বললেন, 'তোমাদের না জানিয়েই যাচ্ছিলাম বৃন্দাবন, কিন্তু যাওয়া হল না, বিশ্ব আমাকে কিরিয়ে আনল। আমি সন্ন্যাস নিলে হবে কী, তোমাদের আমি ছাড়ব না, ছাড়ব না মাকে। কিন্তু বলো, যাই কোথা, থাকি কোথা ? নিজ জন্মস্থানে আত্মীয়দের নিয়ে থাকা তো সন্ন্যাসীর ধর্ম নয়।'

'তোমা সভা না ছাড়িব—যাবৎ আমি জীবো।

মাতারে তাবৎ আমি ছাড়িতে নারিব ॥

সন্ন্যাসীর ধর্ম নহে সন্ন্যাস করিয়া।

নিজ জন্মস্থানে রহে কুটুম্ব লইয়া।'

ভক্তদের মুখ শুকিয়ে গেল। এখন শচীমাতা কী বলবেন ?

শচীমাতা বললেন, 'ও যদি এখানে থাকে তা হলে তো আমার সুখের অন্ত নেই, কিন্তু এখানে থাকলে যদি ওর ধর্মচ্যুতি হয়, লোকে যদি ওকে নিন্দে করে, তা হলে আমার তা সহ হবে না।'

তবে উপায় ?

'এমন উপায় করো, যাতে তুই ধর্মই বজায় থাকে।' বললেন গৌরহরি, 'আমার জন্মস্থানেও থাকা হয় না, তোমাদেরও ত্যাগ করতে হয় না।'

সে উপায়ও শচীমাতাই বলে দিলেন।

বলে দিলেন, 'নীলাচলে গিয়ে থাকো।'

নীলাচলে ? সকলে অবাক হয়ে তাকিয়ে রইল শচীমাতার দিকে।

‘হ্যাঁ, নীলাচলে থাকলেই সমস্তার সমাধান হয়।’ বললেন শচীমাতা, ‘নিমাইকে জন্মস্থানেও থাকতে হয় না আর আমরাও তার সংবাদ পেতে পারি। তোমরাও তার কাছে যেতে পারো নীলাচলে, আর নিমাইও নবদ্বীপে আসতে পারে গঙ্গাস্থানে।’ ‘নীলাচলে নবদ্বীপে যেন ছুই হয়। লোক-গভাগতি বার্জা পাব নিরন্তর।’

এমন না না হলে কি এমন পুত্র হয় ?

‘নিজের হৃৎক গণনার মধ্যেও আনি না’, বললেন শচীমাতা, ‘যাতে আমার নিমাইয়ের সুখ, তাইতেই আমার একমাত্র আনন্দ।’ ‘আপনার সুখহৃৎক তাহা নাহি গণি। তাঁর যেই সুখ সেই নিজসুখ মানি।’

সকলে ধস্ত ধস্ত করে উঠল।

মায়ের কথাই বেদ-আজ্ঞা, সানন্দে মেনে নিলেন মহাপ্রভু।  
যাব নীলাচলে। থাকব নীলাচলে।

‘তোমরা এবার তবে বাড়ি ফিরে যাও।’ নবদ্বীপবাসীদের সকলকে সম্মান করে বললেন মহাপ্রভু, ‘বাড়ি গিয়ে কৃষ্ণসঙ্কীৰ্তন করো। আমি নীলাচলে যাই। সকলকে বলে যাচ্ছি, মাঝে মাঝে তোমাদের মধ্যে ফিরে আসব, দেখা দিয়ে যাব।’

‘ঘর যাওয়া কর সদা কৃষ্ণসঙ্কীৰ্তন।

কৃষ্ণনাম কৃষ্ণকথা কৃষ্ণ-আরাধন ॥

আজ্ঞা দেহ নীলাচলে করিয়ে গমন।

মধ্যে মধ্যে আমি তোমায় দিব দরশন ॥’

হরিদাস এসে কেঁদে পড়ল। বললে, ‘তুমি শ্রীকৃষ্ণে গেলে আমার কী গতি হবে ? আমার জে সেখানে যাবার অধিকার নেই। আমি যে যবন, আমি যে অস্পৃশ্য। তোমাকে না দেখে আমার এ পাপিষ্ঠ জীবন বাঁচবে কি করে ?’

প্রভু বললেন, ‘হরিদাস, তোমার দৈন্ত সংবরণ করো। তোমার দৈন্ত দেখলে অস্থির হয়ে পড়ি। তোমার ভয় নেই, তোমার কথা

জগন্নাথের চরণে নিবেদন করব, তাঁর কৃপায় তোমাকে নিয়ে বাব  
শ্রীক্ষেত্রে ।’

কে এই জগন্নাথ ? এই জগতের নাথ ?

যিনি ভিতরে কৃষ্ণবর্ণ, বাইরে গৌরবর্ণ, যিনি তাঁর সাজোপাঙ্গদের  
দিয়ে নিজের বৈভব প্রকাশ করেছেন, সেই শ্রীকৃষ্ণচৈতন্যকে সঙ্কীর্ণ-  
রূপ অর্চনায় আমরা আশ্রয় করেছি। রাধিকার গৌরবাস্তি অঙ্গীকার  
করেছেন বলেই তিনি গৌর। সুবর্ণবর্ণ, হেমাঙ্গ।

উপপুরাণে ব্যাসকে বলছেন শ্রীকৃষ্ণ, ‘কোনো কলিযুগে  
সন্ন্যাসাশ্রম আশ্রয় করে আমি পাপহত মানুষদের হরিভক্তি শিখিয়ে  
ধাকি ।’

সকল কলিতে নয়, কোনো এক কলিতে। যে ছাপরে শ্রীকৃষ্ণ ব্রজ-  
লীলা প্রকটিত করেন, সন্দেহ কী, তারই অব্যবহিত পরবর্তী কলিতে।

তা হলে শাস্ত্রেই বলা আছে শ্রীকৃষ্ণ শ্রীচৈতন্যরূপে অবতীর্ণ।  
ভগবান ছাড়া কার এত বিভূতি গোচরীভূত হয় ? কোন মানুষকে  
সম্ভব এত প্রেমবিকার ? কার সাধ্য বহু পশু-পাখিকে প্রেমদানে  
বলীভূত করবে ? সন্দেহ কী, চৈতন্যই পরতত্ত্বের সীমা, অর্থাৎ  
সর্বশ্রেষ্ঠ তত্ত্ব। আর লীলাবস আশ্বাদনের ভিত্তিই তত্ত্বজ্ঞান বা  
সিদ্ধাস্ত। তর্কে নয় সিদ্ধাস্তেই জাগবে সূদৃঢ় নিষ্ঠা। ‘চৈতন্য-  
গোসাঞিই এই তত্ত্ব নিকপণ। স্বয়ং ভগবান কৃষ্ণ ব্রজেন্দ্রনন্দন ॥’

অদ্বৈত বললে, ‘তুমি এখনি যেও না। দিন ছ চার থাকো কৃপা  
করে ।’

দশ দিন থাকলেন মহাপ্রভু।

শটীমাতা বললেন, ‘এ কদিন আমি রান্না করব। রান্না করে  
খাওয়াব আমার নিমাইকে। আর সকলে অশ্রদ্ধ কত তো দেখতে  
পাবে নিমাইকে, কিন্তু আমি আর কোথায় তার দর্শন পাব ?’

না, না, তুমিই রান্না করে খাওয়াবে বৈকি। তুমি থাকতে আর  
কার হাতে খাব ? আর কার ব্যঞ্জন সূস্বাদু লাগবে ?

কিন্তু কি নিমাইয়ের অঙ্গে রাসা ? বহুতর ভক্তই প্রসাদপ্রত্যাশী ।

তা হোক, প্রভুর কৃপায় অষ্টোত্তর তি অপ্রতুল আছে ? তার ভাণ্ডার অক্ষয়-অব্যয় । যতই ব্যয় করো ততই আবার তা পূর্ণ হয়ে ওঠে । কোথেকে আসে, কে জোড়ায়, তা কে বলবে !

‘আনন্দিত হইয়া শচী করেন রত্নন ।

সুখে ভোজন করে প্রভু লঞা ভক্তগণ ॥

আচার্যের আছা-ভক্তি গৃহ সম্পদ ধনে ।

সকল সফল হৈল প্রভু-আরাধনে ॥’

ভোজনতৃপ্ত পুত্রমুখ দেখে শচীর গভীর আনন্দ ।

দিনে ভক্তদের নিয়ে কৃষ্ণকথা, আর রাত্রে নর্তন-কীর্তন—এ চলছে নিয়মিত । কৃষ্ণকথায় কেমন শাস্ত নিমাই, কিন্তু নর্তনে-কীর্তনে একেবারে উন্মাদ । স্তম্ভ কম্প পুলকাক্রম গদগদ প্রলয়—এসব তো হচ্ছেই, থেকে থেকে মাটিতে আছাড় খেয়ে পড়ছে । শচীমা হাহাকার করে উঠছেন, নিমাইয়ের শরীর বৃষ্টি চূর্ণ-বিচূর্ণ হয়ে গেল । বিষ্ণুর কাছে প্রার্থনা করছেন, ‘দেখো আমার নিমাইয়ের শরীরে যেন ব্যথা না লাগে । বাছা আমার সম্মান করেছে বলে কি তার শরীরে ব্যথা লাগে না ?’

ব্যথার মধ্যেই যে আনন্দের বাসা । এ যে বিষায়তে একত্র মিলন ।

যাত্রার দিন উপস্থিত হল ।

‘হরি বোল ।’ ছদ্ধার করে উঠলেন মহাপ্রভু । ‘হরি বোল হরি বোল হরি বোল ভাই । ইহা বই আর কিছু শুনিতে না পাই ।’

ক্রন্দনের বোল তুলল ভক্তদল ।

প্রভু বললেন, ‘ঘরে ফিরে যাও সকলে । যা বলেছি, কৃষ্ণকীর্তন করো । আবার আমাদের দেখা হবে । মা-ই তো বলেছেন, তোমরা মীলাজি যাবে আর আমি গঙ্গাস্নান করতে নবদ্বীপে আসব ।’

ভক্তের আশ্রমে, ভক্তির আশ্রয়েই আমি সর্বক্ষণ বিরাজ করি ।

ভক্ত বই আমার দ্বিতীয় নেই কেউ । যদিও আমার স্বতন্ত্র বিহার,  
তবু আমি ভক্ত-পরবশ । তোমরাই আমার সর্বশ্ব । তোমাদের ছেড়ে  
আমার তিলার্ধও বিচ্ছেদ নেই ।

‘ভক্ত বই আমার দ্বিতীয় আর নাই ।  
ভক্ত মোর পিতামাতা বন্ধু পুত্র ভাই ॥  
যত্নপি স্বতন্ত্র আমি স্বতন্ত্র বিহার ।  
তথাপিহ ভক্তবশ-স্বভাব আমার ॥  
তোমরা সে জন্ম জন্ম সংহতি আমার ।  
তোমা সব লাগি মোর সর্ব অবতার ॥  
তিলার্ধেও আমি তোমা সবারে ছাড়িয়া ।  
কোথাও না থাকি সভে সত্য জ্ঞান ইহা ॥’

ভগবানের যত লীলা, সমস্তেরই উদ্দেশ্য ভক্ত-চিত্ত-বিনোদন ।  
ভক্ত যেমন ভগবানের সুখ ছাড়া আর কিছু জানে না, ভগবানও  
তেমনি ভক্তের সুখ ছাড়া আর কিছু জানেন না । প্রেম-রস  
আস্বাদনের জগ্গেই কৃষ্ণের প্রকটলীলা, আর এই আস্বাদনেই তাঁর  
ভক্তকে অনুগ্রহ । ‘এই সব রসনির্ধাস করিব আস্বাদ । এই দ্বারে  
করিব সর্ব ভক্তেরে প্রসাদ ॥’ ভক্তকে নিয়েই ভগবান এই জগতের  
মেলা বসিয়েছেন, ভক্তের হৃদয়েই তাঁর রসের খেলা চলছে, এই  
অনুভবটিই তাঁর অপার অনুগ্রহ । ‘রাগমার্গে ভজে যেন ছাড়ি  
ধর্মকর্ম ।’ ধর্ম মানে বেদধর্ম, লোকধর্ম আর কর্ম মানে যাগযজ্ঞ,  
বৈদিক অনুষ্ঠান । ধর্মকর্মের উদ্দেশ্য ইহলোকের বা পরলোকের  
সুখ । এ সুখ অনিত্য । কৃষ্ণসেবাসুখের তুলনায় তুচ্ছ ।

তাই কৃষ্ণে নির্মল অনুরাগ করে । ভগবানে পক্ষপাতিক দোষ  
আরোপ কোরো না । সূর্য সর্বত্র সমানভাবেই রোদ দিচ্ছে ।  
ঘরের মধ্যে শীতার্ঘ মনে হয়, বাইরে রোদে এসে বোসো । ঘরে  
বন্দী হয়ে থেকে সূর্যের দোষ ধোরো না । সূর্য-সান্নিধ্যে, কৃষ্ণ-  
সান্নিধ্যে চলে এস ।

ভক্তের প্রতি অমুগ্ধ দেখাবার জগ্গেই ভগবান সর্বচিন্তাহারিনী  
 লীলা করছেন। ভক্তের মুখে সেই লীলাকথা শুনেই আর সকলে।  
 শুনে তাক্সি আবার বলবে। তারা আবার ভগবৎপরায়ণ, লীলাকথা-  
 পরায়ণ হবে। ভক্ত নিজে ভগবৎ-লীলার অনুষ্ঠান করবে না—সাধ্য  
 কী সে সমুদ্রোদ্ভব বিষ পান করে—সে শুধু ভগবৎলীলাকথা শুনেই,  
 বলবে, ভাবেই অনন্তনিষ্ঠ হয়ে।

শচীমাতাও কি কাঁদছেন? তিনি তো অহুমতি দিয়েছেন যেতে।  
 তবু অশ্রুধারা বারণ মানছে না। অশ্রুধারার সাস্বনা কোথায়?

মাকে প্রদক্ষিণ করে প্রণাম করলেন প্রভু। আলিঙ্গন করলেন।  
 বললেন, 'মা, তুমি উতলা হয়ে না। শুধু কৃষ্ণকে স্মরণ করো। তা  
 হলেই আমাকে পাবে কোলের কাছে।' 'প্রভু বলে মাতা দুঃখ না  
 ভাবহ মনে। সর্বসিদ্ধি হইবেক কৃষ্ণ আরাধনে ॥ যদি শ্রদ্ধা আমা  
 প্রতি আছে সবাকার। কৃষ্ণ ভজ তবে সঙ্গ পাইবে আমার ॥'

চারজন সঙ্গী নিলেন মহাপ্রভু। নিত্যানন্দ, জগদানন্দ, মুকুন্দ  
 দত্ত আর দামোদর। কিন্তু পথে পা বাড়িয়েছেন কী, বহু বৈষ্ণব ভক্ত  
 পিছু নিল। আমাদেরও সঙ্গী করো। আমাদের ফেলে যেও না।

'বলেছি তো, ঘরে গিয়ে কৃষ্ণ নাম গান করো।' ফিরে দাঁড়িয়ে  
 বললেন মহাপ্রভু, 'আমার বিরহে দুঃখ পাবে ভেবেছ? কেউ দুঃখ  
 পাবে না। কৃষ্ণকীর্তনে ডুবলে কার দুঃখ থাকে না। তোমাদের  
 তো আমি বৃহৎ সম্পত্তিই দিয়ে গেলাম। আর দেখবে যখনই  
 কৃষ্ণভজন করবে, আমি তোমাদের কোলে বসে আছি।' 'কাহারো  
 হৃদয়ে নাই রবে দুঃখশোক। সঙ্কীর্তন-সমুদ্রে ডুববে সর্বলোক ॥  
 কিবা ভক্ত কিবা বিষ্ণুপ্রিয়া মাতা শচী। যে ভজয়ে কৃষ্ণ তার কোলে  
 আমি আছি ॥'

তোমার পথ আর কে নিরোধ করতে পারে বলে। যখন  
 নীলাচলে চিত্ত তোমার স্থির হয়েছে, সাধ্য নেই কেউ তোমাকে  
 নিবৃত্ত করে। সমস্ত বাধাবিন্ধ তোমার কিঙ্করের কিঙ্কর। দুর্ঘট সময়

হোক, উড়িয়ায় রাজায় আর বাঙলার নবাবে বিবাদ হোক, তাতে তোমার কী। আমরা কিরে যাচ্ছি। তুমি স্থখে থাকো। তোমার ইচ্ছায়ই সব হচ্ছে। তোমার ইচ্ছারই জয় হোক।

‘যে করেন মনে কৃষ্ণ-ইচ্ছায় সে হয়।

বিষ বা অমৃত ভক্তিলেও কিছু নয় ॥

যেমতে যাহারে কৃষ্ণচন্দ্র রাখে মারে।

তাহা বই আর কেহো করিতে না পারে ॥’

একমাত্র কৃষ্ণভক্তরাই ভক্তিরস আশ্বাদন করতে পারে। যারা অভক্ত, তাদের পক্ষে ও রস-আশ্বাদন অসম্ভব। যাদের ভক্তিবিশয়ে আদর নেই, যারা ফলবৈরাগ্য ধারণ করেছে, যারা শুধু জ্ঞানের অভ্যাসে তৎপর, যারা তাকিক, কর্মকাণ্ডপরায়ণ, নির্বিশেষ ব্রহ্মসঙ্কানী, তারা এ আশ্বাদ থেকে বঞ্চিত। যাদের চিত্তে শুদ্ধস্বের আবির্ভাব হয়েছে, শ্রীকৃষ্ণদাম্বুজই যাদের সর্বস্ব, তাদেরই এ রসে অধিকার। নিরুপাধি ব্রহ্মজ্ঞানও নিরর্থক, যদি তা ভক্তিবির্জিত থাকে। ‘কেবল জ্ঞান মুক্তি দিতে পারে ভক্তি বিনে। কৃষ্ণোন্মুখে সেই মুক্তি হয় বিনা জ্ঞানে ॥’ যারা শ্রীকৃষ্ণে উন্মুখ, তাদের মায়ামুক্তি জ্ঞানের সাহায্য ছাড়াই হতে পারে। ভক্তি পরমস্বতন্ত্র। ভক্তিরেব ভূয়সী। ব্রহ্মা তাই কৃষ্ণকে বলছে, মঙ্গলহেতুভূতা ভক্তি ছেড়ে যারা জ্ঞানের জন্মে ক্লেশ স্বীকার করে, তারা অন্তঃসারহীন স্থূল ভূষকেই আঘাত করে। অর্থাৎ তাদের ভাগ্যে তুণ্ডল জোটে না, তাদের পরিশ্রমই সার।

বঙ্গদেশের শেষপ্রান্তে সাগরসঙ্গমের কাছে ছত্রভোগের দিকে যাত্রা করলেন মহা প্রভু। ডায়মণ্ডহারবারের দিকে জয়নগর-মজিলপুরের কাছাকাছি গ্রাম এই ছত্রভোগ। এখানে বিরাজমান অমূল্য মহাদেব।



‘পথের সম্বল কে কী এনেছ ?’ নিত্যানন্দকে জিগগেস করলেন প্রভু।

‘একটা কানাকড়িও সঙ্গে নিইনি।’ বললে নিজাই, ‘সম্বলের মধ্যে দণ্ড, করোয়া, কোপীন ও বহির্বাস। তোমার আদেশ ছাড়া কার সাধ্য আছে জিনিস নেয়।’

কথা শুনে খুশি হলেন গৌররায়। বললেন, ‘কেউ যে কিছু সঙ্গে নাওনি, তাতে বড় তৃপ্তি পেলাম। কৃষ্ণ ত্রিজগৎ পালন করেন, আমাদেরও করবেন। তাছাড়া, কৃষ্ণ যদি অন্ন মাপান, অরণ্যেও তা মিলবে। আর যদি না মাপান, রাজপুত্রও থাকবে অনাহারে। সর্বত্র ঈশ্বরের ইচ্ছাই ফলবতী।’

‘ভোক্তব্য অদৃষ্টে থাকে যে-দিনে লিখন।

অরণ্যেও আসি মিলে অবশ্য তখন ॥

প্রভু ঘরে যেদিনে বা না লিখে আহার।

রাজপুত্র হউ তভো উপবাস তার ॥

ত্রিভুবনে কৃষ্ণ দিয়াছেন অন্নছত্র।

ঈশ্বরের ইচ্ছা থাকে মিলিবে সর্বত্র ॥

ছত্রভোগে পৌঁছুবার আগে এলেন আটসারায়। গ্রাম হলে কী হয়, সেখানে থাকে অনন্ত পণ্ডিত। তার ঘরে প্রভু অতিথি হলেন। কোপীন বেশ, হাতে দণ্ড কমণ্ডলু, ভিক্ষেয় বেরলেন। অন্নুচরদেরও নিলেন সঙ্গে। ‘ভিক্ষাই যে সন্ন্যাসীর ধর্ম, তাই শেখালেন সবাইকে। আর যতক্ষণ গৃহে আছেন ততক্ষণ শুধু কৃষ্ণকথা, কৃষ্ণকীর্তন।

ছত্রভোগে গঙ্গা শতমুখী। সেখানে জলময় শিবলিঙ্গ। ভগীরথ



যখন গঙ্গাকে নিয়ে এল, তখন বিরহবিহ্বল শিব উপস্থিত হল ছত্রভোগে। গঙ্গাকে দেখেই তার জলে স্বীপ দিল। সেখানেই বিরাজ করল জলরূপে।

শাক্ত ও বৈষ্ণবদের তারকতীর্থ ছত্রভোগ। তারপর এখন আবার চৈতন্যচন্দ্রের পদস্পর্শ পড়ল।

শতমুখী গঙ্গা দেখে প্রভুর নয়নধারাও শতমুখী হল। তিনি অমূলিক-ঘাটে স্নান করলেন। স্নানান্তে যে বহির্বাস পরেন, তাই আবার চোখের জলে ভিজ্জে যায়।

ছত্রভোগ গোড়রাজ্যের দক্ষিণ সীমা। সে দক্ষিণাংশের অধিকারী রাজা রামচন্দ্র খান। হোসেন শার অধীনস্থ কর্মচারী। ওপারেই উড়িষ্যা, প্রতাপরুদ্র যার রাজ্য। গোড়ের সঙ্গে উড়িষ্যার তখন কলহ, সাধ্য নেই সহজে কেউ গোড় থেকে যেতে পারে উড়িষ্যায়।

দোলায় চড়ে কোথায় যাচ্ছিল রামচন্দ্র। পথে এত কোলাহল কেন? মুখ বাড়িয়েই দেখতে পেল প্রভুকে। দেখল তেজোদৃষ্ট বিশাল পুরুষ। দেখেই কেমন ভয় হল। তাড়াতাড়ি নামল দোলা থেকে। নেমেই পড়ল প্রভুর পদতলে।

প্রভুর বাহুজ্ঞান নেই। হা হা জগন্নাথ বলে কাঁদছেন আকুল হয়ে। রামচন্দ্র খান কাঁপরে পড়ল। এ আর্তির সম্বরণ হবে কী করে? 'দেখুন আপনার পায়ের কাছে কে পড়ে আছে?' নিতাই প্রভুকে বললে সকাতরে।

'তুমি কে?' গৌরশুন্দর চমকে উঠলেন।

'আমি আপনার দাসানুদাস।'

'ইনি এ এলেকার অধিকারী, নবাবের হয়ে শাসন করছেন।' বললে কেউ-কেউ।

'তা হলে তো ভালো হল।' প্রভু তাকালেন রামের দিকে। 'আমি নীলাচলচন্দ্র দর্শন করতে চলেছি। তুমি পারো কিছু সাহায্য করতে?'

‘পারি।’ বললে রামচন্দ্র। ‘গৌড় আর উড়িষ্যা, হুই রাজ্য বিঘ্ন কলহ চলছে, ত্রিশূল পুঁতে নির্ধারণ করেছে সীমানা। যদি কেউ এ সীমানা লঙ্ঘন করে, তাকে শুণ্ডচর মনে করে তুকুনি হত্যা করা হয়। কাউকে এ পথে যেতে দিই—আমার অধিকার নেই। যদি উপরে জানতে পারে, তা হলে আমার কীসি হবে। তা হোক, আমার জাতি-প্রাণ-ধন সব নিশ্চিহ্ন হয়ে যাক, তবু আপনাকে আমি পাঠাবই নীলাচল। আপনার ইচ্ছার আমি অগ্রণ হতে দেব না।’

রামচন্দ্রের দিকে শুভদৃষ্টিপাত করলেন প্রভু। দৃষ্টিমাত্র তার সর্ববন্ধনের ক্ষয় হয়ে গেল।

এক ব্রাহ্মণের ঘরে রাত কাটালেন। খেলেন নামমাত্র। কোথায় জগন্নাথ, কতদূর জগন্নাথ—রাত্রি-দিনে এই শুধু কাতরতা। কোথায় নীলাচলচূড়ামণি!

প্রহর খানেক রাত তখনো আছে, রামচন্দ্র এসে বললে, ‘নৌকো এনেছি। রাত থাকতেই যাত্রা করুন।’

হরি-হরি বলে ত্বরিতে নৌকায় উঠলেন গৌরহরি। একে একে অনুচররাও উঠল। উঠেই প্রভু নৃত্য করতে শুরু করলেন। মুকুন্দকে বললেন, কীর্তন লাগাও। ‘হরিহরয়ে নমঃ’ কীর্তন আরম্ভ করল মুকুন্দ।

মান্বির বিপদ দেখল। তারা ভেবেছিল গোপনে প্রভুকে উড়িষ্যায় নামিয়ে দিয়ে দ্রুত পালিয়ে যাবে। কিন্তু এ যে দেখছি ভরাডুবি! এভাবে নাচলে নৌকো বেসামাল হয়ে যাবে তলিয়ে। তাছাড়া কোলাহলে জলদস্যুরা আকৃষ্ট হবে। ধন-প্রাণ কিছুই বাঁচবে না।

তখন তারা প্রভুর কাছে মিনতি করল : ‘নাচের উৎপাতে নৌকো ডুবে গেলে কোথায় যাব, কোথায় পৌঁছিয়ে দেব? জল-ডাকাতরা ঘুরছে আশে-পাশে। গোলমাল শুনলেই সদলবলে চলে আসবে।

আমাদের দেখছি, ডাঙায় বাঘ, জলে কুমির। নীরবে বন্দন শাস্ত হয়ে। আমাদের বাইতে দিন চুপচাপ।’

প্রভুর সঙ্গীরা সঙ্কচিত হল। যা বলছে মাঝিরা তা অধৌক্তিক নয়।

প্রভু হুঙ্কার করে উঠলেন : ‘তোমরা ভয় পাচ্ছ? ভয় কী! এই দেখ সুদর্শন চক্র। ঘুরে ঘুরে ভক্তদের সর্ববিল্ব খণ্ডন করছে। কিছু চিন্তা কোরো না, কীর্তন লাগাও! তোমরা দেখ কি না-দেখ, সুদর্শন ফিরছে তোমাদের সঙ্গে সঙ্গে।’

‘ব্যপদেশে মহাপ্রভু কহেন সভারে।

নিরবধি সুদর্শন ভক্তরক্ষা করে ॥

যে পাপিষ্ঠ বৈষ্ণবের পক্ষ হিংসা করে।

সুদর্শন-অগ্নিতে সে পাপী পুড়ে মরে ॥

বিষ্ণুচক্র সুদর্শন রক্ষক থাকিতে।

কার শক্তি আছে ভক্তজনেরে লজ্বিতে ॥’

প্রিয়বর্গ আবার কীর্তন ধরল। মাঝিরাও আশ্বস্ত হয়ে বাইতে লাগল নৌকো।

দিন কয়েক পরে উড়িষ্যায় বালেশ্বরের কাছে প্রয়াগঘাটে নৌকো থামল।

‘কারে বোলে রাজি দিন পথের সঞ্চার।

কিবা জল কিবা স্থল পার বা ওপার ॥

কিছুই না জানে প্রভু ডুবি ভুল্লিরসে।

প্রিয়বর্গ রাখে নিরবধি রহি পাশে ॥’

প্রয়াগঘাটে প্রভু স্বগণদের নিয়ে স্নান করলেন। সেখানে যুধিষ্ঠিরের প্রতিষ্ঠিত মহেশ আছে, তাকে প্রণাম করলেন। ভক্তদের বললেন, ‘তোমরা বোসো, আমি ভিক্ষে মেগে আনি।’

সে কী! তুমি যাবে কোথায়? ভক্তদল আপত্তি করল। আমরা কেউ যাই।

কাক আপত্তি শুনলেন না প্রভু । নিজেই বেরলেন একা-একা ।  
বহির্বাঁসকে ঝুলির মত করে ধরলেন ।

লক্ষ্মী বীর পাদপদ্মে স্থানভিক্ষা করছে, তিনিই কিনা পথের  
ভিখিরি ! 'হেন প্রভু আপনে সকল ঘরে ঘরে । শ্রাস্তী রূপে  
ভিক্ষা-হলে জীব ধন্য করে ॥'

ওরে ছাখ, পথে কে এক নতুন সল্লেসী বেরিয়েছে । আহা,  
মরে যাই, কী সুন্দর দেখতে ! ভিড় জুটে গেল চারপাশে । যার  
ঘরের ছয়ারে গিয়ে দাঁড়ান, সেই বিহ্বল হয়ে তাকায়, মনে হয়, এ  
সোনার বিগ্রহকে যথাসর্বস্ব দিয়ে দিই ।

ভিক্ষের ঝুলি নিয়ে ফিরলেন গৌরহরি । মন্দিরে ভক্তরা  
অপেক্ষা করছিল, সেই মন্দিরে । ঝুলি তো নয়, এক সাম্রাজ্য  
নিয়ে ফিরেছেন ! ভক্তরা তো অবাক । 'পারবে, তুমি পারবে  
আমাদের বাঁচিয়ে রাখতে । তুমিই আমাদের দেহের অন্ন, আত্মার  
পরমায় ।'

আহারান্তে শুরু হল কীর্তন । সমস্ত গ্রাম ধন্য ধন্য করে উঠল ।

উষাকালে আবার যাত্রা করলেন প্রভু ।

কিন্তু এবার ঘাটের পাটনি পথ আটকাল । বললে, 'দান দাও,  
নইলে পার করব না ।'

যিনি ভবসাগর পার করবেন—তাঁরই পথরোধ ।

ভক্তরা বললে, 'কোথেকে দান দেব, আমাদের কপর্দক মাত্র  
নেই ।'

'তা হলে ওদিকে গিয়ে বসো, এদিকে এস না ।' পাটনি  
অবজায় মুখ ফিরিয়ে নিল ।

কিন্তু সহসা প্রভুর চোখের উপর চোখ পড়ল পাটনির ! কী  
হল কে জানে, পাটনি প্রভুকে লক্ষ্য করে বললে, 'আচ্ছা, তুমি  
এস । আর ওরা,' ভক্তদের নির্দেশ করল পাটনি, 'ওরা কি তোমার  
লোক ?'

প্রভু বললেন, 'এ জগতে আমার কেউ নেই, আমিও কার নই।  
আমি একান্তই একা।'

'তা হলে তুমি এদিকে এস, একা শুধু তোমাকেই পালন করব।'

প্রভু ভক্তদের ছেড়ে ঘাটের কাছে গিয়ে বসলেন।

ভক্তরা প্রমাদ গুনল, প্রভু কি তবে আমাদের ছেড়ে দিয়ে একাই  
নীলাচল যাবেন? প্রভু ছাড়া আমরা তবে বাঁচব কী করে?

নিত্যানন্দ বললে, 'ভয় নেই। প্রভু কি আমাদের ছেড়ে চলে  
যেতে পারেন?'

'তোমরা তো গোসাইয়ের কেউ নও', পাটনি ভক্তদের কাছে হাত  
পাতল : 'তবে ঘাটের কড়ি বের করো।'

সকলে ত্রস্ত হয়ে উঠল, কে যেন উচ্চরোলে কাঁদছে। কাঁদছে  
আর বলছে, জগন্নাথ, তুমি কতদূরে? দেখা দাও, দেখা দাও  
আমাকে।

পাটনি স্তম্ভিত হয়ে গেল। কাঠ-পাথর গলে যায়, এমন কান্নাও  
কাঁদা যায় নাকি? ভক্তদের জিগগেস করলে, 'এমন অস্থিত কাঁদছেন  
ইনি কে?'

'ইনি আমাদের ঠাকুর। সকলের ঠাকুর।' অশ্রুচোখে বললে  
ভক্তদল।

'কে ঠাকুর?'

'শ্রীকৃষ্ণচৈতন্যের নাম শুনেছ? ইনি সেই নবদ্বীপের অবতার,  
ত্রিঙ্গতের ঈশ্বর। সন্ন্যাসীবেশে জীবোদ্ধার করবেন বলে চলেছেন  
নীলাচল।'

পাটনি প্রভুর পায়ে গিয়ে পড়ল।

সর্বজীবনাথ হরি-হরি বলে উঠলেন। নোকো চলল পরপার।

পৌঁছুলেন রেমুণায়। পরমমোহন গোপীনাথকে দর্শন করলেন।  
প্রণাম করতেই গোপীনাথের পুষ্পচূড়া প্রভুর মাথার উপর খসে  
পড়ল। তা মাথায় বেঁধে প্রভু নৃত্য করতে লাগলেন। গোপীনাথের

সেবকেরা অবাক মানল। এত রূপ তারা কোনোদিন দেখেনি,  
এত প্রেম। কে গোপীনাথ। যে মন্দিরে স্থির, না, যে অঙ্গনে  
নৃত্যপর ?

‘এই যে ঠাকুর ইনি একদিন ভক্তের জগ্নু ক্ষীর চুরি করেছিলেন,’  
সমবেত সকলকে বলছেন প্রভু, ‘তাই এঁর নাম ক্ষীরচোরা  
গোপীনাথ।’

‘কে সে ভক্ত ?’

‘মাধবেন্দ্র পুরী।’

বুন্দাবনে তাঁর গোপালের গায়ে চন্দন মাখাবার স্বপ্নাদেশ হয়েছে,  
সেই চন্দনের সন্ধানে নীলাচলে যাচ্ছিলেন মাধবেন্দ্র, পশ্চিমঘো  
থেমেছেন রেমুণায়, গোপীনাথকে দেখতে। গোপীনাথের বারোখানি  
ক্ষীর ভোগ হয়, বারো খালায় সাজিয়ে। সেই ক্ষীরের স্বাদ অমৃতের  
তুল্য বলে তার নাম অমৃতকেলি। মাধবেন্দ্র কোনোদিন কারু কাছে  
কিছু চেয়ে আহার করত না, কিন্তু সেদিন গোপীনাথের ক্ষীর খেতে  
তার আকাঙ্ক্ষা হল। আকাঙ্ক্ষা হতেই লজ্জায় মরে গেল মাধবেন্দ্র,  
এই আকাঙ্ক্ষায় তার অযাচক বৃত্তির হানি ঘটেছে। অপরাধ-  
মোচনের জগ্নে বিষ্ণু স্মরণ করতে লাগল। কিন্তু গোপীনাথ করল  
কী ? গোপীনাথ মাধবেন্দ্রের জগ্নে ক্ষীর চুরি করল, লুকিয়ে রেখে  
দিল ধড়ার আড়ালে। রাত্রে পূজারীকে স্বপ্ন দেখাল, ভোগের  
জায়গায় বারোখানা ক্ষীরের জায়গায় যে এগারোখানা ছিল লক্ষ্য  
করোনি। বাকি একখানি আমি আমার ভক্ত মাধবেন্দ্রের জগ্নু চুরি  
করে লুকিয়ে রেখে দিয়েছি। যাও, সেই ক্ষীরখানি মাধবেন্দ্রকে দিয়ে  
এস। মাধবেন্দ্র হাটের আটচালার নিচে শুয়ে আছে।

‘ক্ষীর লহ এই যার নাম মাধবপুরী।

তোমার লাগি গোপীনাথ ক্ষীর কৈল চুরি ॥

ক্ষীর লঞা মুখে তুমি করহ ভক্ষণ।

তোমা সম ভাগ্যবান নাহি ত্রিভুবন ॥’

ভক্তের জগ্গে ভগবান চূরি পর্যন্ত করতে প্রস্তুত। ভগবানের ভক্ত-  
বাৎসল্যের স্বীকৃতিতে গোপীনাথের নাম “স্কীরচোরা গোপীনাথ।”

মাধবেন্দ্রের অমৃত চরিত ভক্তদের কাছে বর্ণন করলেন মহাপ্রভু।  
গোপালের জগ্গে চন্দনভার বয়ে নিয়ে চলেছে, কোনো কষ্টকেই  
অন্তরায় বলে মানছে না। প্রগাঢ় প্রেমের এমনি স্বভাব যে প্রিয়-  
সুখের জগ্গে প্রেমিক সমস্ত দুঃখকে তুচ্ছ করতে পারে, সমস্ত বিষ্মকে  
তুচ্ছতর। ‘প্রগাঢ় প্রেমের এই স্বভাব আচার। নিজ দুঃখ বিষ্মাদিক  
না করে বিচার।’ তারপর চন্দনভার নিয়ে যখন রেমুণায় এল, তখন  
গোপাল বললে, তোমাকে এ বোঝা বৃন্দাবনে বয়ে আনতে হবে না,  
তুমি গোপীনাথকেই চন্দন মাথাও, তাতেই আমি সুশীতল হব।  
ভক্তশ্রম লাঘব করে দিল গোপাল।

সেই মাধবেন্দ্র—পরম নিস্পৃহ, বৃথালাপবর্জিত, সর্বত্র উদাসীন,  
গ্রাম্যাবর্তার ভয়ে দ্বিতীয়সঙ্কহীন, প্রতিষ্ঠা বা সুখ্যাতির ভয়ে চিরকাতর  
—যখন দেহ রাখছেন তখন দিব্যান্নাদগ্রস্তা রাধিকার মত বিলাপ  
করছেন : হে দীনদয়ার্জ কৃষ্ণ, দেখা দাও, তোমার অদর্শনে প্রাণ যায়,  
তুমি দেখা না দিলে আমি কী করব, কী করতে পারি বলা।

মহাপ্রভু সেই শ্লোক উচ্চারণ করতে করতে মুহিত হয়ে পড়লেন।  
ঠারও মধ্যে দেখা দিল রাধিকার প্রেমোন্মাদ।

রেমুণা থেকে প্রভু এলেন যাজপুর। যাজপুরে বৈতরণী নদীতে  
স্নান করলেন, বরাহঠাকুরকে দর্শন করলেন, পীঠাধিষ্ঠাত্রী বিরজা দেবী  
ও ত্রিলোচনেশ্বর মহাদেবের মন্দিরে গিয়েও প্রণাম করলেন। বিরজা  
দেবীকে দেখে ঠার গোপীভাব উপস্থিত হল। বদ্ধাঞ্জলি হয়ে ভিক্ষে  
করলেন কৃষ্ণপ্রেম।

তারপর চলে এলেন কটক। প্রতাপরুদ্রের বাসস্থান, উড়িষ্যার  
রাজধানী এলেন সাকীগোপাল দেখতে।

সাকীগোপালের কাহিনীটি প্রভুকে শোনাতে নিত্যানন্দ।

বিদ্যানগরের ছই ব্রাহ্মণ ভীর্থ করতে গিয়েছে বৃন্দাবন। একজন

বুড়ো, আরেকজন যুবক। যুবক সারাক্ষণ বুড়োর সেবাবশত করছে।  
বুড়ু খুশি হয়ে বললে, তোমাকে সম্মান না করলে আমার কৃতজ্ঞতা  
হবে। অতএব আমি তোমাকে কন্যাদান করব।

যুবক বললে, 'এ অসম্ভব। আমি অকুলীন, উপরন্তু দরিদ্র,  
বিভার্জনও বেশি করিনি, সুতরাং এ প্রস্তাব কিরিয়ে নিন। আপনার  
সেবায় কৃষ্ণ খুশি হবেন—সেই আশায় আপনার পরিচর্যা করছি।  
পাত্র হবার মত আমার যোগ্যতা নেই।'

বুড়ু মানল না। বললে, 'তুমি সংশয় কোরো না। আমি  
নিশ্চয় করে বলছি, তোমাকেই কন্যা সমর্পণ করব।'

যুবক আবার বাধা দিল। বললে, 'আপনার অনেক জ্ঞাতি-  
গোষ্ঠী, তাদের সম্মতি ছাড়া এ প্রস্তাব অর্থহীন।'

বুড়ু বললে, 'কন্যা আমার আপন বিত্ত, তা দিতে অশ্চর্য নিষেধ  
চলবে কেন? যদি জ্ঞাতি-গোষ্ঠী কেউ বাধা দিতে আসে, তাদেরকে  
নিরস্ত করে বা বর্জন করে আমি কথা রাখব।'

'তা হলে গোপালকে সাক্ষী রাখুন।'

গোপালকে সাক্ষী রাখল বুড়ু। গোপালের সাক্ষাতে বললে,  
'আমি আমার নিজধন নিজকন্যা এই যুবককে দান করব।'

'তুমি আমার সাক্ষী।' গোপালকে বললে যুবক, 'যদি অশুচাচরণ  
দেখি, তোমাকে ডাকব সাক্ষ্য দিতে।'

গুরুবুদ্ধিতে বুড়ুকে যুবক সেবা করতে লাগল প্রাণপণে। দেশে  
ফিরে এসে বুড়ু সমস্ত বৃত্তান্ত আত্মীয় বন্ধুদের কাছে বিবৃত করলে।  
সকলে হাহাকার করে উঠল, নীচ বংশে কন্যা দেবে—অমন হীন কথা  
মুখেও এনো না। সমস্ত সমাজ উপহাস করবে আমাদের।

'কিন্তু তীর্থবাক্যের অশুচা করি কী করে?' বুড়ু বললে  
সকাতরে।

আত্মীয়-বন্ধুরা রুদ্ধে দাঁড়াল। বললে, তা হলে আমরা সকলে  
তোমাকে ত্যাগ করব। স্ত্রী-পুত্র বললে, বিষ খাব।



‘ও যে তা হলে গোপালকে সাক্ষী ডাকবে।’ বৃদ্ধ বললে, ‘লাভের মধ্যে মামলাতে ও জিতবেই, আমাকে ধর্মভ্রষ্ট হতে হবে। এ সহ্য হবে না।’

‘কিসের তোমার সাক্ষী?’ পুত্র বললে রুষ্ট হয়ে, ‘একটা নিশ্চল বিগ্রহ, তাও দূর দেশে রয়েছে। সে আসবে সাক্ষ্য দিতে!’ পরে বললে নিভৃত হয়ে, ‘যুবক যদি এসে কণ্ঠা দাবি করে, আর তুমি সরাসরি মিথ্যে বলতে না পারো, বোলো, কী বলেছি আমার স্মরণ নেই। তা হলেই ওর মামলা টেঁসে যাবে।’

‘তা আমি কী করে বলতে পারি? কথা দিইনি—এ যেমন মিথ্যে, স্মরণ নেই—এ আরো মিথ্যে। গোপাল, আমার ছ-দিক রক্ষা করো।’ গোপালচরণে বৃদ্ধ কঁদতে লাগল। ‘দেখো আমার ধর্মও যেন বাঁচে, আত্মীয়স্বজনও না রুষ্ট হয়।’

একদিন সত্যি-সত্যিই যুবক এসে দাবি জানাল। অঙ্গীকার রাখতে চেষ্টা করছেন না, এ আপনার কেমনতরো আচরণ?

বৃদ্ধ চুপ করে রইল। কিন্তু তার পুত্র এল ঠেঙা নিয়ে। তুমি বামন হয়ে চাঁদ চাইছ? কুলহীন অধম হয়ে চাইছ আমার বোনকে বিয়ে করতে?

যুবক পালিয়ে গেল প্রাণভয়ে। গ্রামস্থ পঞ্চজনের কাছে শরণ নিল। সালিশি বসল গণ্যমান্যদের। বৃদ্ধ ব্রাহ্মণের তলব হল। বোলো, কেন একে কণ্ঠা দিচ্ছ না? কথা দিয়েছ তো কথার খেলাপ করছ কেন?

ছেলে যা শিখিয়ে দিয়েছিল তাই বললে বৃদ্ধ। বললে, ‘কখন কী বলেছি আমার কিছু স্মরণ নেই।’

তখন ছেলে অগ্রবর্তী হয়ে বললে, ‘শুনুন। ভীর্ষযাত্রায় বাবার সঙ্গে অনেক টাকাকড়ি ছিল। ঐ পাষাণ বাবাকে ধুতুরা খাইয়ে অজ্ঞান করিয়ে সমস্ত লুট করে নিয়েছে। এখন রব তুলেছে, কণ্ঠাদানের অঙ্গীকার করেছে ব্রাহ্মণ। আপনারাই বিচার করে

বলুন ঐ নরাধম কি পাত্র হবার যোগ্য ? ঐ কুলহীন অনাচারী ?  
ওকে বাবা কষ্টা দিতে স্বীকার করবেন ?

‘কিন্তু সাক্ষী আছে, আমার একজন সাক্ষী আছে।’ যুবক  
চিৎকার করে উঠল।

‘কে সাক্ষী ?’

‘এক মহাজন আমার সাক্ষী।’

‘কে, তার নাম কী ?’

‘তার নাম গোপাল। বৃন্দাবনের গোপাল। সেই পরাবরেশ  
পরিপূর্ণ পুরুষ। যার বাক্য সত্য বলে ত্রিভুবন মানছে। যার  
কাছে দাঁড়িয়ে ব্রাহ্মণ স্বমুখে দিয়েছে প্রতিশ্রুতি।’

‘তাই ভালো। গোপাল যদি এসে সাক্ষ্য দেয়,’ বৃদ্ধ বললে, ‘তবে  
নিশ্চয় কষ্টার্পণ করব।’

‘হ্যাঁ, গোপাল যদি এসে বলে —’ ব্রাহ্মণের পুত্র সায় দিল।

বৃদ্ধের আশা—কৃষ্ণ নিশ্চয়ই দয়া করবেন, আমার বাক্য সপ্রমাণ  
করবেন ; আর পুত্রের আশ্বাস, প্রতিমা কখনো আসতে পারে ?  
কখনো হাঁটতে পারে ?

যুবক তখন সটান হাজির হল বৃন্দাবনে। গোপালকে গিয়ে  
বললে, ‘গোপাল, দুই বিপ্রের ধর্ম রাখো। কষ্টা পাব—এতে  
আমার গৌরব নেই, ব্রাহ্মণের প্রতিজ্ঞা থাকে—এতেই আমার  
গৌরব।’

কৃষ্ণ বললে, ‘তুমি ফিরে যাও, আমি সভাস্থলে আবির্ভূত হয়ে  
ঠিক সাক্ষ্য দেব। কিন্তু প্রতিমাস্বরূপে আমি সেখানে যাব কী  
করে ?’

‘না, না, তুমি যদি চতুর্ভূজ মূর্তিতে আবির্ভূত হও কেউ তোমাকে  
বিশ্বাস করবে না। তুমি যে মূর্তিতে আছ সেই মূর্তিতে যাবে আমার  
সঙ্গে।’ বললে যুবক, ‘তা হলেই সকলে তোমাকে মান্য করবে।’

‘বা, প্রতিমা হাঁটবে কী করে ?’ বললে কৃষ্ণ।

‘তা হলে এখন কথা কইছ কী করে?’ বললে যুবক, ‘তুমি প্রতিমা নও, তুমি সাক্ষাৎ ব্রহ্মেশ্বরনন্দন। ভক্তের জন্তে তুমিই তো অকার্যকরণ করবে। মন্দির ত্যাগ করে আমার সঙ্গে যাবে, যাবে পায়ে হেঁটে, যেমন আমি যাব। যে ভাবে ভজন করব তোমাকে, তুমিও সেইভাবে আমাকে কৃপা করবে।’

‘বেশ, আমি যাব তোমার পিছু-পিছু।’ গোপাল রাজি হল, ‘কিন্তু তুমি সন্দেহবশে পিছন ফিরে তাকাবে না আমি সত্যি যাচ্ছি কিনা। বিশ্বাস করবে। যদি ফিরে তাকাও আমি তবে সেইখানে দাঁড়িয়ে পড়ব।’

‘বুঝব কী করে যে তুমি ঠিক অনুসরণ করছ আমাকে?’

‘আমার নূপুরধ্বনি শুনতে পাবে।’

যুবক গ্রামের উদ্দেশে যাত্রা করল। পিছনে শুনতে পেল নূপুরধ্বনি। তবে গোপালও চলেছে সঙ্গে-সঙ্গে।

চলতে চলতে বহুদিন পরে পৌঁচেছে গ্রামপ্রান্তে। এবার গ্রামে ঢুকব, বাড়ি যাব, সকলকে বলব সাক্ষী আনার কথা, কিন্তু সাক্ষীকে নিজে একবার স্বচক্ষে দেখব না? আমার কেমন সাক্ষী একবার সনাক্ত করব না? এই ভেবে যুবক তাকাল পিছন ফিরে। আর নূপুরধ্বনি নেই। গোপালও থেমে পড়েছে।

যুবক কাঁদতে লাগল।

গোপাল বললে, ‘আমি আর অগ্রসর হব না। তুমি বাড়ি যাও, সকলকে ডেকে নিয়ে এস। আমি এখানে দাঁড়িয়েই সাক্ষ্য দেব।’

গ্রামে টি-টি পড়ে গেল। প্রতিমা হেঁটে চলে এসেছে সাক্ষ্য দিতে। হ্যাঁ, সেই মূর্তি। ত্রিভঙ্গবন্ধিম মুরলীধর। জলজ-লোচন। পীতধড়া ও মোহনচূড়ায় সাজানো। সর্বানন্দকদম্বস্বরূপ।

গোপাল সাক্ষ্য দিল। যুবককে কন্ডাদান করল বৃদ্ধ। সর্ব আপত্তির মীমাংসা হয়ে গেল।

বিপ্রহয়কে বর দিতে চাইল গোপাল।

‘আর কিছু চাই না আমরা। তুমি শুধু এইখানে থাকো অনন্ত সাক্ষী হয়ে।’

নিত্যানন্দের কাছে গোপালকথা শুনে বিহ্বল হলেন প্রভু। সাক্ষাৎ করতে গেলেন। ভক্তদল ডাকিয়ে দেখল, গৌরাজ আর সাক্ষীগোপাল দুজনেরই একমূর্তি।

‘দৌহে একবর্ণ—দৌহে প্রকাণ্ড শরীর।

দৌহে রক্তাম্বর—দৌহার স্বভাব গম্ভীর ॥

মহাতেজোময় দৌহে কমলনয়ন।

দৌহার ভাবাবেশমন চন্দ্রবদন ॥’

শ্রীচৈতন্যের রূপ কেমন? তপ্তহেম সমকাস্তি, প্রকাণ্ড শরীর। কর্ণধর নবীন মেঘধ্বনির চেয়েও গম্ভীর। দৈর্ঘ্যে নিজের হাতের মাপে চার হাত। দুই হাত প্রসারিত করে দাঁড়ালে বিস্তারেও সেই চার হাত। বাহু আজামূলস্থিত, অর্থাৎ সোজা হয়ে দাঁড়িয়ে হাত ঝুলিয়ে রাখলে হাতের আঙুলের অগ্রভাগ হাঁটুকে স্পর্শ করে। নয়ন কমলসদৃশ, তিলফুলের চেয়েও সুন্দর নাক, মুখ চন্দ্রের চেয়েও মনোহর।

দেখা গেল সাক্ষীগোপাল সেই চৈতন্যমূর্তি গ্রহণ করেছে।

‘ভক্তি তিন প্রকার।’ কপিল তার মা দেবহৃতিকে বলছে : ‘তামস, রাজস আর সাত্বিক। হিংসা, দম্ব বা মাৎসর্যভরে ক্রোধী পুরুষ যে ভক্তি করে তা তামস ভক্তি। বিষয় যশ কিংবা ঐশ্বর্য কামনা করে যে-ভক্তি তা রাজস ভক্তি। পাপক্ষয়মানসে বা ভগবানের প্রীতিসম্পাদন-আকাঙ্ক্ষায় বা ভগবানে কর্মফল সমর্পণ করবার উদ্দেশ্যে যে ভক্তি তা সাত্বিক। কিন্তু সর্বশ্রেষ্ঠ ভক্তি নিগুণা ভক্তি। গঙ্গাধারা যেমন সাগরে গিয়ে মেশে তেমনি যে মনোগতি ফলাহুসন্ধান না করে পুরুষোত্তমে নিহিত হয় সেই মনোগতিরূপা ভক্তিই নিগুণা ভক্তি। যে নিগুণা ভক্তির অভিলাষী সে ভগবানে একান্ততাও কামনা করে না। সালোক্য সষ্টি সামীপ্য সারূপ্য

সাজুয্যও না। ভগবানকে সেবা করবে এর বেশি কিছু তার কামনীয় নয়। একেই বলে ভক্তি অনিমিত্তা, ভক্তি আত্যন্তিকী।’

‘চিত্তশুদ্ধির জন্মে কী করতে হবে? কী ভগবানের আদেশ?’

‘ফলকামনা না করে নিত্যনৈমিত্তিক স্বধর্মানুষ্ঠান করবে। প্রতিমাকে দর্শন স্পর্শন স্তব বন্দন করবে। সকল প্রাণীতে চিন্তা করবে ভগবদ্ভাব। মহতে সম্মান, দীনে দয়া, আত্মসদৃশ ব্যক্তিতে মিত্রতা, বহিরিশ্রিয়ের নিগ্রহ, অন্তরিশ্রিয়ের দমন, আত্মবিষয়ক শ্রবণ, ভগবানের নামকীর্তন ও সরলতাচরণ করবে। সতের সঙ্গ করবে আর নিরহঙ্কার থাকবে। গদ্ধ যেমন বায়ুযোগে জ্ঞানকে আশ্রয় করে তেমনি অবিকারীচিত্ত ভক্তিযোগে পরমাত্মাতে আশ্রিত হবে। ভগবানই সর্বভূতের আবাস, সর্বলোকের সাক্ষী।’



৪২

তারপর এলেন ভুবনেশ্বর। যার আরেক নাম গুপ্তকান্দী।

স্নান করলেন বিন্দুসরোবরে। যার আরেক নাম শিবপ্রিয়-সরোবর। সমস্ত তীর্থ থেকে বিন্দু বিন্দু জল এনে যে সরোবর শিব নিজে সৃষ্টি করেছে।

মন্দিরে বিগ্রহের সামনে নাচতে লাগলেন মহাপ্রভু। মত্ত হলেন শিবপ্রেমে। ‘শিবপ্রিয় বড় কৃষ্ণ, তাহা বুঝাইতে। নৃত্য করে গৌরচন্দ্র শিবের অগ্রেতে ॥’ ভক্তদের নিয়ে করলেন শিবপূজা। যত দেবালয় আছে সে গ্রামে সব দেখলেন ঘুরে ঘুরে।

শিবের কাছে ক্ষমা পেয়ে দক্ষ আবার যজ্ঞ আরম্ভ করলে ঋষিকেরা বিম্বুকে স্তব করতে লাগল : হে আশ্রয়প্রদ, এই সংসারপথ অতি ছর্গম; পথিকেরা কবে আপনার চরণনিবাস প্রাপ্ত হবে? অহঙ্কারান্ধ

শরীর ও মমতাস্পদ গৃহই এদের গুরুতর ভার। এখানে মুত্য়রূপ কালসাপ, বিষয়রূপ মৃগতৃষ্ণা, সুখহঃখছন্দরূপ বহুতর গর্ভ, শোকরূপ দাবান্নি পীড়ন করছে। একমাত্র যার চিন্ত আপনার চরণে নিবিষ্ট ভারই অমোঘ শাস্তি।’

সেখান থেকে কমলপুর।

এখান থেকে জগন্নাথমন্দিরের ধ্বজা দেখা গেল। প্রভু উচ্ছ্বসিত হয়ে উঠলেন : ‘দেখ দেখ প্রাসাদের অগ্রমূলে বালগোপাল বসে আছেন। স্মিত-সুবদন হাসছেন আমাদের দেখে।’

বিবশ হয়ে লুপ্তিত হলেন ভূতলে। কীদন্তে লাগলেন। সে আর্তি অনন্ত জিহ্বায়ও বুকি বর্ণনা করা যায় না।

ভার্গী নদীতে স্নান করলেন। হাতের দণ্ড নিতাইয়ের কাছে জিন্মা দিয়ে গেলেন কপোতেশ্বরকে দেখতে।

নিতাই সেই দণ্ড তিন-টুকরো করে জলে ভাসিয়ে দিল।

দণ্ডকে বললে, আমি যাকে ছদয়ে বহন করছি, সে তোমাকে বয়ে বেড়াবে, এ অসম্ভব। যীর ভুজ্জয়ুগলই ছই হেমদণ্ড, তিনি আবার একটা বংশদণ্ড বইবেন কেন ?

দণ্ড অস্ত্র ছাড়া আর কী ! প্রেমসিদ্ধ প্রভু কাকে দণ্ড দেবেন, কার শাসক হবেন ? নাম-প্রেমে সকলের চিন্তগুঞ্জি ঘটাবার জন্টেই তাঁর আবির্ভাব, তাঁর দণ্ডের কী প্রয়োজন ?

সন্ন্যাসী ত্রিদণ্ডী। বাক্য, দেহ আর চিন্ত—এই তিনকে যে দণ্ড দিয়ে শাসন করে বশীভূত করেছে, সেই যতি, ত্রিদণ্ডী। মৌন হচ্ছে বাক্যের দণ্ড, কাম্যকর্মত্যাগ দেহের দণ্ড আর প্রাণারামই চিন্তের দণ্ড। দণ্ড স্মরণকচিহ্ন। সর্বদা সন্ন্যাসীকে স্মরণ করিয়ে দিচ্ছে তুমি কায়মনোবাক্যে সংযত করেছ, তুমি নিজেই নিজের দণ্ডদাতা। দৃষ্টিপূত পদস্ফাস করবে, বস্ত্রপূত জল পান করবে, সত্যপূত বাক্য বলবে ও মনঃপূত আচরণ করবে।

প্রভুর কী দরকার এই স্মরণকচিহ্নে ? যিনি মায়াভীত সচ্চিদানন্দ-

ময়, তাঁর আবার কিসের দণ্ড, কাকে দণ্ড ? পদ্মরা নিন্দুকদের  
অসুরত্ব দূর করবার জন্তেই তাঁর সন্ন্যাস। আর সে অসুরত্ব দূর হবে  
দণ্ডে নয়, ক্ষমায়। চিন্তের শোধন হবে শুধু কৃপাবর্ষণে। তাই যিনি  
কৃপা ঢালবেন মুক্তহস্তে, তিনি বদ্ধমুষ্টি হবেন কী করে, কী করে  
দণ্ড ধরবেন ? দণ্ড নিরর্থক।

মূর্ত্তিমন্ত গৌরকৃপা নিতাই তাই ভেঙে ফেলল দণ্ড। দণ্ড তিন  
বলে টুকরোও তিন করল। ভাসিয়ে দিল নদীতে।

যিনি আগে বংশী হাতে করে তিন জগৎ মোহিত করতেন, তাঁর  
হাতে এখন তিন-পর্বের বংশদণ্ড। বংশীর বদলে বংশ ! অসম্ভব।  
সুতরাং হে দণ্ড, তোমার দণ্ড নাও, ত্রি-ভঙ্গ হয়ে ভেসে যাও  
নদীস্রোতে।

সেই থেকে ভার্গীনদীর নাম দণ্ডভাঙা নদী।

আরো কি এক গুঁচ কারণ আছে দণ্ডভঙ্গের ?

কপোতেশ্বর শিবকে দর্শন করে ভক্তসঙ্গে প্রভু চললেন শ্রীক্ষেত্রের  
দিকে। তিনক্রোশ পথ, মনে হচ্ছে যেন সহস্র যোজন। সোনার  
অঙ্গ কখনো ধুলোয় ধুসর হচ্ছে, কখনো বা চোখের জলে ধুলো ধুয়ে  
গিয়ে ফুটে উঠছে গৌরকাস্তি। শরীরে কোনো অস্থি আছে বলে  
মনে হচ্ছে না। পথে যে দেখে, সেই বলে এ কে নওলকিশোর !  
কিশোর নারায়ণ !

প্রেমাবেশে পথ চলেছেন, আঠারনালায় এসে বাহুজ্ঞানের  
প্রকাশ হল। নিতাইয়ের দিকে হাত বাড়ালেন প্রভু। বললেন,  
'আমার দণ্ড দাও !'

নিতাই চুপ করে রইল।

'সে কি, আমার দণ্ড কোথায় ?' প্রভু কি ঈষৎ রুষ্ট হলেন ?

'সে দণ্ড ভেঙে গিয়েছে। তিনখণ্ড হয়ে গিয়েছে।'

'সে কি ! কী করে ভাঙল ?'

'প্রেমাবেশে ভেঙে গিয়েছে।' গাঢ়স্বর নিতাইয়ের। 'তোমার

আবেশ হলে আমি তোমাকে ধরলুম। জড়াঝড়ি করে পড়লুম একসঙ্গে—সেই দণ্ডের উপর। আর ছজনের দণ্ড ভিন-টুকরো হয়ে গেল। টুকরোগুলো যে কোথায় গেল, কিছুই জানি না।’

তা হলে দণ্ড কি নিতাই স্বহস্তে খেঁচায় ভাঙেনি? সে কি মিথ্যে কথা বলছে?

আসলে প্রেমাবেশই দণ্ডভঙ্গের মুখ্য কারণ। নিতাই উপলক্ষ্য মাত্র। যার প্রেমাবেশ হয়েছে তার আবার দণ্ড কিসের? প্রেমাবেশেই ভেসে যাবে দণ্ড। দণ্ডের কথা যে এতক্ষণ ভুলে ছিলেন প্রভু, তার মূলেও সেই প্রেমাবেশ। প্রেমাবেশের কাছে দণ্ড অনাবশ্যক। আর যা অনাবশ্যক, তা থাকলেও যা, ভাঙলেও তা। কেন তবে নিফল ভারবহন?

আর, তাকিয়ে দেখ, নিমাইয়ে নিতাইয়ে জড়াঝড়ি। নিমাইয়ের উচ্ছ্বাসে নিতাইয়ের উত্তম, নিমাইয়ের আবেশেই নিতাইয়ের আবেগ—দণ্ড আর দাঁড়ায় কোথায়?

প্রভু ক্রুদ্ধ হলেন। বললেন, ‘নীলাচলে এনে তোমরা আমার খুব হিত করলে! আর সব গেছে, মাত্র দণ্ডখন ছিল, তাও কেড়ে নিলে, ভেঙে ফেললে। যাও, তোমাদের সঙ্গে আর আমি যাব না। জগন্নাথ দর্শনে হয় তোমরা আগে যাও, না হয় আমি আগে যাই।’

পুরীর কাছাকাছি নদীর উপর যে পোল আছে, তার নামই আঠারনালা। নীলাচলচন্দ্র জগন্নাথের মন্দির আর দূরে নয়। কিন্তু প্রভু ক্রুদ্ধ হয়েছেন, একাকী যাবেন, হয় আগে নয় পরে।

মুকুন্দ দত্ত বললে, ‘প্রভু, তুমিই আগে যাও, আমরা সকলে পরে যাব।’

এইটুকুই বৃষ্টি রহস্ত। একা না গেলে বৃষ্টি সার্বভৌম উদ্ধার হয় না।

প্রভুর ইচ্ছাতেই দণ্ড ভাঙল, তা হলে প্রভুর ক্রোধ কেন?



জীবশিকার জগ্গেই এই ক্রোধ। প্রাকৃতজন যেন সন্ন্যাসীজনে থেকে দণ্ড না ভাঙে। নিয়ম না অমান্য করে।

ক্রোধ উপলক্ষ্য করে ভক্তদের পিছনে রেখে প্রভু ছুটলেন তাঁরবেগে। ছুটলেন মন্দিরের দিকে। ‘মস্ত সিংহগতি জিনি চলিলা সঘর। প্রবিষ্ট হইলা আসি পুরীর ভিতর।’ কে তাঁকে রোধ করে! একেবারে জগন্নাথের সামনে এসে দাঁড়ালেন।

ইচ্ছে হল জগন্নাথকে আলিঙ্গন করি। হৃদয়ের মধ্যে নিবিড় করে ধরে রাখি।

ধর ধর মার মার—মন্দিরের প্রহরীরা কোলাহল করে উঠল।

প্রেমাবেশে প্রভু মূর্ছিত হয়ে পড়লেন।

‘সরে দাঁড়াও। মেরো না।’ কে গর্জন করে উঠল সহসা।

প্রহরীরা নিরস্ত হল। এ যে সার্বভৌম বারণ করছে। রাজা প্রতাপরুদ্রের সভাপণ্ডিত শুধু নয়, একাধারে গুরু, মন্ত্রী, মীমাংসক। তার কথা না শোনা অর্থ রাজ্যজ্ঞা লঙ্ঘন করা।

নাম বাসুদেব, উপাধি সার্বভৌম। নবদ্বীপের মহেশ্বর বিশারদের পুত্র, সর্বশাস্ত্রে, বিশেষ করে ছায়ে ও বেদান্তে সুপণ্ডিত। লোকে বলে, বাঙলা দেশে ছায়শাস্ত্র ছিল না, বাসুদেব পড়তে গিয়েছিল মিথিলায়। পাঠশেষে ইচ্ছে হল ছায়শাস্ত্র নকল করে দেশে নিয়ে আসে। চতুষ্পাঠীর অধ্যাপক তাতে বাধা দেয়। ছায় মিথিলা থেকে বেরিয়ে গেলে যেন মিথিলার গৌরব লান হয়ে যাবে। তখন বাসুদেব সমগ্র ছায় কণ্ঠস্থ করে নিল। আর নকল করার দরকার হল না।

মায়াবাদে বিশ্বাসী বাসুদেব, অর্ধেক বেদান্তে পারঙ্গম। ছায়ের অধ্যাপনা তো করেই, সন্ন্যাসীদের বেদও পড়ায়। কুতর্ককর্কশ—ভক্তিবাদের ধার ধরে না, তর্কে ভক্তিবাদের নিরসন করে।

কিন্তু এ কী, এ কে অপরূপ পুরুষ? এত সৌন্দর্য, এত প্রেমবিকার আগে কখনো দেখেনি সার্বভৌম। পাছে কেউ নির্ধাতন করে, সার্বভৌম প্রভুকে আবরণ করে দাঁড়াল। কিন্তু

অনেকক্ষণ কেটে গেল, তবু প্রভুর বাহাজ্ঞান ফিরে এল না। এদিকে জগন্নাথের ভোগের সময় উপস্থিত। মন্দির তাই বন্ধ হবে এখনি।

তবে উপায় ?

সার্বভৌম বললে, 'এঁকে আমার বাড়িতে বয়ে নিয়ে চলো।'

মন্দিরের ছড়িদাররা অবাক। এ অপরাধীকে আবার বাড়িতে নিয়ে যাওয়া কেন ? একে আবার কিসের আপ্যায়ন ?

সার্বভৌম বললে, 'ইনি মহাপুরুষ। দেখেই বুঝতে পারছি কৃষ্ণমহাপ্রেমের সমস্ত সাত্বিকভাব এঁর দেহে পরিস্ফুট।'

ভক্তিবাদের বিরোধী হলেও কৃষ্ণপ্রেমের লক্ষণ কী তা সার্বভৌমের জানা ছিল। সন্দেহ নেই—এ নবীন সন্ন্যাসী নিত্যসিদ্ধ, তার মধ্যে উদ্দীপ্ত ভাবের প্রকাশ যা একমাত্র কৃষ্ণ-প্রেয়সীদের বৈশিষ্ট্য। সেই মহাভাব এই মর্ত মানুষের মধ্যে সম্ভব কী করে ?

প্রভুকে নিজ বাড়িতে নিয়ে এল সার্বভৌম। পবিত্র স্থানে ও আসনে শুইয়ে দিল। কিন্তু প্রভুর শ্বাস নেই স্পন্দন নেই, আয়ত নয়ন আধবোজা। নাকের কাছে তুলো ধরে দেখল, না, তুলো অল্প-অল্প নড়ছে। ক্ষীণ হলেও শ্বাস আছে, একেবারে নিঃশেষ হয়নি। সন্দেহ নেই, এ প্রলয়-নামক সাত্বিক ভাবের লক্ষণ।

কিন্তু কতক্ষণে ফিরে আসবে বাহাজ্ঞান ? শিয়রে বসে অপেক্ষা করতে লাগল সার্বভৌম। দেহলক্ষণ নিরীক্ষণ করতে লাগল।

এদিকে নয়নের অদর্শন হতেই অম্বুগামী ভক্তের দল ছুটল মন্দিরের দিকে। দ্বার-প্রান্তে পৌঁছে ব্যাকুলস্বরে জিগগেস করল, —একজন নবীন সন্ন্যাসীকে এদিকে আসতে দেখেছ ?

মন্দিরে পৌঁছেও জগন্নাথদর্শনের কথা তাদের মনে নেই। আগে প্রভু, পরে বিগ্রহ।

'দেখেছি।'

'দেখেছ ?'

'হ্যাঁ, মন্দিরে ঢুকেই চেয়েছিল জগন্নাথকে কোলে নিতে। মূর্ছিত

হয়ে পড়ে গিয়েছিল মাটিতে। সার্বভৌম ভট্টাচার্য তখন মন্দিরে ছিলেন, সন্ন্যাসীর জ্ঞান হয় না দেখে তাকে তাঁর নিজের বাড়িতে নিয়ে গিয়েছেন।’

চলো যাই, কে সে সার্বভৌম, তার বাড়িতে গিয়ে খোঁজ করি।

এমন সময় সেখানে গোপীনাথ আচার্যের আবির্ভাব।

নবদ্বীপের লোক, মুকুন্দর সঙ্গে আগে থেকে জানাশোনা।  
একি, তুমি কোথেকে? মুকুন্দকে বুকে জড়িয়ে ধরল গোপীনাথ।

নিতাইয়ের সঙ্গে আলাপ করিয়ে দিয়ে মুকুন্দ বললে, ‘গোপীনাথ, বিশারদের জামাই, তার মানে সার্বভৌমের ভগ্নীপতি।’

‘ও সব পরের কথা। এখন বলো প্রভু কোথায়?’ গোপীনাথ ব্যস্ত হয়ে উঠল।

‘তোমাদের বলা হয়নি,’ মুকুন্দ বললে, ‘গোপীনাথ প্রভুর ভক্ত। শুধু ভক্ত নয়, তত্ত্বজ্ঞ।’

‘তবে আর চিন্তা নেই, উনি নিশ্চয়ই সার্বভৌমের বাড়ি জানেন।’ বললে নিতাই, ‘এখানে লোকমুখে শুনে অনুমান করছি প্রভু সার্বভৌমের বাড়িতে আছেন। সেখানে আমাদের নিয়ে চলুন।’

গোপীনাথ নিয়ে গেল সবাইকে। তাদেরকে বাইরে রেখে দ্রুতপায়ে ঢুকল অস্তঃপুরে। ধূলিধূসর দেহে অচেতন হয়ে দীনবেশে শুয়ে আছেন গৌরহরি। মুখ দেখে সুখ হল বটে, কিন্তু অবস্থা দেখে হৃদয় বিদীর্ণ হল। কতক্ষণে না-জানি ফিরে আসবে বাহাজ্ঞান! সার্বভৌমকে বললে, ‘এ সন্ন্যাসীর সঙ্গে লোকেরা এসেছে। অপেক্ষা করছে বাইরে।’

‘নিয়ে এস ভিতরে।’

ভিতরে এসে প্রভুকে দেখে ভক্তবৃন্দ আশ্বস্ত হল। সার্বভৌম প্রভুকে সেবা-যত্ন ঠিকই করছে। খুব বেশি উদ্ভিগ্ন হবার কারণ নেই, প্রভুর এই ধ্যানমূর্ছা দীর্ঘস্থায়ীই হয়ে থাকে।

নিত্যানন্দকে প্রণাম করল সার্বভৌম। শুনল তাদের এখনো

জগন্নাথদর্শন হয়নি। পুত্র চন্দনেশ্বরকে বললে, 'এঁদেরকে দর্শন করিয়ে নিয়ে এস।'

মন্দিরে নিয়ে এসে চন্দনেশ্বর বললে, 'স্থির হয়ে দেখবেন জগন্নাথকে! আপনাদের আরেক গোসাঁই তো মাথা ঘুরে আছাড় খেয়ে পড়লেন—'

হাসতে লাগল ভক্তদল। 'আমাদের জন্মে চিন্তা নেই।'

প্রকট পরমানন্দ জগন্নাথকে দেখে আবেশ লাগল সকলের। কাঁদতে লাগল নিত্যানন্দ। মন্দিরের সেবক সকলকে মালা-প্রসাদ এনে দিল। প্রসাদে প্রসন্ন হল সকলে।

চলো এবার তবে মহাপ্রভুর কাছে ফিরে যাই।

গিয়ে দেখল নবদ্বীপচন্দ্র তখনো সমাহিত। সার্বভৌম ধ্যানভঙ্গের প্রতীক্ষায় বসে আছে পদতলে। ভক্তদল গৌরহরিকে ঘিরে বসে উচ্চস্বরে নামকীর্তন শুরু করল। তৃতীয় প্রহরে প্রভুর চেতনা ফিরে এল, হরি-হরি বলে হুঙ্কার দিয়ে উঠে বসলেন। স্থির হয়ে জিগেস করলেন নিতাইকে, 'এখানে আমি কী করে এলাম?'

নিতাই বললে, 'জগন্নাথ দেখামাত্র তুমি আনন্দ-আবেশে মূর্ছা গেলে। মন্দিরে সার্বভৌম উপস্থিত ছিল, সে তোমাকে তার ভবনে নিয়ে এসেছে।'

'জগন্নাথকে দেখামাত্রই ইচ্ছে হল তাকে বুকে করি, উন্নতের মত বাহু বাড়িয়ে ছুটলাম তাকে ধরতে। তারপর কী হল আর মনে নেই।' বললেন মহাপ্রভু।

'জগন্নাথ দেখি চিন্ত হইল আমার।

ধরি আনি বক্ষ-মাঝে থুই আপনার ॥

ধরিতে গেলাম মাত্র জগন্নাথ আমি।

তবে কি হইল শেষে আর নাহি জানি ॥'

'দৈবে সেখানে সার্বভৌম ছিল', নিতাই তাকাল সার্বভৌমের দিকে, 'সে তোমাকে সঙ্কট থেকে রক্ষা করেছে।'

‘জগন্নাথের কী কৃপা!’ বললেন গৌরহরি, ‘সার্বভৌমের সঙ্গে আমার মিলন ঘটাল।’

সার্বভৌম কাছে এল। ‘নমো নারায়ণ’ বলে প্রণাম করল প্রভুকে।

প্রভু বললেন, ‘কৃষ্ণে মতিরস্তু।’

মতি থেকেই রতি জাগবে। আর আগুন যে আধারে থাকে তাকেও যেমন উত্তপ্ত করে, তেমনি আনন্দস্বরূপা কৃষ্ণরতি যে ভক্তে থাকে, তাকেও আনন্দিত করে রাখে। এমন আনন্দ যে বিচ্ছেদেও কৃষ্ণস্মৃতি।

ব্রহ্মাঙ্গনার রতি স্বভাবজা, রাধিকার স্বরূপজা। অনাদিসিদ্ধা। এ রতির উৎপাদক কোনো হেতু নেই। তবে বাহ্যবস্ত্র কিছু আছে যা এ রতিকে উদ্দীপিত করে। যেমন শব্দ, বেণুশব্দ; স্পর্শ, অঙ্গস্পর্শ; যেমন দর্শন, রূপদর্শন। যেমন বা রসাস্বাদন, কৃষ্ণের চর্চিত তাম্বুল খেয়ে রাধিকার দেহে সাত্বিক বিকারের আবির্ভাব। যেমন বা সম্বন্ধ-চিন্তন। কার এমন সৌন্দর্য মাধুর্য গান্ধীর্ষ বৈদম্ব্য, শৌর্য বীর্ষ সৌলীল্য? কার এমন লোকোত্তর চরিত্র? এমন জগৎচমৎকৃতিকরী লীলাই বা কার। এ সব দেখে শুনে ভেবে চিন্তে কোন রমণী থাকবে ধৈর্য ধরে?

সার্বভৌম বললে, ‘এখানেই আপনাদের আজ মধ্যাহ্নকৃত্য হবে। জগন্নাথের মহাপ্রসাদ আমি আজ ভিক্ষে দেব।’

স্বগণদের নিয়ে প্রভু গেলেন সমুদ্রস্নানে।

স্নানান্তে বসলেন ভোজনে। সোনার থালায় সার্বভৌম পুরিবেশন করতে লাগল।

‘এত পিঠা-পানা আমি খেতে পারব না।’ বললেন মহাপ্রভু, ‘এসব আমার সঙ্গীদের দাও। আমাকে কিছু লাফরা তরকারি দিলেই চলবে।’

‘তা কী করে হয়?’ আপত্তি করল সার্বভৌম। ‘এ সমস্তই

জগন্নাথকে নিবেদন করা হয়েছে। আপনি আত্মা করে দেখুন  
জগন্নাথের রোচনীয় হবে কি না।’

একে একে সমস্ত রান্না খাওয়াল প্রভুকে।

ভোজনান্তে গোপীনাথকে জিগগেস করল, ‘এ কে? কক্ষে  
মতিরস্তু শুনে মনে হচ্ছে বৈষ্ণব সন্ন্যাসী, কৃষ্ণভক্ত। এর পূর্বাঙ্গম  
কোথায়?’

‘নবদ্বীপে।’ বললে গোপীনাথ, ‘জগন্নাথ মিশ্রের পুত্র, নীলাশ্বর  
চক্রবর্তীর দৌহিত্র। নীলাশ্বর তোমার বাবার সহপাঠী ছিলেন—’

তবে আর কথা কী। যিনি এসেছেন তিনি সার্বভৌমের নিজ  
জন। আত্মার আত্মীয়।

‘সহজেই তুমি আমার পূজ্য।’ গৌরহরিকে বললে সার্বভৌম, ‘আর  
যেহেতু তুমি সন্ন্যাস নিয়েছ, আমি তোমার দাস ছাড়া কিছু নই।’

গৌরহরি বিষ্ণু স্মরণ করলেন। বললেন, ‘সে কী বলছেন?  
আপনি জগদগুরু, সর্বলোকের হিতকর্তা। সন্ন্যাসীদেরও বেদান্ত  
পড়ান আপনি। আমিও সন্ন্যাসী, বালক সন্ন্যাসী, সুতরাং আপনি  
আমারও গুরু। আপনার সঙ্গ পাবার জন্মেই আমি এখানে এসেছি।  
মন্দিরে আজ যা বিপদে পড়েছিলাম, আপনি না থাকলে আর নিস্তার  
ছিল না।’

‘তুমি আর একা-একা যেওনা মন্দিরে।’ সার্বভৌম সাবধান  
করে দিল : ‘হয় আমাকে সঙ্গে নিও, নচেৎ আমাকে বোলো, আমি  
লোক দিয়ে দেব।’

‘না, আমি মন্দিরের অভ্যন্তরে যাব না, গরুড়স্তম্ভের পিছনে  
দাঁড়িয়ে দর্শন করব।’ প্রভু আশ্বস্ত করলেন।

সার্বভৌম গোপীনাথকে বললে, ‘দর্শনকালে প্রভুর সঙ্গী হবে।’  
আরো বললে, ‘আমার মামীর বাড়িটি নির্জন, সেখানে গুর থাকবার  
বন্দোবস্ত করো। যা প্রয়োজন সব যোগাড় করে দাও।’

প্রভু ও তাঁর সঙ্গীরা সার্বভৌমের মামীর বাড়িতে গিয়ে উঠলেন।

গোপীনাথ একদিন প্রভুকে শযোখান দর্শন করিয়ে আনল।  
জগন্নাথ যখন প্রথম শযা থেকে উঠছে, সেই সময়কার দর্শন।

মুকুন্দ দত্ত নিয়ে এল সার্বভৌমের কাছে।

‘এ সন্ন্যাসী প্রকৃতি-বিনীত, দেখতে সুপুরুষ। এঁর উপর আমার  
প্রীতি ক্রমশই বাড়ছে, বেড়ে চলেছে। কোন সম্প্রদায়ের সন্ন্যাসী  
ইনি? এর নাম কী?’ গোপীনাথকে লক্ষ্য করল সার্বভৌম।

গোপীনাথ বললে, ‘এঁর নাম শ্রীকৃষ্ণচৈতন্য। গুরু কেশব  
ভারতী।’

‘নামটি সর্বোত্তম হয়েছে।’ বললে সার্বভৌম, ‘কিন্তু সম্প্রদায়টা  
মধ্যমশ্রেণীর।’

‘কিন্তু প্রভুর সে বাহ্যাপেক্ষা নেই।’ বললে গোপীনাথ, ‘কোন  
সম্প্রদায় ভালো, কোনটা মন্দ, কোনটা মানী বা অমানী, এ সব  
বিচার করবার অবকাশ ছিল না। কোনো প্রকারে সংসার ত্যাগ  
করা উদ্দেশ্য, তাই সন্ন্যাস গ্রহণের সময় সম্প্রদায় নিয়ে মাথা  
ঘামাননি। মিথ্যে গৌরবের প্রতি মোহ নেই এক বিন্দু।’

‘কিন্তু এর তো এখন পূর্ণ যৌবন।’ সার্বভৌম চিন্তাধিত মুখে  
বললে, ‘এ সন্ন্যাসধর্ম রক্ষা করবে কী করে? চঞ্চল ইন্দ্রিয়কে কী  
করে শাসনে রাখবে? তবে এক কাজ করি। ওকে নিরন্তর বেদান্ত  
পড়াই, বৈরাগ্য অদ্বৈতমার্গে নিয়ে যাই।’

অদ্বৈতমার্গ শঙ্করাচার্যের সাধনপথ। কী বলে অদ্বৈতমার্গ?  
বলে—জীবে ব্রহ্মে ভেদ নেই। রজ্জুতে যেমন সর্পভ্রম, তেমনি ব্রহ্মের  
বদলে ভুল করে জগৎ প্রপঞ্চকে দেখছি। ব্রহ্মই বস্তুরূপে প্রতিভাত।  
আর কী বলে? বলে, ব্রহ্ম নির্বিশেষ, তার কোনো আকার নেই,  
শক্তি নেই, গুণ নেই, শুধু সে এক বৈচিত্র্যহীন আনন্দসত্তা। আর  
এই ব্রহ্মের সঙ্গে সাযুজ্যপ্রাপ্তিই অদ্বৈতবাদীর লক্ষ্য।

আর বৈরাগ্য অদ্বৈতমার্গ অর্থ, যে অদ্বৈতমার্গে বৈরাগ্যের স্মরণটি  
সবলে উচ্চারিত।

‘আর যদি উনি অনুমতি করেন’, বললে সার্বভৌম, ‘ওকে দিয়ে নতুন করে উত্তম সম্প্রদায় থেকে সন্ন্যাস নেওয়াই।’

কথা শুনে গোপীনাথ ও মুকুন্দ দুজনেই বিমর্ষ হল। সার্বভৌম বোধ হয় মনে করেছে—এ একজন সামান্ত সন্ন্যাসী, বিচার-বিবেচনা না করেই সন্ন্যাস নিয়ে ফেলেছে। সম্প্রদায়ের তাৎপর্যের ধার ধারেনি।

তখন গোপীনাথ গর্জন করে উঠল : ‘ভট্টাচার্য, তুমি এঁর মহিমা কিছুই জানো না, বোকণি কিছু। ইনিই ভগবন্তার শেষ সীমা, চরম বিকাশ। ইনিই স্বয়ং ভগবান। তা এ কথা অজ্ঞ লোকে বিশ্বাস করবে না। বিজ্ঞজনেই পারবে অনুভব করতে।’

‘কিন্তু কেন?’ সার্বভৌমের শিষ্যের দল কোলাহল করে উঠল : ‘কেন ওকে ঈশ্বর বলবে? প্রমাণ কী?’

‘যাঁরা তত্ত্বজ্ঞ বিজ্ঞ ব্যক্তি, তাঁদের অনুভবই প্রমাণ।’ বললে গোপীনাথ, ‘তাঁরা সাধন দ্বারা অনুভব করেছেন কী ঈশ্বর-লক্ষণ?’

‘তার অর্থ, অনুমান করে ঈশ্বরতত্ত্ব স্থাপন করে।’ শিষ্যের দল বললে, ‘ঘট দেখে যখন কুস্তকারকে অনুমান করি, তেমনি জগৎ সংসার দেখে এর এক সৃষ্টিকর্তাকে অনুমান করব?’

‘এই অনুমানে ঈশ্বরের অস্তিত্ব হয়তো বা নির্ধারণ করা যেতে পারে, কিন্তু অনুমানে ঈশ্বরকে, ঈশ্বরতত্ত্বকে জানা যায় না।’ গোপীনাথ বললে, ‘অনুমানে নয়, প্রত্যক্ষজ্ঞানেই ঈশ্বরতত্ত্ব গোচরীভূত। কিন্তু যাই বলো, ঈশ্বরের কৃপা না হলে ঈশ্বরতত্ত্বজ্ঞান অসম্ভব।’

‘শিষ্য কহে—ঈশ্বরতত্ত্ব সাধি অনুমানে।

আচার্য কহে—অনুমানে নহে ঈশ্বরজ্ঞানে ॥

অনুমান প্রমাণে নহে ঈশ্বরতত্ত্ব জ্ঞানে।

কৃপা বিনে ঈশ্বরতত্ত্ব কেহো নাহি জানে ॥

ঈশ্বরের কৃপালেশ হয় ত যাহারে।

সেই ত ঈশ্বরতত্ত্ব জানিবারে পারে ॥’



যে দুটি চরণকমলের প্রসাদলেশ পেয়েছে, সেই জানতে পারে ঈশ্বরমহিমার স্বরূপ। সেই তো তাঁকে দেখতে পারে চোখ দিয়ে, শুনতে পারে কান দিয়ে, ছুঁতে পারে হাত দিয়ে। নচেৎ একাকী থেকে শুধু যোগাভ্যাসে বা শাস্ত্রালোচনায় বা বিচিত্র বিচারে বা অন্তঃসন্ধানে তাঁর কিছুই নির্ণয় হয় না।

সার্বভৌমকে লক্ষ্য করে গোপীনাথ বললে, 'তুমি শাস্ত্রবেত্তা হতে পারো, কিন্তু তোমাতে ঈশ্বরের রূপালেশ নেই, তাই সাধ্য কি তুমি ঈশ্বরতত্ত্ব বোঝো। তোমার শাস্ত্রই তো বলে, শুধু পাণ্ডিত্যে বোঝা যায় না ঈশ্বরতত্ত্ব।'

'কিন্তু তোমাতে তাঁর রূপা হয়েছে, তারই বা প্রমাণ কী?' সার্বভৌম রুক্ষস্বরে বললে।

'প্রমাণ, আমি বস্তুকে বস্তু বলে জেনেছি। আর তুমি এঁর শরীরে মহাপ্রেমাবেশ দেখেও চিনতে পারছ না। তুমিই বলো, এ মহাপ্রেমাবেশ কি ঈশ্বরলক্ষণ নয়? তাই তো বলি, আমাতে রূপা আছে, তোমাতে নেই। তোমাতে শুধু মায়ী, তুমি ময়াচ্ছন্ন।'

হাসল সার্বভৌম। বললে, 'রুষ্ট হয়ে না। আমি শাস্ত্রদৃষ্টে কথা বলি। তত্ত্বনির্ণয়ের অনুরোধে বিচার-বিতর্ক করতে ভালোবাসি। আমার বক্তব্য আমাকে বলতে দাও।'

'বলো।'

'শাস্ত্রে আছে, কলিকালে বিষ্ণুর অবতার নেই। সত্য, জ্যোতা ও স্বাপর—এই তিন যুগেই তাঁর অবতার হয়, তাই তো বিষ্ণুর নাম ত্রিযুগ। স্মৃতরাং তোমার ঐ শ্রীচৈতন্য অবতার হতে পারেন না।' সার্বভৌম গম্ভীর হল : 'তবে তিনি যে মহাভাগবত, তাতে সন্দেহ নেই।'

'তোমার দেখি অভিমানের শেষ নেই। মহাভারত ও ভাগবত—এই দুই মহাশাস্ত্রের কথা কি ভুলে গিয়েছ? তারা বলছে, কলিতে লীলাবতার না হতে পারে, কিন্তু যুগাবতার হতে বাধা নেই। কিন্তু

‘কীৰ্ত্তনং যুগাবতার নন, তিদি স্বয়ং ভগবান।’ গোপীনাথ  
 বিষ্ণুসুখে বললে, ‘তোমাকে কী বোকাব, উষর ভূমিতে বীজ বপন  
 নিষ্ফল। স্বধন তোমার উপর তাঁর কৃপা হবে, তখন বুঝবে আমার  
 সিদ্ধান্ত ঠিক কি না।’

হাসতে লাগল সার্বভৌম।

ভক্তিই পরম পুরুষার্থ। অকামঃ সর্বকামো বা মোক্ষকাম  
 উদারধীঃ। তীজ্ৰেণ ভক্তিযোগেন যজ্ঞেত পুরুষং নরং ॥’ যার কামনা  
 নেই, যার আবার সকল কামনাই বর্তমান, কিংবা যে উদারবুদ্ধি  
 মোক্ষকামী, সকলেই একান্ত ভক্তিতে পরমপুরুষ বিষ্ণুর উপাসনা  
 করবে। অগ্ৰথা সমস্ত বিফল।

সূৰ্য প্রত্যহ উদিত ও অস্তমিত হয়ে মানুষের পরমায়ু বৃথা হরণ  
 করছে। যার জীবন হরিগুণকীর্ত্তনে কেটে যায় তারই আয়ু ফলায়িত।  
 পাদপেরও তো জীবন আছে। ভদ্রাও তো নিখাস-প্রথাসের ক্রিয়া  
 করে। গ্রাম্য পশুরাও তো আহাৰ-বিহারে অভ্যস্ত। কিন্তু হরিনাম  
 যার কর্ণপথে কখনো প্রবেশ করেনি সে পশু ছাড়া আর কী। যে  
 কখনো হরিকথা শোনেনি তার শ্রোত্রদ্বয় বিবরমাত্র। যে জিহ্বা  
 হরিগুণগানে বিরত তা ভেকজিহ্বা। যে মাথা যুকুলের পদারবিন্দে  
 প্রণত নয়, তা পট্টবস্ত্রে বা কিরীটে স্মশোভিত হলেও দেহের বৃথা  
 ভার মাত্র। যে হাত হরিচরণে কুসুমাজলি দেয় না তা কাঞ্চনবলয়ে  
 ভূষিত হলেও মৃত মানুষের হাতের মতই অসার। যে চোখ হরির  
 রূপ দেখে না তা ময়ূরপাখায় আঁকা চোখের মতই অনর্থক। চরণ  
 থাকলেও যে হরিক্ষেত্রে যায় না সে তো নিশ্চল বৃক্ষমূল। আর যে  
 হরিপাদলগ্ন তুলসীর আশ্রয় না নেয় তার খাস থাকলেও সে শব-  
 স্বরূপ। আর পাষণতুল্য কঠিন তার হৃদয় যার হরিনামে ভক্তি-  
 বিকার জন্মে না আর বিকার জন্মালেও নয়নে অক্ষ আসে না আর  
 অন্ধ লাগে না রোমহর্ষ।

ভক্তিমার্গই সমীচীন মঙ্গলদায়ক। একমাত্র অকুতোভয়।



প্রভু সার্বভৌমের মন্তব্য শুনলেন। তাঁর নামটি ভালো, কিন্তু সম্প্রদায় ভালো নয়। বয়স অল্প, ইন্ডিয়ানমন অসাধ্য! ভালো একজন সন্ন্যাসী ডাকিয়ে নতুন করে তাঁর সংস্কার করে নেবে। শুধু তাই নয়, সার্বভৌম নিজে ক্লেশ করে তাঁকে বেদ পড়াবেন, ঢুকিয়ে দেবেন অদ্বৈতমার্গে।

প্রভু খুব খুশি, বললেন, 'ভট্টাচার্যের অসীম অনুগ্রহ।'

'অনুগ্রহ?' রেগে উঠল মুকুন্দ। 'অবজ্ঞা—এ অবজ্ঞা ছাড়া কিছু নয়।'

'না, না, অবজ্ঞা কেন হবে? ভট্টাচার্য আমার মঙ্গল চান, আমার সন্ন্যাস-রক্ষা করবার জন্তেই তাঁর এই করুণা।'

মন্দিরে প্রভুকে নিয়ে এল সার্বভৌম। বললে, 'তুমি সন্ন্যাসী, তুমি সর্বদা বেদাস্ত পড়বে, বেদাস্ত শুনবে। তাই সন্ন্যাসীর বিধি, সন্ন্যাসীর ধর্ম।'

'আপনি যা বলবেন, তাই হবে। তাই করব।' বিনয়ে বললেন গৌরহরি।

সার্বভৌম বেদাস্ত পড়াতে বসল।

ছাত্র কী গভীর মনোযোগের সঙ্গে শুনছে। তদগত-তন্ময়। কথাটি কইছে না।

সাত-সাত দিন পড়ানো হচ্ছে, একটিও কথা নেই ছাত্রের মুখে। সামান্য একটা প্রশ্নও নয়। সন্ন্যাসী কি তবে বদ্ধ পাগল, না, নির্বোধ? ভালো-মন্দ কিছুই তবে বলছে না কেন? তবে কি দাস্তিক? তাও তো মনে হবার নয়। অমন নম্র ও লাজুক ছাত্র দেখা যায় না।

‘সাত দিন ধরে পড়ছ, হাঁ-না কিছুই বলছ না কেন?’ প্রায় বিরক্ত হয়েই জিগগেস করল সার্বভৌম। ‘বুঝছ কি বুঝছ না, অন্তত সেটুকু বুঝতে দেবে তো?’

‘আমার শোনবার কথা, আমি শুনে যাচ্ছি।’ বললেন গৌরহরি।

‘আর আমি যে ব্যাখ্যা করছি, সঙ্গে-সঙ্গে তা বুঝছ?’

‘আমি মূর্থ, আমার পড়াশোনাও কিছু নেই, তাই বুঝছি না কিছুই।’

‘না বুঝলে জিগগেস করতে হয় তো?’ ভট্টাচার্য মুখ-চোখ রুক্ষ করে উঠলেন : ‘চুপচাপ বসে থাকলে চলে কী করে?’

বিনম্র মুখে প্রভু বললেন, ‘বেদান্তসূত্রের অর্থ তো নির্মল, কিন্তু আপনার ব্যাখ্যাই মেঘাচ্ছন্ন।’

বলে কী সম্ম্যাসী? নিশ্চল পাথর হয়ে গেল সার্বভৌম।

‘সূত্রের অর্থ স্পষ্ট, কিন্তু শঙ্করাচার্য কল্পনাবলে অগ্ররকম ভাষ্য করেছেন, আর আপনার ব্যাখ্যা শঙ্করভাষ্যের অনুযায়ী।’ নম্র অথচ দৃঢ়স্বরে বললেন গৌরহরি। ‘যতক্ষণ শঙ্করভাষ্য থাকবে, ততক্ষণ ঠিক-ঠিক অর্থবোধ হবে না।’

শঙ্করভাষ্যে বলা হয়েছে, একমাত্র নিষ্ক্রিয় নিৰ্গুণ ব্রহ্মই শ্রুতিসিদ্ধ। ব্রহ্ম নিরাকার, নির্বিশেষ, সর্বোপাধিবর্জিত। আর এই ব্রহ্মবস্তুই একমাত্র জ্ঞানগম্য। সূতরাং ভক্তি-উপাসনা অর্থহীন।

এ একরকমের নাস্তিক্য। সার্বভৌম ভট্টাচার্য এই মতের পরিপোষক।

খণ্ডন করতে বসলেন গৌরহরি।

ব্রহ্ম-র অর্থ কী? যিনি বড়, বৃহদ্বস্তু, তিনিই ব্রহ্ম। আবার যিনি অশ্রুকে বড় করেন, তিনিও ব্রহ্ম। সূতরাং ব্রহ্মে শক্তি বর্তমান, শক্তি না থাকলে বড় করেন কী করে? সূতরাং ব্রহ্ম শক্তিমান। আবার যিনি বড়, তিনি সব বিষয়ে বড়, তিনি সর্ববৃহত্তম। আর

বৃহস্পতি গুণ ছাড়া কিছু নয়। সুতরাং তিনি সগুণ, সবিশেষ। আর সবিশেষ হলেই সাকার। শক্তি আছে বলেই তাঁর বৈভব আছে, প্রকাশবৈচিত্রী আছে, আর এই প্রকাশবৈচিত্রীই তাঁর ঐশ্বর্য। সুতরাং ব্রহ্ম সর্বৈশ্বর্য-পরিপূর্ণ ভগবান। ‘সর্বৈশ্বর্য-পরিপূর্ণ স্বয়ং ভগবান। তাঁরে নিরাকার করি করহ ব্যাখ্যান?’

শ্রুতি ব্রহ্মকে নিরাকার বলেও ধরে রাখতে পারেনি নিরাকারে। ব্রহ্মের হাত নেই, পা নেই, চোখ নেই বলেছে, কিন্তু সেই সঙ্গে আবার বলেছে, তিনি গ্রহণ করেন, তিনি চলেন, তিনি দেখেন। হাত না থাকলে ধরেন কী করে? পা না থাকলে চলেন কী করে? নিরিন্দ্রিয় হলে ইন্দ্রিয়ের কাজ থাকে কেন? আরো দেখুন। বলছে, এই আত্মা বহু অধ্যয়নে পাওয়া যায় না, না বা মেধায়, না বা বহুবেদ-শ্রবণে, এই আত্মা যাকে বরণ করেন, কৃপা করেন, একমাত্র তারই কাছে ইনি স্বীয় তম্বু বা স্বরূপকে প্রকাশ করেন। তা হলে আত্মার তম্বু আছে, মানে শরীর আছে। যদি তিনি অশরীরী, তবে আবার তিনি সতনু হন কী করে? এর সমাধান কী? এর সমাধান হচ্ছে এই ব্রহ্মের প্রাকৃত শরীর নেই, প্রাকৃত আকার নেই, প্রাকৃত ইন্দ্রিয় নেই। ব্রহ্মের দেহ শুদ্ধসত্ত্বময়, চিন্ময়, অপ্রাকৃত। ‘তাঁহার বিভূতি দেহ—সব চিদাকার।’ সুতরাং শ্রীকৃষ্ণ অপ্রাকৃত, অনন্তগুণসমম্বিত ও পূর্ণানন্দঘনমূর্ত্তি।

শঙ্কর যে ব্রহ্মকে নিরবয়ব বলতে চেয়েছে, তাতে তার দোষ নেই, কেননা, ভগবানের আদেশেই সে ও-রকম অর্থ করেছে। কিন্তু তাই বলে তুমি যেন ভগবানের নিন্দা শুনো না। তুমি যেন বোলো না ভগবানের ঐশ্বর্য নেই, ধাম নেই, লীলা নেই, লীলাপত্রিকর নেই। তাঁর বিগ্রহও সচ্চিদানন্দাকার। ঈশ্বরের অপ্রাকৃত দেহ বা বিগ্রহ যে না মানে, সে দর্শন-স্পর্শনের অযোগ্য। ভগবানের নিন্দা শুনলে যে স্থানত্যাগ করে উঠে না যায়, সে তার সমস্ত সুকৃতি থেকে বিচ্যুত হয়।

ঈশ্বরই জগৎরূপে পরিণত হয়েছেন। বলতে পারো, জগৎ যদি ব্রহ্মের পরিণাম হয়, তবে তো ঈশ্বর বিকারী হলেন। না, নিজের অচিন্ত্যশক্তির প্রভাবে ঈশ্বর জগৎরূপে পরিণত হয়েও অবিকৃত থাকেন। স্তম্ভক-মণি সোনার ভার প্রসব করে, কিন্তু তৎসঙ্গেও তার ক্ষয় বা বিকার ঘটে না। জগৎ ভ্রম নয়, মিথ্যা নয়, শুধু জীবদেহে আত্মবুদ্ধিই মিথ্যা। অদ্বৈতবাদীরা যে ভ্রম বলে, সেটাই ভ্রম। যা চোখের সামনে, চারদিকে দেখছি, তার অস্তিত্ব আদৌ নেই, এ হতে পারে না। অস্তিত্ব আছে, তবে এ নশ্বর, বিনাশশীল। অস্তিত্বই যদি না থাকে, তবে সৃষ্টি কী, ধ্বংসই বা কার ?

প্রণবই ব্রহ্ম। ওম্ ইতি ব্রহ্মঃ। পরিদৃশ্যমান জগৎই ওঙ্কার। ওঙ্কারই সর্বাশ্রয়, সর্বব্যাপক। যেহেতু প্রণব ব্রহ্মের স্বরূপ, সমস্ত বিশ্ব প্রণবের অন্তর্ভুক্ত। সুতরাং প্রণবই বৃহত্তম বাক্য, আর সকল বাক্য প্রণবের চেয়ে ক্ষুদ্র। অথচ অদ্বৈতবাদী বলে, 'তত্ত্বমসি'-ই মহাবাক্য। প্রণব তো ঈশ্বরকেও বোঝায়, কিন্তু তত্ত্বমসি তা বোঝায় না। সুতরাং 'তত্ত্বমসি' প্রণবের চেয়ে ছোট। তত্ত্বমসি তাই মহাবাক্য হতে পারে না। অংশ কি কখনো পূর্ণের চেয়ে বড় হয় ?

তত্ত্বমসি-র মানে কী ? শব্দর জীবে-ব্রহ্মে অভেদ করতে চেয়েছিল, তাই সে মনে করেছে, তুমি জীব, তুমিই সেই ব্রহ্ম। কিন্তু ও-কথার আরেক অর্থও বিধেয়। শোনো। তস্য ত্বম্—তত্ত্বম্। অর্থাৎ তাঁর তুমি। আর অসি অর্থ হও। সর্বসাকুল্যে অর্থ হচ্ছে, হে জীব, তুমি ব্রহ্মের হও। তুমি ব্রহ্মের আছ। তুমি ব্রহ্ম নও, তুমি ব্রহ্মের একজন। তুমি তাঁর দাস, দাসাত্মদাস। আর এ অর্থই ভক্তি-মার্গের।

এতক্লেণে তবে এসে গেল ভক্তির কথা। সম্বন্ধ বা প্রতিপাত্ত বিষয় হল ভগবান, অভিধেয় বা জীবের কর্তব্য হল সাধন-ভক্তি, আর প্রয়োজন হল ভগবৎপ্রেম। এই সম্বন্ধ, অভিধেয় আর প্রয়োজন—তিন বস্তুই বেদের বর্ণনীয় ব্যাপার।

কী রকম ভগবান ? মধুর, মধুর, মধুর হতে মধুর—এর বেশি আর কে কী বলতে পারে ? আর ভগবানের সঙ্গে জীবের সম্বন্ধ, সেব্য-সেবক সম্বন্ধ। আর, ভক্তের প্রীতি-রস-আস্বাদনেই ভগবান আনন্দিত। সাযুজ্য-মুক্তিতে নির্বিশেষ ব্রহ্মে আনন্দ কই ? সেখানে কোথায় তাঁর প্রেমবশুত্কার অবকাশ ? কোথায় মাধুর্যের তরঙ্গ-লীলা ?

কী রকম অভিধেয় ? অভীষ্টকে পাবার জগ্গে যে উপায়, তাই অভিধেয়। ভগবানকে কী করে জানা যায়, কী করে দেখা যায় ? ভগবানকে জানলে আর ভয় থাকে না। সমস্ত পাশ-ক্রেশ নষ্ট হয়, জন্ম-মৃত্যুতে ছেদ পড়ে। আর দেখলেও তাই। হৃদয়গ্রন্থি ছিন্ন হয়, সমস্ত সংশয় দূরে যায়, কর্মের ক্ষয় হয়ে সংসার-গতাগতির উপশম ঘটে। কিন্তু উপায় কোথায় ? উপায় উপাসনায়।

যোগমার্গে সকলের অধিকার নেই। যে মনকে বশীভূত করতে পারে, সেই যোগের যোগ্য। যোগের জগ্গে শুচি দেশ ও স্মৃথাসনের দরকার। যোগ তাই অগ্গ-নিরপেক্ষ নয়। জ্ঞান সম্বন্ধেও তাই। জ্ঞানও ফলবস্ত হতে ভক্তির অপেক্ষা রাখে। জ্ঞানও অধিকারভেদের প্রশ্ন তোলে। শুধু শুদ্ধচিত্ত লোকই জ্ঞান-সাধনের অধিকারী।

সুতরাং যোগ বা জ্ঞান অভিধেয় হলেও, শ্রেষ্ঠ অভিধেয় নয়।

শ্রেষ্ঠ অভিধেয় ভক্তি। ভক্তি স্বতন্ত্র, অগ্গনিরপেক্ষ। সার্বত্রিক। সমস্ত অবস্থায়, সমস্ত স্থানে, সমস্ত সময়ে। সমস্ত নিয়ম-নিষেধের নাগালের বাইরে। ভক্তি সবচেয়ে সহজ, সবচেয়ে স্বাভাবিক, সবচেয়ে নির্ভরযোগ্য।

আর প্রয়োজন—কিসের প্রয়োজন ?

যে উদ্দেশ্যসাধনের জগ্গে উপাসনা, তাই প্রয়োজন। উপাসনায় কী চাই ? সংসারভয় থেকে, ত্রিতাপজ্বালার থেকে উদ্ধার চাই। কিন্তু কে উদ্ধার চায়, যদি সে বোঝে যে জন্ম-জন্ম হৃদয়ের মধু দিয়ে পরমমধুরের সেবা করতে পারবে ? নৃসিংহকে কী বলেছিল প্রহ্লাদ ?

বলেছিল, কর্মকলে আবার হাজার-হাজার জন্ম ঘুরে বেড়াতে হবে, কিন্তু যে-জন্মে যেখানেই থাকি না কেন, তোমাতে আমার ভক্তি যেন অবিচ্ছিন্ন থাকে। ইন্দ্রিয়ভোগবিষয়ে অবিবেকীর যেমন অবিচ্ছিন্ন স্রীতি, তেমনি আমার হৃদয়ে যেন তোমার প্রতি সে রকম রক্তি থাকে, আর সেই রক্তিতেই তোমাকে স্মরণ করি অহর্নিশ। রসস্বরূপকে পাওয়া অর্থই সেব্যরূপে পাওয়া। আর এই সেবা-বাসনাকে উদ্বোধিত করবার জন্মেই উপাসনা। আর যখন সেবা থেকে আনন্দ, সেই আনন্দই প্রেম। প্রেমই পরম প্রয়োজন।

এই তিন বস্তু,—সম্বন্ধ, অভিধেয় আর প্রয়োজন ছাড়া আর যা-যা শঙ্করাচার্য বলেছে, সমস্তই কল্পনাবলে। শঙ্করাচার্য মহাদেবের অবতার। মহাদেব হয়ে শঙ্কর বেদের কল্পিত অর্থ কেন করবেন? ঈশ্বরের আদেশে। শ্রীকৃষ্ণ বলেছেন শিবকে, তুমি আগমশাস্ত্রদ্বারা সকলকে আমার থেকে বিমুখ করো আর আমাকেও গোপন করে রাখো, যাতে সকলে বিষয়মুখে মগ্ন হয়ে প্রজ্ঞাবুদ্ধিরই চেষ্টা করবে। ‘আচার্যের দোষ নাহি ঈশ্বর-আজ্ঞা হৈল। অতএব কল্পনা করি নাস্তিক শাস্ত্র কৈল ॥’

সমস্ত শুনে সার্বভৌম জড়বৎ নিশ্চল।

নির্বিশেষবাদ খণ্ডন হল। স্থাপন হল স বিশেষবাদ। সম্বন্ধ ভগবান, অভিধেয় ভক্তি, প্রয়োজন প্রেম, সাব্যস্ত হল নতুন তত্ত্ব। সার্বভৌমের মুখে কথা সরে না। একেই আমি কিনা অর্বাচীন বালক ভেবেছিলাম।

সার্বভৌমের বিশ্বয়ের ভাব লক্ষ্য করলেন গৌরহরি। বললেন, ‘এতে বিশ্বয়ের কী আছে? ভগবানে ভক্তিই পরম পুরুষার্থ।’

পুরুষার্থ চারটি। ধর্ম, অর্থ, কাম আর মোক্ষ। পঞ্চম বা পরম পুরুষার্থই ভক্তি বা ভগবৎপ্রেম। এই প্রেম ব্রহ্মানন্দের চেয়েও লোভনীয়। এই প্রেম মহাধন। এই প্রেম কৃষ্ণের মাধুর্যরসের আস্থাদান করায়।



‘প্রভু কহে—ভট্টাচার্য ! না কর বিস্ময় ।

ভগবানে ভক্তি—পরম পুরুষার্থ হয় ॥’

যারা আশ্চর্য্যম অর্থাৎ যারা আশ্চর্য্যে রমণ করে, অর্থাৎ যারা  
মায়াযুক্ত, যারা নিগ্রহ অর্থাৎ যারা অবিজ্ঞানগ্রন্থিত, তারাও  
শ্রীহরিতে অহেতুক ভক্তি করে থাকে । জ্ঞানবে এমনই শ্রীহরির গুণ ।

‘দয়া করে এই শ্লোকটির বিস্তৃত ব্যাখ্যা করুন ।’ সার্বভৌম  
হঠাৎ উৎসাহিত হয়ে উঠল ।

কেন এই চাঞ্চল্য ? সার্বভৌমও কি ভক্তির কথা শুনতে চায় ?

প্রভু বললেন, ‘তুমি আগে ব্যাখ্যা করো ।’

বিবিধ রকম অর্থ করল সার্বভৌম ।

‘তুমি বৃহস্পতি’ । বললেন প্রভু, ‘এমন কেউ নেই তোমার মত  
শাস্ত্র-ব্যাখ্যা করতে পারে । কিন্তু তুমি নয় রকম অর্থ করলে বটে,  
কিন্তু আমার মনে হয় ওদের বাইরে আরো অর্থ নিহিত আছে ।’

আঠারো রকম অর্থ করলেন প্রভু । সার্বভৌমের নয় অর্থের  
একটা অর্থও না ছুঁয়ে ।

এই নবীন সন্ন্যাসী নিশ্চয়ই মানুষ নয় । সার্বভৌমের চিন্তে দৈন্ত  
উপস্থিত হল, ধুলো হয়ে গেল পাণ্ডিত্যের অভিমান । জাগল  
আত্মধিকার ।

জগতে ও তোমাতে ভেদ না থাকলেও, হে নাথ, আমি জানি,  
আমি তোমারই অধীন । আমি তোমার থেকেই জন্ম গ্রহণ করেছি  
কিন্তু তুমি আমার অধীন নও, তুমি আমার থেকে সজ্ঞাত হওনি ।  
তরঙ্গ ও তরঙ্গিত সমুদ্রে ভেদ না থাকলেও এ নিশ্চিত যে তরঙ্গই  
সমুদ্রের, কিন্তু সমুদ্র তরঙ্গের নয় ।

অহঙ্কার ছাড়া আর কী আছে সন্ন্যাসে ? ‘বুঝ দেখি বিচারিয়া  
কি আছে সন্ন্যাসে । প্রথমেই বন্ধ হয় অহঙ্কারপাশে ॥’ দণ্ড ধরেই  
নিজেকে মহাজ্ঞানী ভাবে, কোথাও হাত জোড় করে না । ভগবান  
অন্তর্ধামীরূপে নিজ অংশে সকল দেহেই প্রবিষ্ট আছেন তবু ধর্মধর্মী

সন্ন্যাসীরা তাদের প্রশাম করে না। জীবের স্বভাববর্ম ঈশ্বরভজন, তা না করে নিজেকে নারায়ণ বলে মানে। গর্ভবাসে যে ঈশ্বর তাকে রক্ষা করলেন, যার প্রসাদে তার জ্ঞান বৃদ্ধি হল, যার ইচ্ছায় সৃষ্টি-স্থিতি প্রলয় ঘটছে, সে আর কেউ নয়, সন্ন্যাসী নিজে। 'নিজা হইলে আপনে কে ইহাও না জানে। আপনারে নারায়ণ বোলে হেন জনে।' যে জগতের পিতা, মাতা, ধাতা, পিতামহ, তাকে যে ভক্তি করে সেই তো স্পুত্র। পুত্র কি নিজেই পিতা ?

'তবে প্রভু, তুমি সন্ন্যাসী কেন ?'

আমি 'সন্ন্যাসী' নই, আমি কৃষ্ণবিরহে উন্মাদ।

'প্রভু বোলে শুন সার্বভৌম মহাশয়।

সন্ন্যাসী আমারে নাহি জানিহ নিশ্চয় ॥

কৃষ্ণের বিরহে মুঞ্জি বিক্ষিপ্ত হইয়া।

বাহির হইলুঁ শিখা সূত্র ঘুচাইয়া ॥

সন্ন্যাসী করিয়া জ্ঞান ছাড় মোর প্রাতি।

কৃপা কর যেন মোর কৃষ্ণে হয় মতি ॥'

প্রভুই কৃপা করলেন। সার্বভৌমের উপলব্ধি হল, এ সন্ন্যাসী কৃষ্ণ ছাড়া কেউ নয়। পাণ্ডিত্যগর্বে প্রথমেই চিন্তে পারিনি। আচ্ছন্ন হয়ে ছিলাম।

গর্ব নষ্ট হতেই সার্বভৌমের চিন্তে ভগবৎ-তত্ত্ব স্কুরিত হল। দৃষ্টিতে লাগল দিব্যস্পর্শ।

দেখল, প্রভু তার সামনে ষড়্ভুজমূর্তিতে দাঁড়িয়ে আছেন।

পদতলে লুটিয়ে পড়ল সার্বভৌম। তার হৃদয়ের উপর করুণাসমুদ্র প্রভু তাঁর পাদপদ্ম রাখলেন। সার্বভৌমের সর্বদেহে অষ্ট সাত্বিক বিকার দেখা দিল। কাঁদতে লাগল দীনহীনের মত।

শবর পেয়ে ছুটে এল গোপীনাথ। কী ভীষণ কথা, সার্বভৌম নাচছে।

'সেই ভট্টাচার্যের এই গতি সম্ভব হল ?' প্রভুকে লক্ষ্য করল

গোপীনাথ : 'সেই গুরুজ্ঞানী তार्কিক পণ্ডিত ভক্তিরসের ভাবুক  
বনে গিয়েছে !'

'সে একমাত্র তোমারই সঙ্গুণে।' বললেন প্রভু, 'তুমি ভক্ত,  
তোমার সান্নিধ্যহেতুই জগন্নাথ একে কৃপা করলেন।'

ভট্টাচার্য প্রভুর স্তুতি করতে লাগল। নির্মম লৌহপিণ্ডকে তুমি  
নবনীতে পরিণত করলে। রজু ছাড়াই বাঁধলে বগ্নহস্তীকে। জলসেক  
ছাড়াই জুড়িয়ে দিলে হৃদয়দাহ। কঠিন বজ্র অমৃতসরস হয়ে উঠল।

'জগৎ নিস্তারিলে তুমি—সেহ অল্পকার্য।

আমা উদ্ধারিলে তুমি এ শক্তি আশ্চর্য ॥

তর্কশাস্ত্রে জড় আমি—যেছে লৌহপিণ্ড।

আমা দ্রবাইলে তুমি প্রতাপ প্রচণ্ড ॥'

একদিন কী হল, প্রভু অতি প্রত্যাষে মন্দিরে গিয়ে শয্যোথান  
দর্শন করলেন। পূজারী মালা আর প্রসাদ দিল প্রভুকে। মালা  
আর প্রসাদ প্রভু বাঁধলেন আঁচলে। ক্রান্ত পায়ে বেরিয়ে এলেন।  
বেগে চললেন রাস্তা দিয়ে।

তখনো সূর্যোদয় হয়নি। সার্বভৌমের ঘরে এসে পৌঁছুলেন।

তখনি সার্বভৌমের ঘুম ভাঙল। আর ঘুম ভাঙতেই সার্বভৌম  
বলে উঠল, কৃষ্ণ, কৃষ্ণ !

কখনো ঘুম থেকে উঠে কৃষ্ণনাম বলিনি তো ! এ কেমন হল ?

সার্বভৌম তাড়াতাড়ি বেরিয়ে এল ঘর থেকে। সামনেই দেখতে  
পেল প্রভুকে। পায়ে লুটিয়ে পড়ে প্রণাম করল।

আঁচল থেকে প্রসাদান্ন খুলে প্রভু দিলেন সার্বভৌমকে। সার্ব-  
ভৌমের প্রাতঃকৃত্য হয়নি, স্নান-সন্ধ্যা হয়নি, মুখধোয়া হয়নি, তবু  
সেই আচারনিষ্ঠ ব্রাহ্মণ ইতস্তত না করে নিমেষে খেয়ে ফেলল  
প্রসাদান্ন। চৈতন্যপ্রসাদে তার সমস্ত জাড্য, সমস্ত বিমুখতা চলে  
গিয়েছে।

প্রসাদ সাধারণ অন্ন নয়, চিন্ময়বস্তু। তাই সে শুকনো হোক,

বাসি হোক, সুরমেশ থেকে আনা হোক, কালহরণ না করেই তা ভোজন করবে। প্রসাদের সাক্ষাতে কোনো সময়ের বিচার করবে না। দিনে-রাত্রে যখনই তা উপস্থিত হবে, তখনই তা ভক্ষণ করবে সানন্দে।

অন্ন-প্রসাদ মহাপ্রসাদ। আর তা কৃষ্ণের উচ্ছিষ্ট বলেই মহাপ্রসাদ। ‘কৃষ্ণের উচ্ছিষ্ট হয় মহাপ্রসাদ নাম।’ মহাপ্রসাদের মাহাত্ম্য কেন? যেহেতু নিবেদিত বস্তুতে কৃষ্ণের অধরামৃতের স্পর্শ লাগে। ‘এই জ্ববে এত স্বাদ কাঁহা হৈতে আইল। কৃষ্ণের অধরামৃত ইহাঁ সঞ্চারিল।’

প্রসাদে সার্বভৌমের শ্রদ্ধা দেখে প্রভু সার্বভৌমকে প্রেমাবেশে আলিঙ্গন করলেন। বললেন, ‘আজ আমার ত্রিভুবন জয় হল, আজ আমি বৈকুণ্ঠে আরোহণ করলাম। সার্বভৌমের মহাপ্রসাদে বিশ্বাস হয়েছে।’

ছজনে নাচতে লাগল বাহুবদ্ধ হয়ে।

‘আজ তুমি নিকপটে কৃষ্ণাশ্রয় হলে।’ বললেন গৌরহরি, ‘আজ কৃষ্ণও তোমাকে নিকপটে দান করলেন প্রেমভক্তি।’ আরো বললেন, ‘তোমার দেহে আত্মবুদ্ধি দূর হল, দূর হল মায়াবন্ধন। তুমি কৃষ্ণ-প্রাপ্তির যোগ্য হলে। আর কথা কী! বেদধর্ম লঙ্ঘন করে তুমি প্রসাদভক্ষণ করেছ।’

সার্বভৌমকে নাচতে দেখে গোপীনাথ পরিহাস করে উঠল। ‘সে কী, তুমি নাচছ কী বলে? আর এ কি নাচ হচ্ছে, না, লাফ দিচ্ছ পাগলের মত? তোমার পড়ুয়ারা কী বলবে? জগজ্জনে কী বলবে?’

সার্বভৌম বললে, ‘যার যা খুশি বলুক, নিন্দে করুক, আমরা বিচার করব না। হরিরসের মদিরা পান করেছি, এখন আমরা নাচব, লাফাব, মাটিতে পড়ব, ধুলোয় গড়াগড়ি দেব—কে আমাদের বাধা দেয়।’

সার্বভৌমের সমস্ত অভিমানের খণ্ডন হল। চৈতন্যচরণ বিনয়  
আর আশ্রয় নেই, ভক্তি ছাড়া আর নেই শাস্ত্রব্যাখ্যা।

জগন্নাথদর্শনে বেরিয়ে সার্বভৌম চলে এল প্রভুর কাছে। বললে,  
'সাধনভক্তির মধ্যে জ্যেষ্ঠ কী তাই জানতে এসেছি।'

প্রভু বললেন, 'নামসংকীৰ্তন। হরিনাম ছাড়া কলিতে আর  
গতি নেই। শুধু হরিনাম করো। হরিনামই কলির সাধন।  
ধ্যান যোগে তপস্যা কলিকালের নয়। কলিকালে নামই পরম  
উপায়।'

জগন্নাথ দর্শন করে সার্বভৌম ঘরে ফিরল। সঙ্গে নামোদর  
আর জগদানন্দ। একটি তালপাতায় প্রভুর উদ্দেশ্যে ছটি শ্লোক  
লিখল। মহাপ্রসাদ আর সেই তালপাতা জগদানন্দের হাতে দিল।  
বললে, 'যাও, প্রভুকে দিয়ে এস।'

জগদানন্দের হাত থেকে তালপাতা নিয়ে আগে পড়ল মুকুন্দ।  
নিজে কণ্ঠস্থ তো করলই, বাইরে প্রাচীরগাত্রে সেই শ্লোক ছটি লিখে  
রাখল।

প্রভুকে সেই তালপাতা দিতেই পড়ে ছিঁড়ে ফেললেন। নিজের  
স্বত্তি চান না শুনতে।

ভক্তকণ্ঠের রত্নহার সেই শ্লোক দুটো কী ?

বৈরাগ্যবিছা আর ভক্তিয়োগ শেখাবার জন্মে করুণাসিদ্ধ পুরাণ  
পুরুষ শ্রীকৃষ্ণচৈতন্যরূপে আবির্ভূত হয়েছেন—আমি তাঁর শরণ  
নিলাম।

যে ভক্তিয়োগ কালপ্রভাবে নষ্ট হতে বসেছিল, তাকে পুনরায়  
প্রতিষ্ঠিত করবার জন্মে শ্রীকৃষ্ণচৈতন্য নামধেয় যিনি আবির্ভূত  
হয়েছেন, তাঁর চরণকমলে আমার চিত্তভঙ্গ প্রগাঢ়রূপে আসক্ত  
হোক।

আরেকদিন এসেছে সার্বভৌম। ভাগবতের ব্রহ্মস্বব পড়ছে।

'কবে ভগবানের কৃপা হবে—এই প্রতীক্ষায় জাগ্রত থেকে স্বীকৃত

কর্মকল ভোগ করতে-করতে যে কায়মনোবাক্যে তোমাকে নমস্কার করে জীবন ধারণ করে, সেই ভক্তিপদে দায়ভাগী থাকে ।’

প্রভু বললেন, ‘কথাটা তো ‘মুক্তিপদে’ আছে, তুমি ‘ভক্তিপদে’ বলছ কেন ?’

‘কল মুক্তি নয়, কল ভক্তি ।’ বললে সার্বভৌম । ‘মুক্তি তো দণ্ড বিশেষ । মুক্তি হলে ভগবৎ-সেবাসুখ থেকে বঞ্চিত হতে হল । যাতে সুখ নেই, তা দণ্ড ছাড়া আর কী ?’

প্রভু হাসলেন, বললেন, ‘পাঠ বদলাবার কী দরকার । মুক্তিপদ অর্থাৎ মুক্তি পদে যার, সাক্ষাৎ ঈশ্বরকে বোঝায় । কিন্তু তোমার মুক্তি-শব্দেই ঘৃণা আর ত্রাস, আর ভক্তি-শব্দে পরমানন্দ ।’

যে শুধু মায়াবাদ পড়ত আর পড়াত, তার মুখে এখন ভক্তিছাড়া কিছু নেই । এ চৈতন্যপ্রসাদ ছাড়া আর কী । লোহাকে ছুঁয়ে যতক্ষণ না তাকে সোনা করা যায়, ততক্ষণ মণিকে কেউ স্পর্শমণি বলে না । সার্বভৌমের বৈষ্ণবতা দেখে এ আর কার সন্দেহ রইল না যে, যে তাকে ছুঁয়েছে সে স্বয়ং ব্রহ্মেন্দ্রনন্দন ।



নীলাচল ছেড়ে দক্ষিণে যাব এবার । তোমরা সম্মতি দাও সকলে ।

‘বা, দক্ষিণ কেন ?’

‘বিশ্বরূপকে খুঁজব ।’

বিশ্বরূপ বোল বছরে সন্ন্যাস নেয়, ছ বছর পরেই পাণ্ডুমূরে দেহত্যাগ করে । শচীমাতা ছাড়া এ খবর সকলের জানা । তবে এ ছল কেন ?

এ ছল বিনয়ের নামাস্তর । দৈহ্যের অবতার প্রভু কি বলতে পারেন—আমি জীবোদ্ধার করতে দক্ষিণে যাব ? সামান্য দস্তের কথাও যে তাঁর মুখে আসবে না ।

‘আমরাও যাব তোমার সঙ্গে ।’

‘না, আমি একলা যাব ।’

সকলের মাথায় যেন বাজ পড়ল । নিত্যানন্দ বললে, ‘তা কী করে হয় ? একলা যেতে কত কষ্ট । তোমার কষ্ট আমরা সহিব কী করে ? দক্ষিণের তীর্থপথ সমস্ত আমার জানা, বলো, আমি তোমার সঙ্গী হই ।’

‘না, কেউ আমার সঙ্গী হবে না ।’

‘কেন, আমার অপরাধ ?’

প্রভু হাসলেন । বললেন ‘তোমাদের গাঢ় স্নেহই আমার বিষয়কণ্টক । তোমাদের গাঢ় স্নেহে আমার কর্মভঙ্গ । তোমাদের জ্ঞে আমি কিছুই ইচ্ছামত করতে পারি না ।’ তাকালেন নিত্যানন্দের দিকে : ‘সন্ন্যাস নিয়ে বৃন্দাবনে যাব স্থির করলাম, তুমি আমাকে শাস্তিপূরে অদ্বৈত-ভবনে নিয়ে এলে । সন্ন্যাসীর প্রধান সহায় যে দণ্ড তা ভেঙে দিলে নীলাচলে । জানি এ সমস্তই তোমার ভালোবাসার প্রকাশ, কিন্তু আমার কার্ঘ্যহানি । সাধ্য নেই তোমার মনে, কারু মনে, আমি ব্যথা দিই । যেহেতু আমি নর্তক, তুমি সূত্রধর । যেমন নাচাও আমাকে, আমি তেমনি নাচি ।’

জগদানন্দ বললে, ‘কিন্তু আমাকে নেবে না কেন ? আমার কী অপরাধ ?’

‘অহর্নিশ তোমার একমাত্র চেষ্টা কী করে আমাকে ভোগে-আরামে রাখবে । কী করে ভালো খাওয়াবে, ভালো পরাবে, শুভে দেবে ভালো বিছানা । কিন্তু আমি কি ও সব নিতে পারি ? অথচ তোমার কথায় রাজি না হলে রাগ করে তুমি তিন দিন আমার সঙ্গে কথা বল না ।’

‘কিন্তু আমার দোষ কী ?’ জিগগেস করল দামোদর ।

‘আমি সন্ন্যাসী আর তুমি ব্রহ্মচারী মাত্র । কিন্তু সর্বক্ষণ আমার উপর শিক্ষাদণ্ড ধরে আছ । তুমি আছ শুধু বিধিনিয়ম পালন করাতে, বিধিনিয়মের বাইরে আমাকে দিতে চাও না স্বাধীনতা । কক্ষের মধ্যে যে আমি একটু শ্রাণ ভরে কাঁদব, তাতেও বাধা ।’ প্রভু ডাকলেন মুকুন্দকে : ‘আর তুমি ? তুমি কিছু বলছ না ?’

মুকুন্দ অশ্রুনেত্রে দাঁড়িয়ে রইল নীরবে ।

‘তোমার দুঃখ দেখে আমার দুঃখ দ্বিগুণাকার হয় । শীতেও আমি তিনবার স্নান করি, মৃত্তিকায় শুই, এ তোমার কাছে অসহ । কিন্তু তুমি স্পষ্ট কিছু বল না, অন্তরে দুঃখী হয়ে বিষাদমুখে দাঁড়িয়ে থাকো । আমি যে নিয়ম পালন করি, তাতে আমার দুঃখ নেই, কিন্তু আমার নিয়মপালনে মুকুন্দ দুঃখ পাচ্ছে—তাই আমার দুঃখ । ওর মুখের দিকে চাইতেও আমার বুক কেটে যায় ।’

যার যা গুণ তাই দোষ বলে কীর্তন করলেন প্রভু । ‘দোষারোপ-  
ছলে করে গুণ-আস্বাদন ।’

‘বেশ তুমি যখন বলছ তুমি একাই যাবে, আমাদের কাউকে নেবে না সঙ্গে, তখন তাই হবে ।’ বললে নিতাই, ‘আমাদের সুখ-  
দুঃখ বিচার করব না, তোমার ইচ্ছাকেই শিরোধার্য করব ! কিন্তু তোমার কোপীন, বহির্বাস ও জলপাত্র কে বহন করবে ? তোমার ছ’হাত তো নাম-গণনায় আবদ্ধ থাকবে, তুমি নিজে তো বইতে পারবে না । তার পর প্রেমাবেশে যখন পথে অচেতন হয়ে পড়বে, তখন কে তোমার বস্ত্র-পাত্র রক্ষা করবে ? অন্তত একজনকে সঙ্গে নাও ।’

‘কার কথা বলছ ?’ একটু কি নরম হলেন গৌরহরি ?

‘কৃষ্ণদাসের কথা । সরল বিনয়ী ব্রাহ্মণ, তোমার পাত্র-বস্ত্র ও বহন করবে আনন্দে ।’

‘বেশ, তাই নেব । এখন চলো সার্বভৌমের সঙ্গে দেখা করি ।’



সর্বমঙ্গল উপস্থিত তার ছয়ারে, সার্বভৌম নিমাই-নিতাইকে পূজা করে আসন নিবেদন করল।

নিতাইকেও কি চিনেছে সার্বভৌম ? প্রভুরই এক স্বরূপ, সর্বজ্ঞ জ্যোতিষী যাকে বলেছিল দুর্বিজ্ঞেয়—বাৎসল্য দাস্ত ও সখ্যের সমধর, প্রভুর সহায়, লীলাসহচর। অকাতরে নির্বিচারে প্রেম বিলিয়ে যে প্রভুরই উদ্দেশ্যসিদ্ধির আনুকূল্য করছে।

প্রভু বললেন, ‘অমুমতি করে : বিশ্বরূপের খোঁজে দক্ষিণে যাব। তোমার শুভ ইচ্ছায় আবার ফিরে আসব নির্বিঘ্নে।’

শেলের মত বৃকে এসে বিঁধল সার্বভৌমের। বললে, ‘প্রভু, তোমার বিরহ কি করে সহ্য করব ? এর চেয়ে আমার নিজের মৃত্যু, পুত্রের মৃত্যুও সহনীয় ছিল। তুমি স্বেচ্ছাময় স্বতন্ত্র, কে তোমাকে নিবৃত্ত করবে ? তবু, কোন পথে তুমি যাবে, কী করে সইবে পথক্লেশ ?’

‘কেন কাতর হচ্ছ ?’ সাস্বনা দিলেন প্রভু। ‘আমি সেতুবন্ধ পর্যন্ত যাব, আবার ত্বরিত ফিরে আসব। কৃষ্ণ সকলকে কৃপা করবেন।’

‘তবে দিন কতক আরো থাকে। প্রাণ ভরে তোমার শ্রীপাদপদ্ম দর্শন করি। যাঠীর মা, ব্রাহ্মণীকে বলি, তোমাকে ভিক্ষা দেন দিন কতক।’

চার দিন থেকে গেলেন প্রভু। তার পর মন্দিরে গিয়ে জগন্নাথের কাছে আদেশ প্রার্থনা করলেন। প্রসাদী মালা এনে দিল পূজারী—তাই অজ্ঞামালা। মালা নিয়ে মন্দির প্রদক্ষিণ করলেন, সমুদ্রতীর ধরে আলালনাথের উদ্দেশে অগ্রসর হলেন।

‘তুমি এবার ফিরে যাও।’ বললেন সার্বভৌমকে।

‘প্রভু, আমার এক নিবেদন আছে।’ বললে সার্বভৌম। ‘গোদাবরী তীরে বিজ্ঞানগরে রামানন্দ রায় আছে। সে রাজ-প্রতিনিধি, বিষয়ী, জাতিতে কায়স্থ। তাই বলে তাকে উপেক্ষা করো না, দয়া করে দর্শন দিও। সে যেমন পণ্ডিত তেমনি ভক্ত।

ভার সঙ্গী আলাপ করলেই বুঝতে পারবে। তাকে আমি এ বাবৎ 'বৈষ্ণব' বলে পরিহাস করেছি, তার কথা ও আচরণ কোনো কিছুয়ই মর্ম আমি বুঝিনি। তোমার কৃপায় এবার তার ভাব হৃদয়ঙ্গম হয়েছে। তুমি তাকে সম্ভাষণ করলেই বুঝবে তার মহত্ব।'

দেখা দেবেন বলে প্রভু সম্মত হলেন। আলিঙ্গন করে বললেন, 'এবার ভবে ঘরে ফিরে কৃষ্ণ ভজন করো। আর আশীর্বাদ করো আমি যেন তোমার প্রসাদে নীলাচলে কেন্ন ফিরে আসি।'

চলে গেলেন প্রভু। সার্বভৌম মুর্ছিত হয়ে পড়ল। তার দিকে প্রভু আর ফিরেও তাকালেন না। 'মহানুভবের চিন্তের স্বভাব এই হয়। পুষ্পসম কোমল—কঠিন বজ্রময় ॥'

নিজ্যানন্দ সার্বভৌমকে সুস্থ করে বাড়ি পাঠিয়ে দিল।

বাকি সকলে যুক্ত হল প্রভুর সঙ্গে। সমুদ্রের ধারে-ধারে হেঁটে-হেঁটে পৌঁছুল আলালনাথে।

আলালনাথকে প্রণাম করে নৃত্য শুরু করলেন প্রভু। দলে-দলে লোক এসে জড়ো হতে লাগল। চতুর্দিকে রব উঠল হরি-হরি, রব উঠল কৃষ্ণ-গোপাল। অরুণ বসনে মণ্ডিত এমন কাঞ্চনদেহ কেউ দেখেনি, দেখেনি এমন কম্প-শব্দ, এমন পুলকাক্রম। যে দেখে সেই চমৎকার গণে, ফিরে যেতে চায় না। ছেড়ে যেতে চায় না।

প্রভুর তা হলে ছপূরের ভিক্ষা জোটানো কঠিন হল।

'তোমরা কেন এত ভিড় করছ?' নিজ্যানন্দ চাইল বোঝাতে। 'কথা দিচ্ছি, প্রতি গ্রামে এমনি নৃত্য হবে, তোমরা পাবে এই মহৎ সঙ্গ। এখন সকলে নিরস্ত হও, গায়ে-ঘরে ফিরে যাও।'

কে কার কথা শোনে!

'চলো তোমাকে স্নান করিয়ে নিয়ে আসি।'

সমুদ্রে নিয়ে গেল প্রভুকে, আধালি-পাধালি লোক ছুটল। তাড়াতাড়ি স্নান করিয়ে আবার নিয়ে এল মন্দিরে। আর তক্ষুনি বন্ধ করে দিল দরজা।

গোপীনাথ প্রসাদ নিয়ে এসেছিল, নিমাই-নিতাইকে ভিক্ষা করাল। অবশিষ্ট বাকি সবাই ভাগ করে নিল।

‘দরজা খোলে। দর্শন করতে দাও আমাদের।’ জনতা উত্তাল হয়ে উঠল।

ভক্তদের সাহস হল না দরজা খোলে। কিন্তু প্রভু কতক্ষণ লোক-আর্তি সহ্য করবেন? বললেন, ‘দ্বার মোচন করো।’

সন্ধ্যা পর্যন্ত চলল জনস্রোত। যে দেখল সেই বৈষ্ণব হয়ে গেল। মুখে ধনি ফুটল—হরি-হরি, কৃষ্ণ-কৃষ্ণ, জয় কৃষ্ণ শ্রীচৈতন্য।

সারারাত কাটল কৃষ্ণকথায়। প্রভাত হলে প্রাতঃস্নানের পর প্রভু ভক্তদের কাছে বিদায় চাইলেন। সকলে আবার হায়-হায় করে উঠল।

কাক দিকে আর তাকালেন না। কৃষ্ণবিরহে ব্যাকুল হয়ে রাধিকার মত চললেন বিষাদসুবি হয়ে।

মুখে শুধু এক বাক্য : ‘রাম রাঘব, রাম রাঘব, রাম রাঘব, রক্ষ মাম্। কৃষ্ণ কেশব, কৃষ্ণ কেশব, কৃষ্ণ কেশব, পাছি মাম্।’ এই বাক্য মুখে নিয়েই চলেছেন গৌরহরি, আর যাকেই দেখছেন, বলছেন, বেলো হরি, বেলো কৃষ্ণ। আলিঙ্গন করছেন আর সুষোণে শক্তি সঞ্চারণ করে দিচ্ছেন! আর সে তার গ্রামে ফিরে গিয়ে কৃষ্ণ বলে নাচছে, কাঁদছে, আর হাসছে, বৈষ্ণব হয়ে যাচ্ছে। তার পর অল্প গ্রামের লোক যখন তার সঙ্গে দেখা করতে আসছে, সেও হয়ে উঠছে মহাভাগবত, কৃষ্ণনামের আচার্য।

এভাবে সেতুবন্ধ পর্যন্ত সমস্ত দেশ বৈষ্ণব হয়ে গেল।

ক্রমে এসে পৌঁছলেন কূর্মক্ষেত্রে গঞ্জামে। মন্দিরে কূর্মাবতারের বিগ্রহ দেখে স্তবস্তুতি করতে লাগলেন। উর্ধ্ববাহু হয়ে নাচতে লাগলেন প্রেমাবেশে।

এখানেও সেই কৌশল। এক গ্রাম থেকে অল্প গ্রামে কৃষ্ণায়ি-সঞ্চারণ।

‘কৃষ্ণনাম লোকমুখে শুনি অবিরাম ।

সেই লোক বৈষ্ণব কৈল অস্ত্র সব গ্রাম ॥

‘এইমত পরম্পরায় দেশ বৈষ্ণব হৈল ।

কৃষ্ণনামায়ুত-বহুয় দেশ ভাসাইল ॥’

কূর্ম নামে এক বৈদিক ব্রাহ্মণ আছে সেই গ্রামে, প্রভুকে নিজ গৃহে নিমন্ত্রণ করল। নিজে পা ধুয়ে দিল প্রভুর, সেই জল খেল সবংশে। অনেক স্নেহে ভিক্ষা করাল নানাপ্রকার, সবংশে খেল শেষায়। বললে, ‘যে পাদপদ্ম ব্রহ্মা ধ্যান করছে, তাই আমার ঘরে অবতীর্ণ। প্রভু, তোমাকে আর আমি ছাড়ব না, বিষয়তরঙ্গ আমি ছিন্নভিন্ন হয়ে যাচ্ছি, আমাকে তুমি সঙ্গে নাও।’

‘এসব কথা বলবে না।’ বললেন প্রভু, ‘ঘরে বসে নিরস্তর কৃষ্ণনাম নেবে, আর যাকেই দেখবে, তাকেই করবে কৃষ্ণ-উপদেশ। তোমাকে বিষয়তরঙ্গ স্পর্শ পর্যন্ত করতে পারবে না।’

সর্বান্ধে গলিতকূর্ট, বাসুদেব রাজে শুনতে পেল, কূর্মবিপ্লের ঘরে প্রভু এসেছেন! ভোর হতেই চলে এল তড়িঘড়ি।

‘প্রভু কোথায়?’

‘এই ঋনিক আগেই চলে গেছেন।’

‘চলে গেছেন!’ মূর্ছিত হয়ে মাটিতে পড়ে গেল বাসুদেব।

জীবনে তার একমাত্র সঙ্গী কূর্টকীট। অঙ্গের ক্ষতস্থান থেকে যদি একটি কীট মাটিতে পড়ে যায়, বাসুদেব আবার তাকে সমস্ত ক্ষতস্থানেই আশ্রয় দেয়। নিজ দেহের প্রতি বিন্দুমাত্র অভিনিবেশ নেই, নিজ দেহ দিয়েই কীটগুলোকে, যেসব কীট দেহ থেকে খসে পড়েছে তাদেরও, তাদেরও সেবা-যত্ন করে, ভরণপোষণ করে। যে দীক্ষরতনয়, কোথায় আর তার দেহবুদ্ধি!

বিলাপ করতে লাগল বাসুদেব।

হঠাৎ তার চোখের সামনে প্রভু এসে দাঁড়ালেন। শুধু দাঁড়ালেন

না, তাকে বুকে টেনে নিয়ে আলিঙ্গন করলেন। দিলের তাকে জ্যোতির্ময় নিরাময় স্পর্শ।

মূহূর্তে অভিনব কাণ্ড ঘটে গেল। কুষ্ঠ সেরে গেল বাসুদেবের। তার সর্ব অঙ্গ নিরবচ্ছ হয়ে উঠল, ধরল সুবর্ণকাস্তি।

‘এ শুধু তুমিই পারো।’ বললে বাসুদেব। ‘এ জীবের পক্ষে অসম্ভব। তুমি ভগবান, জীবনিস্তার তোমার স্বভাব, তাই তোমার মধ্যে উত্তম-অধমের ভেদ নেই, উত্তম-অধম দুইই তোমার সমান প্রিয়। কিন্তু এ আরোগ্য সর্বাংশে আমার পক্ষে শুভ হল কী?’

‘কেন এ কথা বলছ?’

‘আমার এখন অহঙ্কার না জন্মায়।’ দ্রবচিন্তে বললে বাসুদেব, ‘আগে আমি সকলের অস্পৃশ্য ছিলাম, আমার গায়ের গন্ধে কেউ আমার কাছে ঘেঁসত না, নিজেকে ভাবতে পারতাম দীনাতিদীন বলে। তুমি এখন আমার দেহকে নিকলঙ্ক করলে, রূপে লাবণ্যে গরীয়ান করলে, এখন আমাতে দেহাভিমান না এসে যায়। আর তুমি তো জানো অভিমানই ভজনের শত্রু।’

‘তুমি সর্বদা কৃষ্ণ-কৃষ্ণ বলে, কৃষ্ণ-ধ্বনিতেই জন্মাবে না অভিমান। কৃষ্ণই তোমাকে আত্মসাৎ করে নেবেন।’

প্রভু চললেন এগিয়ে। নষ্ট-কুষ্ঠ রূপপুষ্ট হয়ে গেল। শুধু তাই নয়, হয়ে গেল ভক্তিভূষ্ট। প্রভুর নাম হল বাসুদেবামৃতপদ।

জিয়ড়-নৃসিংহের স্থানে পৌঁছলেন তার পর। ‘এই নৃসিংহ প্রহ্লাদের স্থাপনা। দণ্ডবৎ নতি করলেন প্রভু। বহু নৃত্যগীতস্তুতি করলেন। সিংহ যেমন অশ্বের সম্পর্কে উগ্র হয়েও নিজের শাবকদের কাছে শাস্ত, তেমনি নৃসিংহ হিরণ্যকশিপুর মত ভক্তদ্রোহীর প্রতি উগ্র হয়েও প্রহ্লাদের মত ভক্তের কাছে স্নেহশীল।

প্রহ্লাদ তার বন্ধুদের বললে, ‘তোমরা যদি আমার বাক্যে শ্রদ্ধাবান হও, তা হলে শ্রদ্ধা হতেই তোমাদের বিগুহ্ব বুদ্ধি উৎপন্ন হবে। আমি বলছি, যাতে ভগবানের অবিচলিত আসক্তি হয়, তাই

করো। গুরুপূজা করো, সমস্ত লক্ষবস্ত্র সমর্পণ করো, সাধু ভক্ত-  
বৃন্দের সংসর্গ করো, ভগবৎকথায় অমুরাগী হও, সজ্জন হও, ধ্যান  
করো তাঁর পাদপদ্ম। যেখানে তাঁর যত মূর্তি আছে, বহুমূর্ত্যৈক-  
মূর্তি, সমস্ত দর্শন-পূজন করো। ভগবান সর্বভূতে বর্তমান—তাই  
জেনে সর্বভূতে সাধুদৃষ্টি করো। তা হলেই দেখবে বাসুদেবে আসক্তি  
আসবে। দ্বিজস্ব, দেবস্ব, ঋষিস্ব, চরিত্র, বহুজ্ঞতা, দান, তপস্বী, যজ্ঞ,  
শৌচ ও ব্রত—মুকুন্দের শ্রীতি-উৎপাদনে সমর্থ নয়, একমাত্র নির্মল  
ভক্তিতেই হরি আনন্দিত হন। গোবিন্দে একান্ত ভক্তি আর তাঁকে  
সর্বত্র নিরীক্ষণ করাই ইহলোকে পুরুষের পরমস্বার্থ। ভক্তি ছাড়া  
আর সমস্তই বিড়ম্বনা।

মানবজন্ম প্রয়োজনসাধক। যেহেতু মানবজন্ম দুর্লভ ও অনিত্য,  
কৌমারকালেই ভাগবতধর্ম আচরণ করো। আরো বললে প্রহ্লাদ।  
বিষ্ণু সর্বভূতের প্রিয় ও সুহৃদ। দেহসম্বন্ধ থেকে ইন্দ্রিয়সুখ অনায়াসেই  
পাওয়া যায়, এতে মঙ্গল নেই, শুধু আয়ুক্ষয়। একমাত্র ভগবানের  
চরণাম্বুজসেবনেই মঙ্গল। সেই আত্ম অনন্ত অধোকক্ষ যদি তুষ্টি হন  
তা হলে আর কী অলভ্য থাকে? পরিণামে যা হবেই যা অবশ্য-সিদ্ধ  
সেই সমস্ত ধর্মচেষ্টায় কী ফল? আমরা যারা নিরন্তর তাঁর নামকীর্তন  
করছি ও চরণসংলগ্ন আছি, আমাদের মোক্ষ দিয়েই বা কী হবে?

আমু মাত্র শতবৎসর। তার অর্ধেক ব্যয় হয় নিদ্রায়, অজ্ঞতমসে,  
নিষ্ফলশয়নে। বিশ বছর যায় বাল্যমোহে ও কৈশোরক্রৌড়ায়,  
বিশ বছর স্ত্রাজীর্ঘতায়, আর বাকি জীবন গৃহাসক্ত অবস্থায়,  
ভাপত্রয়ে, ছরস্ত্র মোহে। কেশকার কীট যেমন নিজ বাসস্থান নির্মাণ  
করে নিজের বহির্গমনের জন্তেও দ্বার রাখে না তেমনি গৃহসুখমস্ত  
সংসারীরা আপন লোভজালেই বদ্ধ হয়ে পড়ে। মুকুন্দের শরণাগতিই  
এই পরম ক্লেশকর অবস্থা থেকে মুক্তির উপায়। ভগবান অচ্যুত  
সর্বভূতের আত্মা ও স্বতঃসিদ্ধ বলে তাঁকে শ্রীত করা কঠিন নয়। তা  
স্বভাবেরই বস্তু।

পরন্তু স্ববস্তু একেই বহু, আবার বহুতেও এক। তাই যেখানে যত মন্দির পেয়েছেন—ভগবতীর কি ভৈরবীর, বিষ্ণুর কি হুসিংহের, দর্শন করেছেন প্রভু। আর সর্বত্রই তাঁর প্রেমাবেশ। যদিও কৃষ্ণের মাধুর্য আত্মদানের জগ্গেই তাঁর অবতারণ, সেই আত্মদানে পূর্ণতা কই যদি অত্র ভগবৎস্বরূপের মাধুর্যও না আত্মদানিত হয়? কোনো ভগবৎস্বরূপই উপেক্ষণীয় নয়। বিভিন্নস্বরূপে ভেদবুদ্ধি করলে অপরাধ। দীক্ষরথে তাই প্রভুর সর্বত্র প্রেমাবেশ।

একরাত্ত সেখানে থেকে আবার চললেন দক্ষিণে। গোদাবরীর তীরে এসে দাঁড়ালেন। এ কি, যমুনা নাকি? আর চারদিকের এই ঘন বন, এই বৃষ্টি ব্রহ্মভূমি! মাতোয়ারা হয়ে নাচতে লাগলেন। আবার এ অঞ্চলও বৈষ্ণবায়িত্ত হল।

পার হলেন গোদাবরী। ঘাটে স্নান করে অদূরে বসলেন কৃষ্ণ-কীর্তন করতে।

হঠাৎ বাজনা বেজে উঠল, দোলায় চড়ে কে আসছে রাজরাজড়া। সঙ্গে বহুতর ভৃত্য, বৈদিক ব্রাহ্মণ, সৈন্যসামন্ত। অনেক ঠাটবাট। আসছে স্নান করতে, কিন্তু বিষয়-বিলাসের ঘনঘটা কত!

প্রভু জানেন এ কে। এ উৎকলবাসী, বিজ্ঞানগরের অধিপতি রামানন্দ রায়। বিষয়ে বসবাস করেও নিরাসক্ত। কৃষ্ণপ্রেমে টলমল।

বিধিমনত স্নান-তর্পণ করল রামানন্দ। হঠাৎ নজরে পড়ল অদূরে একাকী কে এক সন্ন্যাসী বসে আছে। সন্ন্যাসী সম্বন্ধে রামানন্দ বিশেষ উৎসাহিত নয়, কিন্তু কে এ অপরূপ? অরুণবর্ণ বহির্বাস, কমলচক্ষু, সুবলিত প্রকাণ্ড শরীর, শরীরে শত সূর্যের ভেজ। সমস্ত বন-বিটপী আলো করে বসে আছে। শুধু চোখেই চমৎকার লাগল না, প্রাণেও বাঁশি বেজে উঠল। রামানন্দ এগোল জুঁত পায়ে, একেবারে দণ্ডবৎ ভুলুষ্ঠিত হয়ে প্রণাম করল প্রভুকে।

তাকে আলিঙ্গন করবার জগ্গে প্রভুও সতৃষ্ণ হলেন। উঠে দাঁড়িয়ে বললেন, 'ওঠো। কৃষ্ণ-কৃষ্ণ বলো।'

উঠল রামানন্দ । সহর্ষচোখে তাকিয়ে রইল ।

‘তুমিই রামানন্দ ?’

দৈন্তব্যবেশে রামানন্দ বললে, ‘আমিই সেই মন্দভাগ্য শূদ্রাধম ।’

‘তুমি ?’ কতদিনের হারানো বন্ধুকে খুঁজে পেয়েছেন—সেই উদ্বেল আনন্দে দীর্ঘ দৃঢ় ভুঞ্জে রামানন্দকে প্রভু বৃকের মধ্যে জড়িয়ে ধরলেন ! হুজনেরই স্বাভাবিক প্রেমের উদয় হল—প্রভুর রাধাভাব, রামানন্দের গোপীভাব । পরস্পরকে আলিঙ্গন করে হুজনেই পড়লেন মাটিতে—স্তুস্ত স্তব্দ অশ্রু কম্প পুলক বৈবর্ণ্য তো ফুটলই, মুখে ফুটল গদগদ শব্দ—কৃষ্ণ-কৃষ্ণ, কৃষ্ণ-কৃষ্ণ ।

এ কী আচরণ ! বৈদিক ব্রাহ্মণেরা স্তম্ভিত হল । তেজপুঞ্জ-কলেবর সন্ন্যাসী, অথচ শূদ্রকে আলিঙ্গন করছে ! আর স্বভাবতই গম্ভীর যে রাজপুরুষ, সেই রামানন্দ সন্ন্যাসীস্পর্শে করছে এমন আকুলি-ব্যাকুলি !

বিরোধীয় ভাবের লোক দেখে প্রভু ভাব সম্বরণ করলেন । সুস্থ হয়ে বসলেন রামানন্দকে পাশে নিয়ে । বললেন, ‘সার্বভৌম ভট্টচাজ তোমার কথা বলেছিলেন আমাকে । বলেছিলেন দেখা করতে । ভালোই হল, অনায়াসে তোমার দর্শন পেলাম ।’

‘আজ আমার মনুগ্ৰন্থ সফল হল ।’ বললে রামানন্দ । ‘সার্বভৌমের কৃপায় আমি ভাগ্যবান হলাম, পেলাম চরণদর্শন । তার প্রেমে বশীভূত হয়ে আমার মত অস্পৃশ্যকে তুমি আলিঙ্গন করলে । বেদবিধি ভয় করলে না, আমার মত বিষয়ী রাজসেবী শূদ্রকেও তোমার বৃকে স্থান দিলে । সন্দেহ কী, তুমিই সাক্ষাৎ ঈশ্বর, জীবের প্রতি কৃপায় নিন্দ্যকর্ম করতেও তোমার বাধে না ।’

‘কাঁহা তুমি সাক্ষাৎ ঈশ্বর নারায়ণ ।

কাঁহা মুঞি রাজসেবী বিষয়ী শূদ্রাধম ॥

মোর স্পর্শে না করিলে ঘৃণা বেদভয় ।

মোর দরশন তোমা—বেদে নিষেধয় ॥



তোমার কুপায় তোমায় করায় নিন্দ্যকর্ম ।

সাক্ষাৎ ঈশ্বর তুমি—কে জানে তোমার মর্ম ?

আরো বললে রামানন্দ, ‘আমাকে উদ্ধার করতেই তোমার এখানে আসা । তুমি যে পরম দয়ালু, তুমি যে পবিত্র-পাবন । মহাপুরুষেরা নিজের আশ্রম ছেড়ে অতীত যাব কেন ? তাদের নিজের প্রয়োজনে নয়, শুধু পাষণ্ড-উদ্ধারে । যাব কেন তীর্থ-পর্ষটনে ? শুধু তীর্থকে পবিত্র করতে, আর সেই ছলে সংসারীদের নিস্তার করতে ।’

বিহ্বলকেও তাই বলেছিল যুধিষ্ঠির । বলেছিল, ‘আপনার মত কৃষ্ণভক্ত তীর্থের মতই পবিত্র । যাদের অন্তরে গদাধর বিরাজমান, তাদের তীর্থদর্শনে প্রয়োজন কী । শুধু তীর্থের পবিত্রতা বাড়াবার জন্তেই তাদের তীর্থভ্রমণ ।’

‘দেখ, তোমাকে দেখে আমার অনুচরেরা, ব্রাহ্মণেরা পর্ষন্ত জব্বীভূত হয়েছে ।’ রামানন্দ আরো বললে, ‘কৃষ্ণনাম শুনে সকলের শরীর শিহরিত, চোখ অশ্রুসজল । তোমার আকৃতিতে-প্রকৃতিতে ঈশ্বর-লক্ষণ সূক্ষ্মট, সামান্য জীবে এ কখনো সম্ভব নয় ।’

‘কী যে বলা’ ।’ বললেন প্রভু, ‘তুমি মহাভাগবত, তোমার ভক্তি দেখেই ওদের মন আর্জি হয়েছে । অণ্ডের কথা ছেড়ে দিই, আমি হেন যে মায়াবাদী সন্ন্যাসী, ভক্তির ধার ধারি না, আমিও তোমার স্পর্শে ভাসছি কৃষ্ণপ্রেমে । সার্বভৌমই বলে দিলেন, আমার কঠিন চিন্তকে শোধন করবার একমাত্র রসায়ন তুমি, তাই তো এসেছি তোমাকে দেখতে ।’

কিস্ত এখানে থাকি কোথায় ?

এক বৈষ্ণব ব্রাহ্মণ তাঁর ঘরে প্রভুকে নিমন্ত্রণ করলেন ।

প্রভু হাসিমুখে বললেন রামানন্দকে, ‘বড় সাধ তোমার মুখে কৃষ্ণ-কথা শুনি । আবার দেখা হবে তো ?’

‘কিছুদিন এখানে থাকুন ।’ বললে রামানন্দ, ‘এই ছুটিচিন্তকে মার্জন করে শোধন করে দিয়ে যান ।’

‘আপনারা সংসারতপ্ত ব্যক্তিদের পরমবন্ধু।’ সমৎকুমারকে জিগগেস করল মহারাজ পৃথু : ‘আপনারা বলে দিন সংসারে কী উপায়ে মানুষের মঙ্গল হবে।’

‘শ্রীহরিচরণে ছুরাপা রতিই অস্তরের কামমলকে বিধৌত করে। শাস্ত্র দ্বারা যা নিশ্চিত হয়েছে, আত্মা ভিন্ন সে সমস্ত পদার্থে বৈরাগ্য আর গুণাতীত আত্মায় দৃঢ়া রতিই মানুষের শ্রেয়োলাভের হেতু। শ্রদ্ধা, চর্চা, জিজ্ঞাসা, নিষ্ঠা, উপাসনা, পুণ্যশ্লোক হরির পবিত্র কথা, তামস ও রাজস ব্যক্তিদের সঙ্গে সহবাস-অনিচ্ছা, নির্জনবাসে অভিরুচি, অর্ধকামবর্জন ও আত্মাতে পরিতোষ—এ সমস্তে অনায়াসেই আত্মরতি ও আত্মভিন্নে অনাসক্তি জন্মাতে পারে। আর মুকুন্দচরিতামৃতাস্বাদন, হরিভক্তদের কর্ণালঙ্কারস্বরূপ হরিনাম বারংবার উচ্চারণ, এরাও দেয় শ্রেয়োফল। কর্মগ্রন্থি ও হৃদয়গ্রন্থি যদি ছিন্ন করতে চাও তবে সেই চরমশরণ বাস্তুদেবের ভজন্য করে।

যাতে হরির পরিতোষ হয় সেই কর্মই কর্ম, যার দ্বারা ভগবানে মতি জন্মে সেই বিছাই বিছা। ভগবানের পাদমূলেই আশ্রয়, পাদমূলেই কল্যাণ।



৪৫

দেরি নয়, আজ সন্ধ্যাতেই দেখা করব। ভাবছে রামানন্দ। প্রভু ভাবছেন, কতক্ষণে না জানি দেখা পাই। সন্ধ্যা হতেই যেন চলে আসে।

সন্ধ্যা স্নান সেরে প্রভু বসে আছেন, রামানন্দ রায় উপস্থিত। রামানন্দ নমস্কার করল, প্রভু আলিঙ্গন করলেন।

নির্জনে বসে আলোচনা শুরু করলেন দুজনে।

৭৫

‘ঈশ্বরের কাম্য বা সাধ্য বস্তু কী?’ জিগগেস করলেন শ্রদ্ধু,  
‘শাস্ত্রীয় প্রমাণসহ বলো।’

শুধু তোমার কী অহুত্বুতি, তা নয়, শাস্ত্রের সিদ্ধান্তও প্রকাশ  
করো। অর্থাৎ শাস্ত্রবচনের সঙ্গে তোমার নিজের অহুত্ববকে  
মেলাও।

রামানন্দ বললে, ‘স্বধর্মাচরণই সাধ্য। তাই বলেছে বিষ্ণুপুরাণে।  
অর্থাৎ বর্ণাশ্রম-ধর্মের অহুত্বানেই বিষ্ণুপ্রীতি। যে যে-আশ্রমে যে-  
ভূমিতে আছে, সেই আশ্রমের বা সেই ভূমির বিহিত কাজ পালন  
করলেই বিষ্ণুর সন্তোষ।’

শ্রদ্ধু বললেন, ‘ইহ বাহু, আগে কহ আর। মহন্তর সাধ্যের কথা  
শুনতে চাই।’

‘কৃষ্ণে কর্মার্ণণ।’ বললে রামানন্দ, ‘শুধু সাধ্য নয়, সাধ্যসার।  
অর্থাৎ যা কিছু কাজ করো সব কৃষ্ণে অর্পণ করো। তোমার অধিকার  
কর্মে, ফলে নয়। যে কর্মের ফল কৃষ্ণের সূখে নয়, নিজের সূখে  
নিয়োজিত, তা অকর্ম।’

‘এও বাহু এও বাইরের দরজা,’ বললেন শ্রদ্ধু, ‘আগে কহ আর।  
অন্দরমহলের দ্বার দেখাও।’

‘স্বধর্মত্যাগ—সর্বধর্মত্যাগ।’ রামানন্দ বললে। ‘কর্ম করে ফল অর্পণ  
নয়, কর্ম করবার আগেই আত্মসমর্পণ। ফলদান নয়, আত্মদান। গীতায়  
যাকে বলেছে,—সর্বধর্মান্ পরিত্যজ্য মামেকং শরণং ব্রজ। যে  
নিজেকে দিয়েছে, তার আর ধর্ম থাকল কই? তার তখন স্ব-ও  
গেছে, ধর্মও গেছে। আত্মসমর্পণই শ্রেষ্ঠ সাধ্য।’

শ্রদ্ধু আরো এগোতে চাইলেন। বললেন, ‘এও বাহু, আগে  
বলো।’

সমর্পণ যে করবে, পূর্বাছে জানতে হবে শ্রীকৃষ্ণই একমাত্র শরণ্য,  
একমাত্র আশ্রয়স্থল। না জেনে সমর্পণে সার্থকতা কী। শুধু উপদেশ  
শুনে শরণাগত হবে? পাপ-পুণ্য বিচার করে? মুক্তি-ভুক্তির





































































































































































































































































































































































































































































































































































































